

LAI SIMIANG PHUK RA

(2Kings)

Grawng Yum Ahaziyax

1 Khaix hoik yum Ahap, pui meung Mawbax deeh yaog ti tiehfeen ka pui Isarela khankix heue. ² Yam in Ahaziyax rau khaing daux siviex vawng lawg plak piang dee ot nawh ka daux veng Samarix mai nawh mat, mawh kheu nan, nawh ploi cao cau khankix hu, ah nin ka kix, “Hu, chawk ti yaox ka sang deeh pon aux ti moi khaing krax pa mat aux ka Balazebuk pa mawh siyiex Ekaron heue.” ³ Viang mawh nan, kawncau Siyiex ah nin ka Eliyax pui veng Tishabix, “Kaoh, hu yaox ka kawncau simiang Samarix mai ah nin ka kix, mawh ang Siyiex lai koe ka daux haktiex pui Isarela khankix pex tom sang hu chawk Balazebuk pa mawh siyiex Ekaron lie?” ⁴ Yam in Siyiex ah yuh nin, maix tak ang pon ti lih khaing piang ku it tix, viang mawh nan maix tak yum tete heue.” Mawh kheu nan, Eliyax hoik lih hu khaing kix heue. ⁵ Yam deeh hoek pui cau khankix ka nawh, nawh chawk ah nin ka kix, “Deeh hoek pex kheu jao patix lie?” ⁶ Kix dee ah nin ka nawh, “Pui tix kaux hoek ti yaox yix ah nin, “Deeh ing ka simiang pa ploi pex hoek mai ah nin ka nawh, Siyiex ah yuh nin, mawh ang Siyiex lai koe ka daux haktiex pui Isarela khankix, pex hoik mawh pui cau pa ploi lih hu sonsang chawk cheng ka Balazebuk pa mawh siyiex veng Ekaron lie? Mawh kheu nan maix tak ang lai pon lih khaing ka piang ku it tix mai maix tak yum tete heue.” ⁷ Nawh ah nin ka kix, “Mawh pui pa yuh ka mawx pa hoek ti yaox pex mai kraigumlox ka pex lie?” ⁸ Kix deeh pawk ah nin ka nawh, “Nawh mawh pui pa kied pu hauk mai nawh rawd nyoi tix ka maox khlah hak” mai simiang ah nin, “An tee mawh Eliyax pui veng Tishabix heue.” ⁹ Khaix an, simiang ploi cao kaing naing tix kaux pa kuang ka piang lien tixphuan kaux hu tau mai haok ka Eliyax dee ngawm nawh ka piang gawng

1:8 Mat 3:4, Mak 1:6. 1:10, 12 Luk 9:54.

tix mu mai ah nin ka nawh, “Pui Siyiex eue, simiang ah nin, lih hoek heue” ¹⁰ Viang mawh nan, Eliyax deeh pawk lox ah nin ka cao kaing naing tixphuan kaux an, “Phan aux mawh pui Siyiex tix kaux, khaix an kieh ngu lih khaing raoma mai gleeing ti tik maix mai khawm pui maix tixphuan kaux khankix,” ngu lih khaing raoma mai gleeing ti tik nawh khawm pui nawh tixphuan kaux heue. ¹¹ Nawh deeh ploi cao kaing naing tang kaux pa kuang ka piang lien tixphuan kaux hu ka nawh tau mai pui nawh khankix tixphuan kaux mai nawh deeh pawk lox mai ah nin ka nawh, “Pui Siyiex eue, simiang hoik ah awm in, niied lih hoek phai phai” ¹² Viang mawh nan, Eliyax deeh pawk lox mai ah nin ka kix, “Phan aux mawh pui Siyiex tix kaux, kieh ngu lih khaing raoma mai gleeing ti tik maix, khawm pui maix tixphuan kaux khankix,” ngu Siyiex hoik lih khaing Raoma mai gleeing ti tik nawh mai pui nawh tixphuan kaux heue. ¹³ Nawh baox ploi cao kaing naing loe kaux tix kaux pa kuang ka piang lien tixphuan kaux khankix hu ka nawh tau mai lien tixphuan kaux mai cao kaing naing loe kaux tix kaux pa kuang piang lien tixphuan kaux an haok hoek mai gruxngawng tix ka plak sivoe Eliyax mai khioxkhaw ka nawh ah nin, “Pui Siyiex eue, yuh buanson kieh ju aux mai khawm ju kawncau maix tixphuan kaux khankix mawh pa koe ngawh jum ka daux ngai maix liak.” ¹⁴ Jhak heue, ngu kaoh khaing raoma mai hoik gleeing ti tik cao kaing naing pa hoek bawg phaoka ra kaux pa kuang ka piang cub lien tixphuan kaux khankix tau mai pui pa tang viex kiex hawt tix tixphuan kaux, viang mawh nan, kieh ju aux mawh pa koe ngawh jum ka daux ngai maix yam in liak.” ¹⁵ Kawncau Siyiex ah nin ka Eliyax, “Lih hu tau mai nawh, paw lhatgraung ka nawh.” Mawh kheu nan, Eliyax kaoh lih hu tau mai nawh ka simiang heue. ¹⁶ Nawh ah nin ka simiang, “Siyiex ah yuh nin, mawh kheu hoik ploi

maix pui cau khankix lih hu chawk tix ka Balazebuk pa mawh siyiex Ekaron, kheu ang Siyiex lai koe ka daux sinax pui Isarelaix khankix sonsang chawk tix gumlox Nawh Cao lie? Mawh kheu nan maix tak ang lai pon ti lih khaing ku it tix mai maix tak yum tete heue.”¹⁷ Mawh kheu nan, Ahaziyax yum awm gumlox pa kraik Siyiex ka Eliyax, mawh kheu ang nawh koe kawm simex, Yehoram deeh yaog ti mawh simiang ka dahdee ot nawh daux num yam kuang Yehoram kawm simex Yehoshaphat pa mawh simiang meung Yudax ra num tix num heue.¹⁸ Yam in grawng kaing pa deuk Ahaziyax mai pa hoik yuh nawh khankix, mawh pa tiem ti deuh daux phuk lai grawng been simiang pui Isarelaix khankixheue?

Eliyax Haok Ka Raoma

2 Khaix hoik luan ceu ankix, yam hoek bawgyam sang teei Siyiex ka Eliyax haok daux raoma ka bhaung keu kanglux, Eliyax hu tau mai Elishie daux veng Gilagalax heue.² Khaix an Eliyax ah nin ka Elishie, “Yuh buanson ot tin, mawh kheu Siyiex ploix au hu ka veng Betelax heue.” Elishie ah nin, “Awm krax pa im ju Siyiex mai krax pa im ju maix, aux tak ang lai pon goih maix heue.” Mawh kheu nan, kiex khawm ra lih hu tau ka veng Betelax heue.³ Cub cao jhai khankix pa ot ka daux veng Betelax khrawm paox tix hoek ka Elishie ah nin, “Mawh hoik tawng maix ka sang teei Siyiex, cao simiang maix pa mawh cao kaing maix, hu khaing maix daux in singaix lie?” Nawh ah nin, “Mawh heue, aux hoik tawng, ot yiienyawg heue.”⁴ Eliyax ah nin ka nawh, “Elishie eue, ot tin, mawh kheu Siyiex hoik ploix au hu ka veng Yerikho heue.” Nawh deeh ah nin, “Awm krax pa im ju Siyiex mai krax pa im ju maix aux tak ang pon ti goih khaing maix heue.” Mawh kheu nan, kiex khawm ra lih hu tau ka veng Yerikho heue.⁵ Cub cao jhai khankix pa ot ka daux veng Yerikho khrawm paox tix hoek ka Elishie mai ah nin ka nawh, “Mawh hoik tawng maix ka sang teei Siyiex, cao kaing maix hu khaing maix daux in singaix lie?” Nawh ah nin, “Mawh heue, aux hoik tawng,

ot yiienyawg heue.”⁶ Khaix an Eliyax deeh ah nin ka nawh, “Yuh buanson ot tin, mawh kheu Siyiex hoik ploix au hu ka rawm klawng Yawdan heue.” Nawh deeh ah nin, “Awm krax pa im ju Siyiex mai krax pa im ju maix, aux tak ang pon ti goih khaing maix.” Mawh kheu nan, kiex khawm ra lih hu tau heue.⁷ Cub cao jhai khankix tixphuan kaux hu mai kix cungka plaksivoe kix dee singai, yam kawm cungkiex ra kaux hawt rawm klawng Yawdan heue.⁸ Yam in Eliyax teei sibex dhah ceep tix, pua mai sivied ka rawm mai rawm tang goih tix, plak in plak an mai kiex ra kaux tiang ti hu ka plak toi an ka piang tiex kroh heue.⁹ Ceu ankix hoik lih ti mawh yam tiang kiex ka plaktoi rawm, Eliyax ah nin ka Elishie, “Rawg mhaing heue, mawh sang kieh maix aux yuh ceu patix son maix, sivoe ang aux nyang teei hu khaing maix?” Elishie ah nin, “Yuh buanson kieh khuan maix koe ka piang aux ra son liak.”¹⁰ Mawh kheu nan, Eliyax ah nin, “Maix hoik rawg ceu pa kied nu, viang yuh ka mawh kawx phan maix yaox yam teei aux lih hu khaing maix, maix tak pon awm an, phan ang mawh nan, phan maix ang yaox, maix tak ang lai pon kah heue.”¹¹ Yam kawm lailing kiex ti sikah tau mai paox tix, linglawx ngu tix lhang bleeh sijaox tau mai brung ngu khankix, goih ka kiex ra kaux, Eliyax haok tau mai bhaung keu kanglux teei nawh haok ka raoma heue.¹² Elishie hoik yaox ka ceu ankix mai nawh kokyo ah nin, “Keeing aux eue, keeing aux eue, linglawx naing mai khawm pui naing brung pui Isarelaix.” Khaix an, nawh ang lai yaox ka nawh tix bawg kawx heue. Nawh riah ka sibex dhah pa giex tix koe ra plak heue.¹³ Nawh sut ti teei sibex dhah Eliyax pa cod khaing nawh mai deeh ing cung ka praok rawm klawng Yawdan heue.¹⁴ Nawh teei sibex dhah Eliyax pa hoik cod khaing nawh mai sivied rawm ka ah nin, “Siyiex Eliyax ot dee mawx lie?” Mai yam hoik sivied nawh rawm ka sibex dhah an, rawm hoik tang goih ti hu, plak in plak an mai Elishie tiang ka toi plak an heue.¹⁵ Yam hoik yaox cub cao jhai khankix pa ot ka veng Yerikho ka nawh, kix ah nin, “Khuan Eliyax

hoik ot ka piang Elishie" mai kix gup tix ka piang tiex ka plak sivoe nawh heue. ¹⁶ Khaix an, kix ah nin ka nawh, "Jhak heue, yam in, pui ting riang rao tixphuan kauk khankix to tau mai kawncau maix, yuh buanson kieh kix lih sawg ka cao simiang maix, ha kluan Siyiex teei nawh haok mai deuh nawh ka piang gawng tix dahdah, phan ang mawh nan, dauh ngawd tix dahdah heue." Nawh ah nin, "Ang shiao ploi pui hu." ¹⁷ Yam sigleeig kix ka nawh tom ang nawh lai tawng ka pa sang keud tix mai nawh ah nin, "Ploi kix lih hu heue." Mawh kheu nan, kix ploi pui hu tixphwan kauk mai kix sawg ka nawh loe ngaix, viang mawh nan, kix ang yaox ka nawh heue. ¹⁸ Yam deeh hoek kix ka Elishie yam kawn ot nawh ka dauh veng Yerikho, nawh ah nin ka kix, "Ang shiao hu, aux hoik ah nan ka pex ang mawh lie?"

Elishie Yuh Mhai Pa Daoxdeng

¹⁹ Khaix an pui veng khankix ah nin ka Elishie, "Dahdee veng in mawh pa mhawm grang, awm krax pa hoik yaox cao simiang aux viang mawh nan, rawm ang mhawm mai tiex ang chix plix heue." ²⁰ Nawh ah nin, "Viex klong khraox tix mu hoek ka aux mai sau kih ka dauh an." Mawh kheu nan, kix viex klong an hoek ka nawh heue. ²¹ Elishie lih hu ka dee lih rawm mai sau kih ka dauh ah nin, "Siyiex ah nin, aux hoik cox rawm in mhawm, khaix in krax yum angah, krax pa ang chix plix angah, tak ang lai koe khaing tan heue." ²² Mawh kheu nan, rawm an hoik mawh pa mhawm tom hoek ka dauh in singaix awm lox pa hoik krai Elishie ti deuh heue. ²³ Nawh haok khaing tan mai hoek ka veng Betelax, yam lawng nawh krax kawn nyawm simex tixblah hoek khaing ka dauh veng mai ah lox sibriem ka nawh ah nin, "Pui pa pak kaing eue haok heue, pui pa pak kaing eue haok heue." ²⁴ Nawh deeh veeh tix mai jhak ka kix mai nawh jhaxlawg ka kix ka dauh min ceu kauk Siyiex mai krih miex ra mu lih khaing dauh nong mai paig ka kawn nyawm ankix tixpon ra kauk yum heue. ²⁵ Khaix an, nawh deeh lih hu khaing tan

mai hoek ka gawng Khamelax mai deeh kaoh khaing tan mai ing ka veng Samarix heue.

Krax Kuang Yehoram

3 Yam in Yehoram kawn simex Ahap yaog ti mawh simiang meung Isarelax ka dauh veng Samarix, nawh kuang ka haktiex kao ra num dauh yam kuang Yehoshaphat simiang Yudax ka haktiex kao daix num heue. ² Nawh hoik yuh pa caoxcaig plak sivoe ngai Simiang Siyiex, viang mawh nan, nawh ang yuh awm miex keeing tix, mawh kheu nawh hoik teei ti tik riang rao simaox Balax khankix pa yuh keeing nawh heue. ³ Viang yuh ka mawh kawx, nawh kawn ot ka dauh phimap pa yuh Yerobom khankix kawn simex Nebat pa hoik kieh pui Isarelax khankix lud yuh phimap, nawh ang yoi tix khaing heue. ⁴ Yam in Mesha simiang haktiex Mawbax mawh pa eei yung tomnie mai nawh yaox ti tawx kawn yung khankix tix sien mu mai yung pa koe hauk tix sien mu ku num ka simiang Isarelax heue. ⁵ Yam hoik yum Ahap, simiang haktiex Mawbax yaog ti tiehfeen ka simiang Isarelax heue. ⁶ Mawh kheu nan, simiang Yehoram lih khaing veng Samarix ka dauh bawgyam an mai teecarang pui Isarelax heue. ⁷ Nawh ploi pui hu ka Yehoshaphat simiang meung Yudax ah nin, "Simiang haktiex Mawbax hoik deeh tiehfeen ka aux heue. Sang hu puing maix haktiex Mawbax tau mai aux lie?" Yehoshaphat ahnin, "Aux tak hu heue, aux hoik mawh awm mawh maix, pui aux khankix hoik awm pui maix, brung aux khankix kawx hoik awm brung cie maix heue. ⁸ Nawh ah nin, "Sang haok ex ka kraxplak mawx lie?" Nawh deeh ah nin, "Haok ka plak krax dauh tiag Edom heue." ⁹ Simiang Isarelax hoik hu tau mai simiang Yudax mai simiang Edom, kix hoik hu hawt baoh krax an aliah ngaix, rawm ang lai koe son cub krunaing khankix mai son tobrie khankix pa viex kix heue. ¹⁰ Simiang Isarelax ah nin, "A...miex eue! Siyiex hoik kok simiang inkix loe kauk hoek tau sonsang ap Nawh Cao ti tawx kix ka dauh tawm taix pui Mawbax heue." ¹¹ Yehoshaphat ah nin, "Ang cao jhai Siyiex koe tin sonsang chawx ex ti yaox grawh grawng ceu inkix ka Siyiex khaing nawh lie?"

“Pui tix kaux khaing sinax kawncau simiang pui Isarelaḡ pawk lox ah nin, “Elishie pa mawh kawn simex Shaphat pa hoik see rawm ka piang taix Eliyax koe tin heue.”¹² Mai Yehoshaphat ah nin, “Gumlox Siyiex koe tau mai nawh heue.” Mawh kheu nan simiang pui Isarelaḡ mai Yehoshaphat mai simiang Edom hoik khrawm paox tix lih hu ka nawh heue.¹³ Khaix an, Elishie ah nin ka simiang pui Isarelaḡ “Mawh koe aux ceu pa yuh patix tau mai maix lie? Hu ka cub cao jhai keeing maix khankix mai ka cao jhai miex maix khankix” mai simiang pui Isarelaḡ ah nin ka nawh, “Ang mawh nan mawh kheu Siyiex hoik kok simiang inkix hoek tau sonsang ap Nawh Cao ti tawx kix ka dauḡ tawm taix pui Mawbax heue.”¹⁴ Elishie ah nin, “Awm krax pa im ju Siyiex Cao pa ting lhaong ka piang khawmuik mai pa hoik cung aux ti ot ka plak sivoḡ Nawh mai phan aux ang jhak pakngai Yehoshaphat simiang meung Yudax, aux tak ang lai jhak, lai simi ka maix heue.¹⁵ Yam in viex pui chix tah ting hoek ka aux tix kaux liak!” Ceu ankix lih ti mawh yam tah puipa chix tah ting ka ting, taix Siyiex hoek ka piang Elishie heue.¹⁶ Nawh ah nin, “Siyiex ah yuh nin, yuh rawng naog ka dauḡ lung in heue.¹⁷ Mawh kheu Siyiex ah yuh nin, viang pex ang yaox bhaung mai ang yaox lhiex kawx, dauḡ lung in tak naog ka rawm, sonsang pon tobrie maix mai totiag khankix ti nyaux rawm heue.”¹⁸ Ceu inkix mawh pa iak pa liied dauḡ ngai Siyiex, Nawh Cao tak baox ap pui Mawbax ka dauḡ tawm taix maix heue.¹⁹ Pex tak puing ka veng pa kauxcong khankix ku veng mai pa hoik yuh tix mhawm ku veng mai pex tak kid khaox ceu pa mhawm khankix mai thox dauḡ lih rawm klawng khankix mai pex tak kieh guang haktiex pa mhawm khankix lauxleeing ka lon simaox heue.²⁰ Ceu ankix lih ti mawh ka dauḡ ponngawb, yam yuh pex krax tan ceu pa ih mai rawm tak hoek sijaox ka plak haktiex Edom mai haktiex hoik naog ka rawm khawmuik heue.²¹ Yam mhong pui Mawbax khankix ka hoek cub simiang ti puing ka kix, can pui iak pui ting pa giex kraung naing khawmuik khrawm paox tix

mai kix cung ti ot ka piang mee haktiex heue.²² Kix yaog ti kaoh ponngawb caocao mai singaix hoik jhan riieng ka piang rawm mai pui Mawbax khankix yaox ka raoh rawm awm nham ka toi praok plak an heue.²³ Kix ah nin, “In mawh nham heue!” Simiang mug paox tix mai ralai pah paox tix yum mawh kheu nan, yam in pui Mawbax khankix eue, hu rhim ti teei kraung khrai heue.²⁴ Yam hoek kix ka bang pui Isarelaḡ, pui Isarelaḡ yaog ti puing ka pui Mawbax khankix, mawh kheu nan, kix to ka plak sivoḡ kix mai pui Isarelaḡ laig puing kix tom hoek ka haktiex kix mai pah pui Mawbax khankix heue.²⁵ Kix yuh veng khankix lauxleeing mai pui kukaux tang tik simaox naog ka piang haktiex mhawm kudah, kix thox dauḡ lih rawm klawng khankix khawmuik mai kix hoik kid ti tik khaox khawmuik, kix deuh ngie simaox pa koe ka piang guh veng Kiraharasiet, viang mawh nan, cub pui pa viex ak maox vudvied khankix hoik lailawm ka veng mai puing ka veng an heue.²⁶ Yam hoik yaox simiang Mawbax ka mawh naing an pa kied kin tete ka son nawh, nawh kok pui pa giex vaid aliah yieh kaux hoek tau mai tix sonsang pon preeng nawh ti puing ka dauḡ sinax cub pui naing simiang Edom, viang mawh nan kix ang pon preeng heue.²⁷ Khaix an, nawh teei kawn Ai tix pa sang caw ti kuang ka dahdee ot nawh mai nawh hoik tan ti tawx kawn Ai tix awm krax tan pa gleeing ka piang guh veng, krax pa songrhawm lih ti koe ka piang pui Isarelaḡ khankix, mawh kheu nan, kix hoik lih hu khaing nawh mai tang ing ka haktiex tix heue.

4 Elishie Mai Bee Miexmai

Sibun pa mawh moeng cao jhai tix kaux yiem ka Elishie ah nin, “Aux pa mawh siliex maix, mex aux hoik yum mai maix tawng ka lhatgraung siliex maix ka Siyiex mai cao pa tawx ceuk hoek ti teei kawn simex aux ra kaux sonsang mawh siliex tix heue.”² Elishie ah nin ka miexmai, “Sang kieh maix aux yuh ceu patix ka son maix lie? Krai aux mhong koe ceu patix ka dauḡ nyiex maix?” Miexmai ah nin, “Siliex maix ang koe tittix, lheu khaing aw bee tix mu khaing

pa koe daux nyiex heue.”³ Khaix an, Elishie ah nin, “Hu heue, teei maix vai aw khaing paox plawg maix khankix, kieh mawh aw pa yi, paw vai ngie ceexceex awx.”⁴ Khaix an, maix laig ka daux nyiex mai nyeeep siviex tau mai kawm simex maix mai rauk rawm bee ka daux aw khankix mai deuh pa hoik naog praok maix heue.”⁵ Sibun an lih hu khaing nawh mai nyeeep siviex tau mai kawm simex tix pa hoik teei ti viex aw khankix hoek ka nawh mai nawh rauk rawm bee ka daux aw ankix heue.⁶ Khaix an, yam hoik naog aw ankix, sibun an deeh ah nin ka kawm simex tix, “Baoux viex aw hoek ka aux heue. Nawh ah nin, “Aw pa yi ang lai koe heue.” Mawh kheu nan, bee kaog mai ang lai lih heue.⁷ Sibun an hoek krai ka pui Siyiex mai pui Siyiex deeh ah nin, “Hu coh bee an khankix mai viied ceuk maix kah, eei ju maix khawm kawm simex maix ka pa kawm deuk heue.”

Elishie Kieh Kawm Simex Deeh Im

⁸Daux tix ngaix, Elishie hu ka veng Shunam dee ot sibun pa ao min tix kaux mai sibun an khin nawh ih priex, khaix an, yam hoek nawh daux krax an yam mawx angah, nawh brax veh laig ti ih priex tan heue.⁹ Sibun an ah nin ka mex tix, “Yam in jhak heue, aux tawng ka pui pa yie tiang ti hoek ka baoh ex sijheeng mawh pui Siyiex pa singax singeh tix kaux heue.”¹⁰ Yuh buanson kieh ex yuh lawg plak piang tix mu mai yuh ti deuh dee it mai pheen, khaox ngawm mai khawm jawk ten tix mu ka son nawh tan, mawh kheu yam hoek nawh ka ex yam mawh angah, nawh tak laig ka daux lawg plak piang an heue.”¹¹ Ka daux tix ngaix, yam hoek nawh tan mai nawh veh laig ka daux lawg plak piang mai nyat tix heue.¹² Khaix an nawh ah nin ka kawncau tix Gehazix, “Kok ka sibun Shunam heue.” Yam kok nawh sibun an hoek, sibun an cung ka sivoie Elishie heue.¹³ Elishie ah nin ka kawncau tix, “Ah nin ka sibun an yam in, maix hoik nyhap rhawm tix khrierien ka yix, sang yuh aux ceu patix son maix lie? Sang kieh maix aux sikah tang tix ka simiang, phan ang mawh nan, ka cao kaing krunaing khankix lie?” Sibun an deeh pawk ah nin, “Aux

hoik nyawm ot sinax ceu pui tix khankix heue.”¹⁴ Elishie deeh ah nin, “Mawh sang deeh pon yuh ex tix tawx ceu patix ka son sibun an lie? Gehazix deeh ah nin, “Sibun in ang koe kawm simex tix kaux kawx mai mex nawh kawx hoik kuad heue.”¹⁵ Nawh ah nin, “Baoux kok nawh hoek, “Yam hu kok nawh sibun an hoek, sibun an cung ka daux diang siviex heue.”¹⁶ Elishie deeh ah nin, “Ka daux num khaix bawgyam in maix tak yaoux ti teem kawm simex tix kaux” mai sibun an deeh ah nin, “O cao simiang aux mai pui Siyiex eue, paw doh pielhen ka siliex sibun maix yuh nan liak!”¹⁷ Sibun an koe kaux mai nawh keh kawm simex tix kaux, yam hoek bawgyam awm pa krai Elishie ka nawh heue.¹⁸ Kawm simex an ting sipie, ka daux tix ngaix, nawh lih hu ka keeing tix ka dee pa vawg pui nghox khankix heue.¹⁹ Nawh ah nin ka keeing tix, “Saux kaing aux, saux kaing aux!” Mawh kheu nan, keeing nawh ah nin ka kawncau tix, “Viex nawh ing ka miex nawh heue.”²⁰ Yam viex kix kawm simex an ing ka miex nawh, nawh ngawm ka piang ngawng miex tix tom hoek bawgyam jung singaix mai khaix an nawh yum heue.²¹ Miex nawh teem nawh haok ka plak piang mai deuh nawh ka piang dee it pui Siyiex mai nyeeep siviex lih hu plak praix heue.²² Khaix an, nawh kok ka mex tix ah nin, “Yuh buanson ploi pui awn ju tix kaux hoek ka aux tau mai la tix mu sonsang niied aux ti hu ka pui Siyiex mai deeh niied ti hoek phaiphai heue.”²³ Mex nawh ah nin, “In ngaix ang nyang mawh haok khix khraox mai singaix tuah maix sang hu ka nawh yuh ka mawx?” Nawh ah nin, “Ang yuh tittix, mhawm heue.”²⁴ Nawh sau an brug tix ka piang la mai ah nin ka siliex tix, “Hawh la hu phaiphai, phan aux ang nyang ah tittix ka maix paw nyang nhim heue.”²⁵ Kheu nan, nawh lih mai hu ka pui Siyiex ka piang gawng Khamelax mai yam yaoux pui Siyiex ka yam hoek nawh dee singai, nawh ah nin ka siliex tix Gehazix, “Sibun veng Shunam hoek heue.”²⁶ “Yuh buanson yam in to ti rieb nawh mai ah nin ka nawh, nyawm ot maix lie? Nyawm ot mex maix lie? Nyawm ot kawm simex maix lie?” Sibun an deeh pawk ah nin, “Nyawm ot

heue.”²⁷ Yam hoik hoek sibun an ka pui Siyix ka piang gawng nawh kawm ka caong pui Siyix mai Gehazix hoek dex mai sang nyheen ka sibun an heue. Viang mawh nan, pui Siyix ah nin, “Ploi nawh, mawh kheu nawh lauxrhawm sigrien sigre mai Siyix hoik mox grawng ceu an khaing aux mai ang bax kraï grawng ceu an ka aux heue.”

²⁸ Sibun an ah nin, “Mawh sax mhaing aux kawm simex ka cao simiang aux lie? Aux hoik sax ah nin paw pielhen ka aux ang mawh lie?”

²⁹ Khaix an, nawh ah nin ka Gehazix, khrieren tokaux maix mai teei ti giex khaox grix aux ka daux taix maix mai lih hu ka daux krax hu maix heue. Phan maix sipub ka pui tix kaux kaux, paw vi sikah mai nawh awx. Phan pui tix kaux kaux sikah mai maix paw vi pawk kah, deuh khaox grix aux ka piang baoh kawm nyawm an heue. ³⁰ Miex kawm nyawm an deeh ah nin, “Awm pa im ju Siyix mai awm pa im ju maix, aux tak ang pon lih hu khaing maix.” Mawh kheu nan, nawh yaog ti kaoh mai hawt khaix kiex heue. ³¹ Gehazix hu sivoie kix mai deuh khaox grix an ka piang baoh kawm nyawm an, viang mawh nan, kawm nyawm an ang lai chix sikah mai ang lai chix mhong heue. Mawh kheu nan, nawh deeh ing yaox ka nawh mai kraï ah nin, “Kawm nyawm ang lai siduad heue.” ³² Yam hoek Elishie ka nyiex, kawm nyawm an koe sivoie nawh tan, hoik noi ti yum ka piang deei nawh heue. ³³ Mawh kheu nan, nawh laig ka daux lawg mai nyeeep siviex plak khaix kiex khawm ra kaux mai rawgbuan ka Siyix heue. ³⁴

Nawh haok ka piang dee it kawm nyawm an mai gup ti it ka piang nawh mai nawh deuh jheeh tix ka piang jheeh nawh mai deuh ngai tix ka piang ngai nawh mai deuh taix tix ka piang taix nawh mai nawh nih kaux tix ka piang kawm nyawm an mai nham kawm nyawm an deeh siu heue. ³⁵ Nawh lih khaing piang kawm nyawm an mai lailing ka daux nyiex, khaix an, nawh deeh baox laig ka dee ot kawm nyawm mai nawh deeh baox haok ka piang kawm nyawm an mai deeh nih tokaux tix piang nawh, khaix an, kawm nyawm an miah aliah bawg mai blah ngai tix heue. ³⁶ Elishie deeh kok ka Gehazix ah nin, “Kok ka

sibun Shunam an,” mawh kheu nan nawh hu kok ka sibun an heue. Yam laig sibun an ka dee ot nawh, nawh ah nin, “Yaog ti kliien kawm simex pax.” ³⁷ Sibun an laig ka plak daux mai gruxngawng tix hawt caong nawh mai gup tix ka piang tiex, khaix an, kiex yaog ti kliien kawm simex tix mai lih hu plak praix heue.

Elishie Yuh Aw Ngaik Taux Singax

³⁸ Elishie deeh ing ka veng Gilagalax mai sibhawm praix lih ti koe ka daux haktiex an mai kawm simex cao jhai khankix hoik ngawm ka plak sivoie nawh mai nawh ah nin ka siliex tix, “Tang ti deuh aw pa ting mai ngaik taux lhax son cub cao jhai khankix heue.” ³⁹ Pui tix kaux lih hu daux tongkaung sonsang caik taux lhax mai yaox pang num plix siiet tiag tixnhu mai caik taux lhax ankix mai nawh baox pieh ti viex plix singiien tiag khankix tom naog ka daux khawn taix nawh mai khawp ankix deeh hoek, khaix an sau plix singiien tiag ka daux aw ngaik taux, viang kix ang tawng ka mawh ankix ceu patix kawx heue. ⁴⁰ Khaix an, kix khankheu ka pui khankix heue. Ceu an khankix lih ti mawh yam kawm ih kix ka taux ngaik an, kix riagy lox tix ah nin, “Pui Siyix eue, ceu pa yum koe ka daux aw in.” Mai kix ang lai pon ih ka taux an heue. ⁴¹ Nawh ah nin, “Viex phawng blah hoek ceex” mai nawh sau phawng blah an ka daux aw ah nin, “Khankheu ka pui khankix sonsang pon ti ih mai canceu pa awp ankix tak ang lai koe tix ceu kawx ka daux aw an heue.”

Elishie Tawx Pui Tixyieh Ih Priex

⁴² Khaix an, pui tix kaux hoek khaing veng Balaxshalisha nawh viex ti tawx blah pa yuh ka phawng nghoxkoi pa liang tixnga lon mai simie nghox pa khraox ankix ka daux chee hoek ka pui Siyix mai nawh ah nin, “Tawx ceu ankix ka pui khankix sonsang yaox kix ti ih heue.” ⁴³ Siliex nawh ah nin, “Mawh ceu patix lie? Mawh sang deuh aux ceu inkix ka plak sivoie pui tixyieh kaux lie?” Nawh baox ah nin, “Tawx ceu ankix ka pui khankix sonsang pon kix ti ih, mawh kheu Siyix ah nin, kix tak ih tom sak tix mai tak kawm lheu ka heue.” ⁴⁴ Mawh kheu nan, nawh hu deuh ceu ankix ka plak

sivoe kix mai kix ih tom sak tix mai prah pa lheu tomnie awm gumlox krai Siyiex heue.

5 *Grawng Hoik Moi Saux Sipawg Neman*
 Yam in, Neman pa mawh cao kaing naing ting cub krungaing simiang meung Surix, mawh pui pa kied ting sibrawm mai mawh pui pa koe min ka plak sivoe ngai simiang nawh, mawh kheu Siyiex tawx krax pa pex nawh ka son meung Surix, nawh baow mawh pui pa ting riang rao mai pa koe rhawm kua rhawm vao tix kaux, viang mawh nan, nawh mawh pui pa koe jhawm saux sipawg tix kaux heue. ² Cub pui Surix khankix lih hu puing naing mai giex ti viex sibun pa awn ju tix kaux khaing dau meung Isarela, nawh yax ti mawh siliex moeng Neman heue. ³ Kawn sibun an ah nin ka buncao tix, "Kieh cao simiang aux pon ti ot tau mai cao jhai pa ot ka dau veng Samarix! Mawh kheu cao jhai an, tak pon pai nawh moi khaing jhawm saux sipawg nawh heue." ⁴ Neman laig ka dee ot simiang cao tix mai krai nawh mhong ah nin, "Sibun Isarela an hoik ah awn grawng pa yuh nin heue." ⁵ Mawh kheu nan, simiang meung Surix ah nin, "Hu yam in heue, aux sang tiem ti tawx lai tix pheem ka simiang pui Isarela." Neman lih hu mai viex mau kao talantan, khri liah rheng shekhe mai kraung ceep kao jung tau mai tix heue. ⁶ Nawh viex lai an hu ka simiang pui Isarela pa hoik tiem ah nin, "Yam in koe krax keud krax sawn yam bleeh lai in ti hoek ka maix, grawng ploi aux kawncaw tix Neman hoek ka maix, sonsang pon pai maix nawh khaing jhawm saux sipawg nawh heue." ⁷ Yam phat simiang Isarela ka lai an, nawh riah kraung ceep tix ah nin, "Mawh aux Siyiex pa chix kieh pui yum mai pa deeh kieh pui im ju, kheu pui in hoik ploi pui hoek ka aux sonsang pai nawh moi khaing jhawm saux sipawg nawh lie? Mawh kheu nan, yuh buanson jhak ti yax, nawh sawg krax simah simaing ka aux heue." ⁸ Ceu ankix hoik lih ti mawh yam mhong Elishie ka riah simiang Isarela kraung ceep tix nawh ploi pui hu ah nin ka simiang, "Maix hoik riah ti tik kraung ceep tix kheu jao patix lie? Yuh buanson kieh pui

an hoek ka aux mai nawh tak tawng ka koe cao jhai tix kaux ka dau meung Isarela heue." ⁹ Khaix an, Neman lih hu tau mai brung nawh khankix mai khawm linglawx naing brung cie nawh khankix mai nawh cung diang sivix nyiex Elishie heue. ¹⁰ Elishie ploi cao cau tix kaux hoek ka nawh ah nin, "Hu mai heem maix ka dau rawm klawng Yawdan aliah bawg mai nexham maix tak deeh mawh pa mhawm ka son maix mai tokaux maix tak deeh mawh pa singax heue." ¹¹ Viang mawh nan, Neman kied koe krax pa songrhawm nawh deeh veeh ti humai ah nin, "Jhak heue, aux keud ah nin ka dau rhawm tix tete, nawh tak mawh pa caw ti lih hoek ka aux, cung mai kok ka ceukaux Simiang Siyiex, Siyiex nawh mai vuhvied taix tix ka piang dee saux an mai pai ka jhawm saux sipawg aux heue. ¹² Mawh ang rawm klawng Abana mai rawm klawng Phapa pa koe ka dau haktiex Damase, nielheu mhawm khaing can rawm klawng pa koe ka dau Isarela lie? Mawh ang aux pon khoe k tix dau rawm klawng ankix mai deeh pon tix singax lie?" Mawh kheu nan, nawh deeh veeh ti ing khawm songrhawm tix heue. ¹³ Kawncaw nawh khankix greed tix hoek dex mai ah nin ka nawh, "Keeing aux eue, phan cao jhai hoik krai sonsang yuh ceu pa ting lhaong ti ceuceu, mawh ang maix yuh ceu ankix lie? Khaix an, mawh ang maix caw ti yuh ceu pa nielheu khaing an yam ah nawh heem mai deeh mawh pa singax lie?" ¹⁴ Mawh kheu nan, Neman lih hu mai com tokaux tix ka dau rawm klawng Yawdan aliah bawg awm lox pa krai pui Siyiex mai nexham nawh hoik deeh mhawm awm nexham kawncaw nyawm iak tix kaux mai nawh hoik singax heue. ¹⁵ Khaix an, nawh deeh ing ka pui Siyiex tau mai hoek tau mai nawh khankix, kix deeh hoek cung ka plak sivoe nawh ah nin, "Jhak heue, yam in aux tawng ka ang siyiex tang kaux lai koe ka piang haktiex in, lheu khaing dau haktiex Isarela tete, mawh kheu nan, yam in, yuh buanson rieb ti teei totaix in khaing kawncaw maix liak!" ¹⁶ Viang mawh nan, Elishie deeh ah nin, "Awm pa im ju Siyiex, aux tak ang pon ti

rieb tix ceu kawx khaing kaw pa cung aux ti ot sivoe Nawh."Neman baox khin nawh teei kraung ankix, viang mawh nan, nawh thiang kah heue. ¹⁷Neman deeh ah nin, "Phan ang mawh nan, yuh buanson kieh aux kawncau maix deeh tang ti viex tiex baoh tin ing son ra mu la liak. Mawh kheu aux kawncau maix tak ang lai tawx krax tan pa gleeing angah mai krax tan pa appong tix khankix angah ka siyiex tang kaux khankix, lheu khaing Simiang Siyiex heue. ¹⁸ Ka daux ceu inkix, kieh Siyiex pluat phimap kawncau maix yam hu laig yuh cao simiang aux krax krub ka daux nyiex buan Rimmon mai yam nawh neung tix ka piang khawn taix aux, phan aux yaox ti krub ka daux nyiex buan Rimmon mai yam krub aux ka daux nyiex buan Rimmon, yam an kieh Siyiex pluat phimap kawncau maix ka daux ceu inkix heue." ¹⁹ Elishie deeh ah nin ka nawh, "Hu ka daux pa nhim heue." Mawh kheu nan, nawh lih hu khaing nawh mai hoek ka daux pa ang singai tix dah heue.

Rhawm Ghoing Gehazix

²⁰Viang mawh nan, Gehazix siliex Elishie pa mawh pui Siyiex ah nin, "Jhak heue, cao simiang aux deeh ploi Neman, pa mawh pui Surix in mai ang lai cu ti rieb pa viex nawh khankix, khaing daux taix nawh, aux tak to ti hawt khaix nawh mai teei ti cie tix ceuceu khaing nawh heue."²¹ Mawh kheu nan, Gehazix hawt khaix Neman. Yam yaox Neman to nawh ti hawt khaix tix, nawh lih khaing linglawx naing brung tix mai rieb ka nawh ah nin, "Mawh mhawm khawmuik lie?" ²² Gehazix deeh ah nin, "Mhawm khawmuik, cao simiang aux deeh ploi aux deeh hoek ka maix mai nhie aux ah nin, pui awn ju ra kaux pa mawh kawncau simex cub cao jhai khankix taug khraox hoek ka aux ka piang gawng Epharim yam in, yuh buanson tawx mau pa viex maix khankix tix talantan mai kraung ceep pa sang loh kix ra jung liak!" ²³ Neman deeh ah nin, "Yuh buanson teei maix viex mau ra talantan." Nawh khioxkhaw ka nawh mai puag ti sau mau ra talantan daux bau mau ra mu tau mai kraung ceep pa loh kix ra jung mai nawh

tawx ka siliex nawh ra kaux mai kiex klawm ankix hu sivoe nawh heue. ²⁴ Yam hoek kix hawt guh veng, teei ankix mai hu deuh ka daux nyiex, khaix an, nawh deeh kieh kix hu mai kix lih hu heue. ²⁵ Gehazix laig ka daux nyiex mai cung ka plak sivoe simiang tix mai Elishie ah nin ka nawh, "Gehazix eue, mawh hu maix dee mawh lie?" Nawh ah nin, "Siliex maix ang tie hu dee mawx tix heue." ²⁶ Elishie baox deeh ah nin ka nawh, "Mawh ang rhawm aux hu tau mai maix, yam deeh veeh pui an ti lih khaing linglawx naing brung nawh sonsang rieb nawh ti yaox maix lie? Khex mawh bawgyam sonsang rieb mau, rieb kraung ceep, rieb sipeem khaox sanlon, rieb sipeem plix siiet, yung, mawie mai khawm rieb tix siliex simex sibun khankix lie?" ²⁷ Mawh kheu nan, jhawm saux sipawg Neman tak deeh haok ka piang maix mai ka piang doehru khaix khankix leeingju mai Gehazix lih hu khaing plak sivoe ngai nawh khawm hoik pon tix jhawm saux sipawg pa hoik paingawm rawmrha heue.

Moe Sibloe Piang Rawm

6 Cub cao jhai khankix ah nin ka Elishie, "Yam in jhak heue, dee ot yix hoik kied sikhawp heue." ² Yuh buanson kieh yix hu hawt rawm klawng Yawdan liak! Kieh pui kukaux kid khaox khankix khaing tan mai kieh yix yuh dee ot tix dah. Nawh deeh pawk ah nin, "Hu heue." ³ Pui tix kaux ah nin, "Yuh buanson nyhaphrawm hu tau mai siliex khankix liak!" Nawh deeh pawk, "Aux tak sang hu heue." ⁴ Mawh kheu nan, nawh hu tau mai kix, yam hoek kix hawt rawm klawng Yawdan kix gu khaox khankix heue. ⁵ Yam pui tix kaux gu khaox, moe shiao nawh cod daux rawm mai nawh riagyo ah nin, "A...miex eue, simiang eue, moe an mawh kraung pa vai aux heue." ⁶ Pui Siyiex deeh ah nin, "Mawh cod see dee mawx?" Nawh jhi Elishie yaox dee cod moe an, Elishie kid gawng khaox tix gawng mai taing ka dee an mai moe an sibloe piang rawm heue. ⁷ Nawh ah nin, "Sut ti teei an," Nawh nyeu taix tix teei moe an heue.

Pui IsarelaX Giex Pui Dug Ngai Surix

⁸ Yam in simiang meung Surix yuh naing ka meung IsarelaX mai kum tau mai kawncau

nawh khankix ah nin, "Aux tak deuh tab tix baoh tan tix dah dah heue." ⁹Pui Siyiex hoik ploi pui hu ka simiang pui Isarelaax ah nin, "Yuh satix maix, son ang maix pon tiang ti hu see dee in, mawh kheu cub pui Surix khankix lih dung ti hoek tanheue." ¹⁰ Simiang pui Isarelaax deeh ploi pui tix kaux khaing daux kix hu ka dee pa kraai pui Siyiex an ka nawh, mawh kheu nan, nawh tawx satix ka nawh mai nawh pau ti jhak baoh tan, pa hoik tawx nawh satix khankix ang lai joeng mawh tix bawg ra bawg heue. ¹¹ Mawh kheu nan, simiang Surix kied koe krax pa lauxrhawm son grawng ceu inkix mai nawh kok ka kawncau tix khankix ah nin, "Mawh ang pex pon jhi aux yaox pui pa ot plak simiang pui Isarelaax khankix khaing daux cub ex lie?" ¹² Kawn nawh tix kaux ah nin, "O cao Simiang, O! simiang aux eue, ang koe tix kaux kawx, viang mawh nan, cao jhai Elishie pa ot ka daux meung Isarelaax, mawh cao pa kraai gumlox pa hoik sikah maix khankix ka daux lawg it tix ka simiang Isarelaax heue." ¹³ Nawh deeh ah nin, "Hu jiang ti yaox dee ot nawh, aux tak sang ploi pui khankix hu giex ka nawh," Mai koe pui kraai ka nawh ah nin, "Nawh ot ka daux veng Dawtan heue." ¹⁴ Mawh kheu nan, nawh ploi pa ting riang cub pui krunaing linglawx brung mai cub krunaing brung khankix hu tan, kix hoek tan plak pon sawm mai lailawm ka veng heue. ¹⁵ Yam kawncau pui Siyiex kaoh lih ka plak praix ponngawb caocao, nawh yaox ka cub krunaing tix cub lailawm ka veng, tau mai cub krunaing brung, cub krunaing linglawx brung khankix mai kawncau nawh ah nin ka nawh, "A...miexeue, cao simiang eue, sang yuh ex ka mawx lie?" ¹⁶ Elishie pawk ah nin, "Paw lhatgraung, mawh kheu pui pa ot tau mai ex nielheu khaing pui pa ot tau mai kix heue." ¹⁷ Elishie rawgbuan ah nin, "Siyiex eue! aux rawg maix paoh ngai nawh chix yaox liak!" Siyiex paoh ngai pui awn ju an mai nawh jhak hoik yaox gawng lua hoik naog ka brung ngu mai linglawx naing ngu khankix, hawt vungviang Elishie heue. ¹⁸ Yam rob pui Surix khankix ka nawh, Elishie

rawgbuan ka Siyiex ah nin, "Aux rawg Maix kieh pui inkix dug ngai," Nawh Cao kieh kix dug ngai awm lox rawgbuan Elishie heue. ¹⁹ Elishie ah nin ka kix, "In ang mawh krax mai ang mawh veng an, hawtkhaix aux mai aux tak viex pex hoek ka pui sawg pex heue." ²⁰ Ceu ankix lih ti mawh yam hoek kix ka veng Samarix mai Elishie deeh ah nin, "Siyiex eue, paoh Ngai pui inkix kieh kix deeh yaox liak." Siyiex deeh paoh ngai kix mai kix deeh chix yaox khawmuik mai kix tawng ka ot tix ka daux veng Samarix heue. ²¹ Yam yaox simiang Isarelaax ka kix, nawh ah nin ka Elishie, "Keeing aux eue, mawh sang pah aux kix yum lie?" ²² Nawh pawk ah nin, "Maix tak ang pon ti pah kix yum, mawh sang pah maix pui pa pon ti giex ka lawm vaid maix, khawm ka ak maix lie? Tawx kix ih blah mai nyaux rawm mai khaix hoik ih nyaux kix kieh kix deeh ka simiang kix heue." ²³ Nawh khan kheu kix ih priex mai khaix hoik ih nyaux kix, nawh ploi kix ing ka simiang kix, khaix an cub krunaing Surix khankix ang lai hoek ka haktiex pui Isarelaax tix bawg kawx heue.

Pui Surix Lailawm Veng Samarix

²⁴ Khaix hoik ceu inkix, Benhadat simiang haktiex Surix deeh khawm cub krunaing nawh khankix mai lih hu lailawm ka veng Samarix heue. ²⁵ Sibhawm praix pa kied ting koe ka daux veng Samarix mai kix lailawm ka veng an tom hoek ka bawgyam hoik coh kix kaing la tix mu ka mau tixdaix shekhe mai kram tix mawx phuan shekhe heue. ²⁶ Khaix an yam lailing simiang Isarelaax ka piang guh veng, sibun tix kaux riagyo ka nawh ah nin, "Simiang aux eue, teem aux liak." ²⁷ Nawh ah nin, "Phan Siyiex ang teem maix, aux tak pon sawg krax teem son maix khaing dee mawx lie? Mawh pa kaoh khaing daux guang pah nghox lie? Phan ang mawh nan, khaing daux dung biiet rawm plix siiet lie?" ²⁸ Simiang deeh chawk nawh ah nin, "Maix koe krax kharhawm ceu patix lie?" Sibun an deeh pawk lox ah nin, "Bun in ah nin ka aux, tawx kawn simex maix sonsang ih ex ka nawh in singaix mai extak ih kawn simex aux pasax heue." ²⁹ Mawh kheu nan, yix hoik ngaik ti ih kawn

simex aux mai aux ah nin ka nawh ka dauh singaix khaih, tawx kawn simex maix sonsang ih ex nawh, viang mawh nan, nawh mox ka kawn simex tix heue.”³⁰ Yam mhong simiang ka lox sibun an, nawh riah kraung ceep tix mai lailing ka piang guh veng, pui khankix jhak mai yaoh ka ceep nawh chee rhix plak dauh piang tokaux tix heue.³¹ Simiang ah nin, “Phan kaing Elishie kawn simex Shaphat kawn koe ka piang tokaux cao nawh dauh singaix, kieh Siyix nielheu yuh ka aux khaing an heue.”³² Elishie kawn ngawm ka dauh nyiex mai kuad riex ju khankix ngawm tau mai nawh, simiang ploi pui tix kaux hu ka plak sivoe nawh, sivoe sang hoek cao cau an, Eliishie ah nin ka cub kuad riex ju khankix, “Yaoh pex ka kawn simex cao pa pah pui in tix kaux pa ploi pui hoek sonsang kid ti viex kaing aux lie? Jhak! yam hoek cao cau an, nyeeep siviex mai giex nawh dauh diang siviex, an ang mawh lox diang caong simiang nawh pa hoek ka plak khaih nawh lie?”³³ Yam kawn sikhah nawh tau mai kix, cao cau an bleeh ka nawh ah nin, “Krax pa kharhawm in mawh pa kaoh khaing Siyix tete, aux lai kawn krox jun ka Siyix yuh ka mawx lie?”

7 Khaix an, Elishie ah nin, “Nghiet ka gumlox Siyix, Siyix ah yuh nin, yam hoek bawgyam in dauh pasax, phawng gaoh nghox ca tix phliex tak mawh pa coh ka mau tix shekhe mai gaoh nghoxkoi ra phliex tak mawh pa coh ka mau tix shekhe hawt diang siviex veng Samarix heue.² Cao kaing pa hoik een simiang rhawm tix, tix kaux, deeh pawk lox ka pui Siyix ah nin, “Jhak heue, phan Siyix paoh siviex vawng dauh raoma, ceu inkix tak pon ti lih mawh lie?” Pui Siyix deeh ah nin, “Maix tak yaoh ceu ankix ka ngai tix, viang mawh nan maix tak ang yaoh ti ih ceu ankix heue.”

Grawng To Pui Surix

³Pui koe jhawm saux sipawg pon kaux ot ka dauh diang siviex veng mai kix ah nin ka paoh tix tix kaux hoik tix kaux, “Kheu jao patix ex kawn ngawm tin tom yum ex lie?”

⁴Phan ex ah, ex sang laig dauh veng, krax

sibhawm praix hoik koe ka dauh veng mai ex tak yum tan heue. Phan ex ca kawn ngawm tin, ex kawx tee yum heue. Mawh kheu nan, hoek yam in, kieh ex laig ap tix ka dauh cub krunaing pui Surix khankix, phan kix deuh ex im ju, ex tak im ju mai phan kix pah ex yum, ex tak yum heue.⁵ Kix yaog tix hu laig ka dauh tab cub krunaing pui Surix khankix yam kawn faik praix, yam hoek kix ka plak praix tab krunaing Surix, kix daoxdeng kheu ang kix lai yaoh pui tix kaux kawx tan heue.⁶ Kheu hoik kieh Siyix cub krunaing pui Surix mhong lox sinum linglawx naing brung mai lox sinum cub krunaing brung khankix mai lox sinum cub krunaing ting, kix ralai ah nin ka paoh tix, “Jhak heue, simiang pui Isarelahoikvai cub simiang pui Hetax mai cub simiang Ejiptux khankix hoek puing ka ex heue.”⁷ Mawh kheu nan, kix yaog ti to sonsang klawd ju tix, yam kawn vuvi praix mai kix prah nyiex goh tix, brung tix, la tix mai tab tix khawmuik heue.⁸ Yam hoek cub pui saux sipawg inkix ka plak praix tab, kix laig ka dauh nyiex gox tix lhang, ih, nyaux mai teei ti viex mau, khri mai kraung ceep khankix khaing tan mai hu mox ceu ankix, khaih an, kix deeh hoek mai baoh laig ka dauh nyiex gox tangdah baoh teei ti viex kraung khrai tang ceu khankix tixblah khaing tan mai baoh deeh hu mox ceu ankix heue.⁹ Khaix an, kix ralai ah nin ka paoh tix, pa yuh ex ang lai mawh ceu pa mhawm, singaix in mawh singaix koe lox satang pa mhawm mai ex chix kawn ot yienyawg yuh nin, phan ex pau ti ot tin tom hoik rieng praix plak ponngawb, krax pa ciyang tak hoek ka piang ex, mawh kheu nan, yam in hoek heue, kieh ex hu kraik inkix ka pui doeh nyiexma simiang khankix heue.¹⁰ Kheu nan, kix hu kok ka cao pau diang siviex veng khankix mai kraik ka kix ah nin, “Yix hoik hu ka dauh tab pui Surix khankix mai daoxdeng ka ang pui lai ot tan tix kaux kawx, ang lai mhong lox pui, mawh ngie brung mai la pa phiawk ti deuh mai nyiex gox pa ang nyang laux khankix heue.”¹¹ Cub cao pau diang siviex khankix kokyo lox tix mai kix hu kraik ankix ka dauh nyiex simiang heue.¹² Khaix an, simiang yaog ti kaoh ponsawmah

nin ka kawncau tix khankix, “Yam in kieh aux kraï pex mhong grawng ceu pa hoik yuh pui Surix khankix ka ex, kix tawng ka hoik cairhawm ex, mawh kheu kix lih hu plak praix tab sonsang hu mox tokaux tix ka daux tiag ah nin, yam lih kix khaing daux veng, ex giex im kix mai laig ka daux veng heue.”¹³ Ka daux kawncau nawh khankix tix kaux pawk lox ah nin, “Yuh buanson kieh pui hun khankix deeh ing teei brung pa kawm deuk ankix phuan mu, pa hoik prah kix ka daux veng liak! Brung ankix tak lih ti awm pui Isarelaax pa kawm deuk ka daux veng, phan ang mawh nan, aux kraï lox tete brung ankix tak sang awm cub pui hun pui Isarelaax pa deuk khaing ceu ankix pa hoik lauxleeng, mawh kheu nan, kieh exploi kix hu jhak heue.”¹⁴ Kix teei ti viex linglawx naing brung ra lhang mai simiang ploi kix hu ka plak dee ot cub krungaing pui Surix ah nin, “Hu jhak ti yaox heue.”¹⁵ Kix hu hawt khaix kix tom hoek ka rawm klawng Yawdan kix yaox hoik naog kraung ceep kix mai kraung naing kix ka pa hoik tikvud pui Surix ka hawt sidah krax khawmuik yam niied kix ti to, cao cau khankix deeh ing kraï ankix ka simiang heue.¹⁶ Khaix an, pui khankix lih hu rhim ti teei nyiex gox pui Surix, mawh kheu nan, phawng gaox nghox ca tix phliex coh tix ka mau tix shekhe mai gaox nghoxkoi ra phliex coh tix shekhe awm gumlox pa hoik ah Siyiex heue.¹⁷ Simiang yaog ti deuh cao kaing tix kaux ka pui pa een nawh rhawm tix, sonsang teei nawh beeh glawm pau diang siviex, viang mawh nan, pui khankix hoik dig ka nawh daux diang siviex mai nawh yum awm pa hoik kraï pui Siyiex, yam lih hoek simiang ka nawh heue.¹⁸ Awm pa hoik ah pui Siyiex ka simiang yuh nin, “Daux bawgyam in pasax daux diang siviex veng Samarix, gaox nghoxkoi ra phliex mawh pa coh tix shekhe mai phawng gaox nghox ca tix phliex mawh pa coh tix shekhe heue.”¹⁹ Khaix an, cao kaing deeh pawk lox ka pui Siyiex ah nin, “Yam in jhak heue, phan Siyiex paoh siviex vawng khankix daux raoma, ceu inkix tak pon ti lih mawh lie?” Nawh dee ah nin, “Aux kraï lox

tete! Maix tak yaox ceu ankix ka ngai tix, maix tak ang yaox ti ih ceu ankix heue.”²⁰ Mawh kheu hoik dig pui veng ka nawh daux diang siviex, nawh yum heue.

8 Haktiex Cie Sibun Veng Shunam

8 Khaix an Elishie sikah ka sibun pa hoik deeh kieh kawm simex nawh deeh im ah nin, “Maix kaoh hu mai khrawm pui daux nyiexma maix, hu peung ka dee sang pon peung maix ti ot tix dahdah, mawh kheu Siyiex hoik tawm pa sang koe krax sibhawm praix, lheu khaing an krax sibhawm praix tak lih ti koe ka piang haktiex in aliah num heue.”² Mawh kheu nan, sibun an yaog ti kaoh mai yuh ceu ankix awm pa hoik ah pui Siyiex mai nawh lih hu tau mai pui daux nyiexma tix khankix mai hu peung ka daux haktiex Philitix aliah num heue.³ Khaix hoik sidah aliah num, sibun an deeh ing khaing haktiex Philitix mai nawh hu khioxkhaw mhaing nyiex nawh mai haktiex nawh ka simiang heue.⁴ Yam an simiang kraï lox tau mai Gehazix siliex pui Siyiex ah nin, “Yuh buanson kraï aux mhong ceu pa kied ting kied lhaong pa hoik yuh Elishie liak!”⁵ Nawh kraï grawng pa hoik kieh pui yum deeh im ka simiang mai grawng hoek sibun pa hoik kieh kawm simex kiex deeh im, sang khioxkhaw ka simiang, son grawng nyiexma kiex mai haktiex kiex mai Gehazix deeh ah nin, “Cao simiang mai simiang aux eue, in mawh sibun pa hoik deeh kieh Elishie kawm simex kiex deeh im heue.”⁶ Yam chawk simiang ka sibun an, kiex deeh kraï simiang mhong grawng ankix khawmuik, mawh kheu nan, simiang yaog ti deuh cao kaing son kiex ah nin, “Deeh tawx canceu pa mawh cie kiex khawmuik mai deeh sawn ti tawx canceu plix pa lih khaing tong kaung kiex khankix, jah khaing daux singaix hoik lih hu kiex khaing daux haktiex in tom hoek yam in heue.”

Hazalax Mawh Simiang Surix

⁷ Khaix an, Elishie hu ka veng Damase mai Benhadat simiang haktiex Surix saux mai kix kraï gawng hoek pui Siyiex ka nawh ah nin, “Pui Siyiex hoik hoek tin heue.”⁸ Simiang ah nin ka Hazalax, “Teei ti viex totaix mai hu ti yaox ka pui Siyiex mai kieh chawk ti yaox ka

Siyiex ah nin, mawh sang deeh pon moi aux khaing jhawm saux in lie?" ⁹Mawh kheu nan, Hazalax lih hu sonsang yaox tix ka nawh mai nawh teei ti viex totaix ceu pa mhawm khankix khaing daux veng Damase mai tang piang kala-uk tixpon mu mai nawh hoek cung sivoe nawh ah nin, "Kawn simex maix Benhadat simiang haktiex Surix ploï aux hoek ka maix ah nin, mawh sang deeh pon moi aux khaing jhawm saux in lie?" ¹⁰Elishie deeh ah nin ka nawh, "Hu kraï ka nawh maix tak deeh pon moi tete," Viang mawh nan, Siyiex hoik jhi aux yaox ka tak sang yum nawh tete heue. ¹¹Nawh jeung ngai tix jhak ka nawh, tom hoik kaig nawh mai pui Siyiex yiiem heue. ¹²Hazalax ah nin, "Simiang aux yiiem kheu jao patix lie?" Nawh deeh pawk ah nin, "Mawh kheu aux tawng ka pa caoxcaig pa tak sang yuh maix ka kawn praix pui Isarelix khankix maix tak gleeing ka dee kauxcong kix ka ngu, maix tak pah ka pui awn ju kix yum ka vaid, maix tak blap kawn nyawm ka piang tiex mai maix tak pih vaig sibun pa koe kaux khankix heue." ¹³Mawh kheu nan, Hazalax deeh ah nin, "Mawh mawh nawh sox nawh tom sang pon yuh grawng see pa ting yuh nin lie?" Elishie deeh pawk lox ah nin, "Siyiex hoik jhi aux yaox, ka pa tak sang pon maix ti mawh simiang piang haktiex Surix heue." ¹⁴Khaix an, Hazalax lih hu khaing Elishie mai deeh ing hoek ka simiang nawh mai simiang nawh chawk ah nin, "Hoik ah Elishie ceu patix ka maix lie?" Nawh deeh pawk ah nin, "Nawh hoik kraï aux mhongka tak sang moi maix tete heue." ¹⁵Ka daux singaix khaix, nawh teei man pu tix pheen cub ka rawm mai kheem ka piang ngai simiang, khaix an, simiang yum mai Hazalax plud ti kuang haktiex ka dahdee ot nawh heue.

Yehoram Kuang Yudax (2Been 21:1-20)

¹⁶ Ka daux num hoik kuang Yoram kawn simex Ahap simiang pui Isarelix khankix daux phuan num, Yehoshaphat mawh simiang ka daux haktiex meung Yudax, khaix an Yehoram kawn simex Yehoshaphat jah ti yuh simiang ka daux haktiex meung Yudax heue. ¹⁷Nawh

koe ju tixngoe ra num, yam yaog nawh ti mawh simiang, nawh kuang ka daux veng Yerusalieim daix num heue. ¹⁸Nawh hu ka daux krax pa hoik yuh cub simiang pui Isarelix khankix, awm krax pa yuh daux nyiexma Ahap, mawh kheu nawh teei ti moeng kawn sibun Ahap mai nawh yuh ceu pa caoxcaig sivoe ngai Siyiex heue. ¹⁹Siyiex tak ang lai yuh meung Yudax lauxleeing, kheu jao min ceukaux siliex nawh simiang Davit, awm hoik tawx Nawh Cao sijax mukheu ka nawh sonsang ang kaww ngu pa riieng Nawh Cao lai jud ka daux kawn simex nawh khankix leeingju heue. ²⁰Glang bawgyam singaix kuang nawh, meung Edom yaog tix tiehfeen ka simiang Yudax mai kix tang deeh yaog simiang tix kaux ka piang kix heue. ²¹Yoram lih hu ka veng Zairax tau mai linglawx naing brung nawh khankix mai nawh yaog ti kaoh ponsawm mai puing ka pui Edom khankix pa lailawm ka nawh mai cub cao kaing naing linglawx naing brung khankix, viang mawh nan, pui Edom khankix hoik tangto ka plak nyiex gox ot tix heue. ²²Pui Edom hoik tiehfeen ka meung Yudax tom hoek daux in singaix mai meung Libanax deeh yaog ti tiehfeen ka kix ka daux bawgyam an heue. ²³Grawng kaing pa deuk simiang Yoram mai canceu pa yuh nawh khankix, ang mawh pa tiem ka daux phuk lai grawng been simiang meung Yudax lie? ²⁴Yoram lauxlee tix tau mai taxdu nawh mai sipaung tau mai keeing nawh ka daux veng Davit, khaix an, kawn simex nawh Ahaziyax hoik deeh plud ti kuang khaix dee ot nawh heue.

Ahaziyax Kuang Yudax (2Been 22:1-6)

²⁵ Ka daux num yam kuang Yoram kawn simex Ahap simiang meung Isarelix kao ra num, Ahaziyax kawn simex Yehoram simiang meung Yudax hoik jah ti kuang ka haktiex heue. ²⁶Ahaziyax koe ju tixnga ra num yam mawh nawh simiang, nawh kuang ka daux veng Yerusalieim tix num, ceukaux miex nawh mawh Athaliyax kawn saux sibun Onerix simiang meung Isarelix heue. ²⁷Nawh hu ka daux krax pa hoik yuh Ahap mai hoik yuh ceu pa caoxcaig sivoe ngai Siyiex awm pa hoik

yuh paox nyiexma Ahap khankix, kheu jao mawh nawh kheue Ahap heue. ²⁸ Nawh hu tau mai Yoram kawn simex Ahap sonsang yuh naing ka Hazalax, simiang meung Surix ka daux veng Ramot haktiex Gilat mai pui Surix hoik kieh Yoram mat heue. ²⁹ Khaix an, simiang Yoram deeh ing ka veng Yezerelax sonsang pai dee mat tix khaing cub pui Surix hawt veng Ramax, yam hu puing nawh ka Hazalax simiang haktiex Surix mai Ahazyax kawn simex Yehoram simiang meung Yudax, lih hu jhak Yoram kawn simex Ahap ka daux Yezerelax, mawh kheu saux nawh heue.

Groi Bee Piang Yehu

9 Cao jhai Elishie kok kawn simex cao jhai tix kaux mai ah nin ka nawh, “Nhawt nyoi maix, teei kaw k bee in ka daux taix maix mai hu ka daux veng Ramot haktiex Gilat heue.” ² Yam hoek maix ka dee an, sawg ti yaox Yehu kawn simex Yehoshaphat, kawn simex Nimashi mai laig ka dee ot nawh mai kieh nawh yaog ti kaoh hu khaing paoxgrawm tix khankix mai viex nawh laig ka daux lawg plak daux awx. ³ Khaix an, teei kaw k bee viex maix maigroi ka piang kaing nawh ah nin, “Siyiex ah nin, Aux hoik groi bee ka piang maix mai yaog maix mawh simiang ka piang pui Isarelax, khaix an, paoh siviex mai to, paw lai nhim liak.” ⁴ Mawh kheu nan, cao jhai pui awn ju an lih hu ka veng Ramot haktiex Gilat heue. ⁵ Yam hoek nawh tan, cao kaing krungaing khankix ngawm ti kum tau mai nawh ah nin, “Cao kaing krungaing khankix eue, aux koe lox krai ka pex.” Mai Yehu deeh ah nin, “Mawh pui mawx ka daux pui yix lie?” Nawh deeh ah nin, “Cao simiang krungaing ting eue, mawh maix heue.” ⁶ Khaix an, Yehu kaoh mai laig ka daux nyiex mai cao jhai groi bee ka piang kaing nawh mai ah nin ka nawh, “Aux hoik groi bee ka piang kaing maix mai yaog maix mawh simiang ka piang ceu pui Siyiex, pui Isarelax khankix heue. ⁷ Maix tak pah doeh nyiexma cao simiang maix Ahap sonsang pon aux tix pawk bix tang nham siliex cao jhai Aux khankix mai nham siliex Siyiex khankix, ka daux Yezabelax heue. ⁸ Mawh kheu doeh

nyiexma Ahap khawmuik taklauxleeing. Aux tak teei ti tik simex ka daux pui Isarelax khankix mai khawm pa ot ka plak praix khaing Ahap heue. ⁹ Mawh kheu nan, Aux kieh doeh nyiexma Ahap awm doeh nyiexma Yerobom kawn simex Nebat mai tak baoh kieh awm doeh nyiexma Basha kawn simex Ahiyax heue. ¹⁰ Sox tak ah nex Yezabelax ka daux guang haktiex veng Yezerelax mai pui pa sipaung tokaux yum kiex angkoe mai nawh paoh siviex mai to heue.” ¹¹ Yehu lih hoek ka kawncau cao simiang tix khankix mai an tix kaux ah nin ka nawh, “Mhawm khawmuik lie? Pui yhot in hoek ka maix kheu jao grawng patix lie?” Yehu ah nin ka kix, “Pex tawng ka pui an mai tawng ka lox ceu pa sikah nawh heue.” ¹² Kix ah nin, “An mawh lox pielhen, maix krai ka yix tete,” Nawh ah nin, “Nawh kraiyuh nin ka aux, ka lox pa ah nin, Siyiex ah yuh nin, Aux hoik groi bee ka piang kaing maix mai yaog maix mawh simiang ka piang pui Isarelax heue.” ¹³ Pui kukaux niied ti peeik kraung ceep tix mai tawm ka piang glaw k bawng greem caong Yehu mai kix phlu teettawng mai ah nin, “Yehu mawh simiang heue.”

Yehu Pah Yoram Yum

¹⁴ Mawh kheu nan, Yehu kawn simex Yehoshaphat pa mawh kawn simex Nimashi tiehfeen ka Yoram, mawh kheu jao Hazalax simiang haktiex Surix, Yoram mai pui Isarelax khawmuik hoik tiebtie ka veng Ramot haktiex Gilat heue. ¹⁵ Simiang Yoram deeh ing ka veng Yezerelax sonsang pai nawh mat tix, pa hoik mat nawh khaing pui Surix yam hu puing nawh ka Hazalax simiang haktiex Surix heue. Yehu ah nin, “Phan pex khawrhawm tete, paw kieh pui bhoek ti klawd ti kaux kaw k khaing daux veng, sonsang hu krai nawh grawh grawng ankix ka veng Yezerelax heue.” ¹⁶ Yehu brug linglawx naing brung hu ka veng Yezerelax, mawh kheu Yoram nyat tix tan mai Ahazyax simiang meung Yudax hoek sonsang jhak tix ka Yoram heue. ¹⁷ Koe cao pau veng tix kaux cung ka piang nyiex pau ka daux veng Yezerelax mai nawh yaox cub pui Yehu khankix ah nin, “Aux yaox cub pui khankix tix cub heue.” Yoram deeh ah nin,

“Kok ka pui naing brung tix kaux mai ploi nawh hu rieb ka kix mai kieh nawh ah nin, koe pa nhim lie?”¹⁸ Mawh kheu nan, pui naing brung hu rieb ka kix mai ah nin, “Simiang ah yuh nin, koe pa nhim lie?” Yehu deeh ah nin, “Pa nhim koe, ang koe mawh sang yuh maix patix ka lie? Veeh maix hawt khaix aux khaing heue.” Pui pa pau ti jhak deeh kraikrawh grawng an ah nin, “Cao cau hoik hu ka kix tan, viang mawh nan, nawh ang nyang bax hoek heue.”¹⁹ Simiang baox ploi pui naing brung ra kaux tix kaux hu mai hoek ka kix ah nin, “Simiang ah yuh nin, koe pa nhim lie?” Yehu pawk ah nin, “Pa nhim koe, ang koe mawh sang yuh maix patix ka lie? Deeh veeh maix hawt khaix aux khaing heue.”²⁰ Pui pau kraikrawh an ka simiang ah nin, “Nawh hoik haok ka kix mai ang nyang bax hoek khaing tan mai linglawx naing brung hawh nawh awm pa hawh Yehu kawm simex Nimashi mai nawh hawh kied sidaing phai heue.”²¹ Yoram ah nin, “Khrierien tix heue.” Mai kix khrierien linglawx naing brung, khaix an, Yoram simiang pui Isarelaix mai Ahaziyax simiang meung Yudax lih hu tau mai linglawx naing brung cie kiex mai lih hu rieb ka Yehu mai kix sipub nawh ka biang haktiex Nabok pui veng Yezerelax heue.²² Khaix an, yam yaox Yoram ka Yehu ah nin, “Yehu eue, koe pa nhim lie?” Yehu deeh pawk ah nin, “Pa nhim lai koe yuh ka mawx? Miex maix hoik yuh ceu pa ludvao mai kaing ceu pa khi nieding niedod heue.”²³ Yoram deeh veeh mai to tix ing mai ah nin ka Ahaziyax, “An mawh krax pa tiehfeen heue.”²⁴ Yehu sau riang tix vaik ak tix puing ka Yoram mai krox ka plak khaix see sinax klip nawh mai goh ka dauh linglawx naing brung tix heue.²⁵ Yehu ah nin ka cao kaing naing tix Bidaka, “Sileed ti tik nawh ka dauh biang haktiex Nabok pui veng Yezerelax mai kieh maix dohkeud kah, yam brug maix linglawx brung tau mai aux ka plak khaix keeing nawh Ahap, Siyiex hoik kraikrai ti deuh krax ciyang in ka piang nawh heue.²⁶ Aux yaox nham Nabok mai nham kawm simex nawh kawx, Siyiex ah

nin, Aux tak pawk bix ka maix dauh biang haktiex in, in mawh pa hoik kraikrai Siyiex heue. Mawh kheu nan, yam in teei nawh mai tik ka biang haktiex in, awm gumlox pa hoik tawm Siyiex heue.”

Yehu Pah Ahaziyax Yum (2Been 22:7-9)

²⁷ Yam yaox Ahaziyax simiang meung Yudax ka ceu in, nawh to hu ka krax Biethagan dauh sipeem tauh, mawh kheu nan Yehu hawt pheet nawh ah nin, “Puing nawh ka dauh linglawx naing brung.” Mai kix hawt puing nawh mat ka blaong veng Gurax hawt veng Ibalam, khaix an, nawh to ka veng Megidaw mai yum tan heue.²⁸ Kawncau nawh khankix tang nawh dauh linglawx naing brung ing ka veng Yerusalem mai sipaung nawh ka dauh simeeig taxdu nawh ka dauh veng Davit heue.²⁹ Ka dauh num yam kuang Yoram kawm simex Ahap ka haktiex kao tix num, Ahaziyax deeh yaog ti mawh simiang ka piang meung Yudax heue.

Grawng Yum Yezabelax

³⁰ Yam hoek Yehu ka dauh veng Yezerelax, Yezabelax mhong ka grawng ceu an mai Yezabelax kraix sidah bhawng mai sat hauk kaing tix mai kok jhak ka plak praix khaing dauh siviex vawng heue.³¹ Yam laig Yehu dauh diang siviex, Yezabelax ah nin, “Koe pa nhim ka Zimarix pa pah cao simiang tix lie?”³² Yehu maong ti jhak ka dauh diang siviex vawng ah nin, “Mawh pui mawx pa ot plak aux lie? Mawh pui mawx lie?” Pui sieh ra loe kaux kok jhak nawh khaing dauh siviex vawng heue.³³ Yehu ah nin, “Cot nawh rau!” mawh kheu nan, kix cot nawh rau mai nham nawh hoik phrit ka guh veng mai ka piang brung mai brung hoik dugdig nawh heue.³⁴ Yam laig nawh plak dauh, nawh hoik ih nyaux, khaix an, nawh ah nin, “Hu yam in, jhak pex sipaung ka sibun pa hoik pon pa jhaxlawg in, mawh kheu mawh kiex kawm sibun simiang tix kaux heue.”³⁵ Mawh kheu nan, kix hu sipaung ka nawh, viang mawh nan, kix ang yaox tokaux nawh, lheu khaing si-ang kaing mai caong mai taix nawh heue.³⁶ Kix deeh hoek kraikrai ka nawh mai Yehu ah nin, “In mawh gumlox Siyiex pa hoik kraikrai Nawh Cao ka kawncau Nawh Eliyax pui veng Tishabix pa ah nin, sox khankix tak ih nex Yezabelax, ka

biang haktiex Yezerelax heue.”³⁷Tokaux yum Yezebelax tak mawh pa awm aing ka dauv tong kaung biang haktiex Yezerelax tom ang kix lai ponti ah nin, “In mawh Yezebelax heue.”

10 Yehu Yuh Nyiex Ahap Lauv

Ahap koe kawn simex atixgliah kauv dauv veng Samarix, Yehu tiem lai tawx hu ka veng Samarix mai ka cao kuang ka veng Yezerelax mai kuad riexjukhankix mai kapui pa eei ka kawn simex Ahap khankix ah nin, ² “Yam in awm hoik koe kawn simex cao simiang pex khankix tau mai pex mai pa koe linglawx naing brung pex khankix mai brung pex khankix mai veng pa kauvcong mai pa koe kraung naing pex khankix, mawh kheu nan, yam hoek lai in ka pex, ³ laug ti teei kawn simex pa kied mhawm pa kied khaw cao simiang pex mai kieh nawh ngawm ka piang danggeung keeing nawh mai puing naing son doeh nyiexma cao simiang pex heue.” ⁴ Kix kied koe krax lhatgraung ah nin, “Simiang ra kauv ang lai pon cung plak sivoe nawh mai ex sang pon cung yuh ka mawx lie?” ⁵ Pa mawh cao kaing ka dauv nyiexma mai pa mawh cao kaing ka dauv veng mai kuad riex ju an khankix mai pui pa eei kawn simex nawh ploi pui hu ka Yehu ah nin, “Yix mawh siliex maix, yix tak sang yuh canceu pa kraik maix ka yix khawmuik mai yix tak ang lai yaog pui tix kauv kawx mawh simiang mai yix tak yuh canceu pa khawcaw ka rhawm maix heue.” ⁶ Khaix an Yehu baov tiem lai ka kix ra bawg tix bawg ah nin, “Phan pex mawh pui aux mai cu nghiet lox aux dauv bawgyam in pasax, teei kaing pui anki pa mawh kawn simex cao simiang pex mai hoek ka aux dauv veng Yezerelax,” Yam an kawn simiex simiang khankix atixgliah kauv koe tau mai pui ting khankix pa hoik eei ka kix dauv veng heue. ⁷ Yam hoek lai an ka kix, kix teei kawn simex simiang khankix mai pah kix yum khawm atixgliah kauv mai sau kaing kix ka dauv khrawng mai tawx hoek ka dauv veng Yezerelax heue. ⁸ Khaix an, pui cau khankix hoek ka Yehu ah nin, “Kix hoik viex kaing kawn simex simiang khankix hoek heue.” Yehu ah nin, “Pum ti deuh ra

pum hawt diang laig dauv siviex veng tom hoek ponngawb heue.” ⁹ Ka dauv ponngawb, Yehu lih hu ka plak praix mai cung ah nin ka pui khankix, “Pex mawh pa rahsee heue. Aux hoik tiehfeen ka cao simiang tix mai hoik pah nawhyum, viangmawh nan, mawh pui mawx pa hoik pah ka pui inkix khawmuik lie?” ¹⁰ Deuh pex tawng gumlox Siyiex pa hoik sikah Nawh Cao ka grawng pa dexdawd mai doeh nyiexma Ahap khankix tak ang mawh pa giexgoing tix gum kawx, mawh kheu Siyiex hoik yuh ceu an awm pa hoik kraik Nawh cao ka siliex Tix Eliyax heue.” ¹¹ Mawh kheu nan, Yehu hoik pah ti tik pui pa kawn deuk khaing doeh nyiexma Ahap khawmuik ka dauv veng Yezerelax mai khawm pui ting lhaong nawh mai paoxgrawm pa kied dex mai nawh mai cao giex kaing li khankix tom ang lai prah kix deuk tix kauv kawx heue.

Puxaik Ahaziyax Yum Tixpon Ra Kauv

¹² Yehu yaog ti kaoh mai hu ka veng Samarix, dauv krax yam hoek nawh ka veng Bietekedax ka dee ot cub cao liang yung khankix. ¹³ Yehu sipub ka cub puxaik Ahaziyax simiang meung Yudax mai chawk kix ah nin, “Mawh pex pui mawx lie?” Mai kix deeh pawk ah nin, “Yix mawh cub puxaik Ahaziyax, yix lih hoek ti yaov ka kawn simex simiang khankix mai ka kawn simex lauxsimiang khankix heue.” ¹⁴ Yehu ah nin, “Giex im kix heue.” Mawh kheu nan, kix tom giex im kix tixpon ra kauv mai pah kix yum hawt rawm dauv veng Bietekedax mai nawh ang lai prah kix deuk tix kauv kawx heue.

Pah Nyiexma Ahap Yum

¹⁵ Yam lih hu nawh khaing tan, nawh sipub ka Yehonadat kawn simex Rekhap, hoek ti rieb nawh mai ah nin, “Mawh koe rhawm rahsee maix ka aux awm koe pa rahsee aux ka piang maix lie?” Yehonadat deeh pawk ah nin, “Mawh heue.” Yehu deeh ah nin, “Phan mawh nan, yaov taix maix ka aux mai Yehu tok nawh haok mai tix dauv linglawx naing brung heue.” ¹⁶ Khaix an, nawh ah nin, “Hu tau mai aux, jhak ti yaov krax pa kied koe rhawm aux ka son Siyiex.” Mawh kheu nan, kix kieh nawh ngawm piang linglawx naing

brung tau mai nawh heue. ¹⁷Yam hoek nawh ka veng Samarix, nawh pah can pui pa kawm deuk khaing daux doeh nyiexma Ahap khawmuik pa ot ka daux veng Samarix tom hoik lauxlak pakleeing kix awm gumlox Siyiex pa hoik krai Nawh Cao ka Eliyax heue.

Yehu Pah Pui Pa Krub Balax Yum

¹⁸ Khaix an, Yehu khrawm cub pui hun khawmuik mai ah nin ka kix, "Ahap yuh kaing jhaw Balax ceeix ngie khaing, viang mawh nan, Yehu tak sang yuh kaing jhaw nawh tomnie heue. ¹⁹Yam in kok cub cao jhai Balax khawmuik mai kawncau nawh khawmuik mai cub cao giex kaing li nawh khawmuik hoek ka aux, paw kieh deuk tix kaux kawx, mawh kheu aux koe krax tan appong pa tingka Balax, can pui pa ang hoek khankix tak ang lai deuh kix im, viang mawh nan, Yehu hoik yuh cuyi tau mai pa keud nawh ti sang pah pui pa krub Balax khankix lauxleeing heue." ²⁰ Yehu ah nin, "Baox coxkhe krax yuh pa krub ka son Balax," Mawh kheu nan, kix pao krai ka grawng an heue. ²¹ Khaix an Yehu ploi pui hu kudah kudee ka daux haktiex Isarelaix mai pui pa krub ka Balax khankix hoek khawmuik, ang koe pui deuk pa ang hoek tix kaux kawx, mawh kheu nan, kix hoek ka daux nyiex siyiex Balax mai pui hoik naog ka daux nyiex siyiex Balax jah ka daux plak in tom hoek plak an heue. ²² Yehu ah nin ka cao kaing pa priex kraung ceep, viex kraung ceep ankix tawx ka son pui pa krub ka Balax khankix, mawh kheu nan, nawh viex kraung ceep an tawx son kix heue. ²³ Khaix Yehu mai Yehonadat kawm simex Rekhap laig ka daux nyiex siyiex Balax mai ah nin ka pui pa krub Balax khankix, "Sawg mai jhak paw lai kieh kawncau mau soi Siyiex koe tin tau mai pex mai kieh mawh ngie pui pa krub ka Balax pa koe tin nongnong heue." ²⁴ Kix laig ka daux sonsang tan krax tan pa appong mai krax tan pa gleeing, Yehu hoik deuh pui tidaix kaux ka plak praix ah nin, "Phan pui ankix pa hoik ap aux ka daux tawm taix pex tix kaux kaux pon ti glawd mai pui pa kieh

nawh glawd, tak deeh plud ju son ju pui an heue." ²⁵ Yam hoik tan nawh krax tan pa gleeing, khaix an, Yehu ah nin ka pui pa pau diang khankix, "Laig ka plak daux mai pah kix, paw kieh pui tix kaux kawx pon ti lih plak praix." Mai pah kix yum ka lawm vaid, khaix an cub cao pau diang mai cub cao kaing naing khankix teei ti tik kix lih mai laig tom ka daux lawg nyiex siyiex Balax heue. ²⁶ Kix viex rieanggrang ankix lih khaing nyiex siyiex Balax mai gleeing heue. ²⁷ Khaix an, kix raig rieanggrang mai yieh nyiex siyiex Balax mai yuh dee an mawh nyiex aing tom hoek daux in singaix heue. ²⁸ Awm an Yehu hoik yuh Balax lauxleeing khaing daux haktiex Isarelaix heue. ²⁹ Viang mawh Yehu ang lai veeh tix singai khaing phimap pa yuh Yerobom kawm simex Nebat mai pa hoik kieh pui Isarelaix khankix lud ka rieang kawm mawie khri pa ot ka daux veng Betelaix mai veng Dan heue. ³⁰ Siyiex ah nin ka Yehu, "Kheu jao yuh maix ceu pa mhawm mai ceu pa khawcaw ka daux ngai Aux mai maix hoik yuh ceu ankix ka doeh nyiexma Ahap ka ceu pa khaw ka daux rhawm Aux khawmuik, kawm simex maix khankix tak yaox ti ngawm ka piang dangngeung pui Isarelaix tom hoek pon ju heue." ³¹ Yehu ang lai cu ti hawt khaix lox been Siyiex Isarelaix tau mai khawm rhawmrih tix khawmuik, mawh kheu ang nawh cu ti gah khaing phimap pa hoik yuh Yerobom, pa hoik kieh pui Isarelaix khankix lud heue.

Grawng Yum Yehu

³² Ka daux bawgyam singaix ankix, Siyiex hoik jah ti goih haktiex Isarelaix mai Hazelaix hoik pex ka dahdee pa hoik kuang pui Isarelaix khawmuik, ³³ Jah khaing plak toh rawm klawng Yawdan mai haktiex Gilat khawmuik, dee ot pui Gilat, pui Rubin mai pui Manashe khankix, jah khaing veng Araw hawt rawm klawng Anon mai khawm haktiex Gilat haktiex Bashan khawmuik heue. ³⁴ Yam in, grawng kaing pa kawm deuk Yehu mai canceu pa yuh nawh khawmuik mai pa hoik koe riang rao nawh khawmuik, ang hoik mawh pa tiem tix ka daux phuk lai grawng been cub simiang pui Isarelaix lie? ³⁵ Mawh kheu nan, Yehu hoik

lauxlee tix tau mai taxdu nawh khankix mai kix sipaung nawh ka dauh veng Samarix, khaix an kawn simex nawh Yehohaza deeh plud ti kuang ka dahdee ot nawh heue. ³⁶ Bauxyam kuang Yehu ka pui Isarelaux dauh veng Samarix koe tixnga daix num heue.

Athaliyax Kuang Haktiex Yudax

(*2Been 22:10, 23:21*)

11 Yam yaox Athaliyax miex Ahaziyax ka yum kawn simex tix, kiex yaog ti kaoh yuh doeh nyiexma simiang lauxleeing khawmuik heue. ² Viang mawh nan, Yehoshebax kawn sibun simiang Yoram nan Ahaziyax hoik briex teei Yosha kawn simex Ahaziyax mai hu dee singai khaing dauh sinax cub kawn simex simiang khankix ka pa sang pah kix nawh yum mai kix mox nawh tau mai miex pa kiangiien ka nawh ka dauh lawg it, khaing Athaliyax sonsang ang kix pon pah nawh yum heue. ³ Mawh kheu nan, nawh hoik mox tix tau mai miex pa kiangiien nawh ka dauh nyiex buan Siyiex liah num glang kuang Athaliyax ka haktiex heue.

Yosha Ceep Mhok Khri

⁴ Ka dauh aliah num tix num, Yehoyadax ploix pui hu kok ka cao kaing naing pa kuang lien tixyieh khaing dauh cub lien cao pa pau nawh mai khaing dauh cub lien cao pa pau veng khankix, hoek ka dauh nyiex buan Siyiex mai nawh yuh sijax mukheu tau mai kix mai kieh kix tiexu tix ka dauh nyiex buan Siyiex mai jhi kix yaox kawn simex simiang heue. ⁵ Khaix an, nawh tawm lox ka kix ah nin, "In mawh pa tak sang caw pex ti yuh ka dauh pex loe son tix son, pa hoek ti teei beeh glawm ka dauh singaix tuah, tak mawh pa khrierien ka nyiex haw simiang heue. ⁶ Loe son tix son tak mawh pa pau diang siviex Surax mai loe son tix son tak mawh cao pa pau diang siviex ka plak khaix cub lien cao pa pau veng khankix, pex tak mawh cao pa priexrien ti kiangiien ka nyiex haw sonsang ang hoek krax laux heue. ⁷ Khaing ka dauh pex ra cub, pa hoik pluat beeh glawm tix khaing dauh singaix tuah, tak mawh cao pa priexrien tix jhak ka nyiex buan Siyiex son simiang heue. ⁸ Pex tak ot rawbrim simiang ku daog ku dawn tau mai kraung naing ka dauh taix tix

kukaux dauh pui mai can pui pa preeng ti laig sinax pex tak pah nawh yum heue. Pex tak ot tau mai simiang yam lih yam laig nawh heue." ⁹ Cao kaing piang pui tixyieh kaux khankix hawt ti yuh can ankix awm pa hoik tawm cao giex kaing li Yehoyadax khawmuik, kaux pui mawh kaux pui an tang viex ka pui tix khankix, pa hoik koe beeh glawm singaix tuah mai khawm pui ankix pa hoik pluat beeh glawm tix khaing singaix tuah mai hoek ka cao giex kaing li Yehoyadax heue. ¹⁰ Cao giex kaing li teei ti tawx pliah mai plah tieb cie simiang Davit khankix pa koe ka dauh nyiex buan Siyiex ka cub cao kaing naing pa kuang ka lien tixyieh kaux heue. ¹¹ Khaix an, cub pa pau khankix, cung kukaux mai kraung naing cie tix pa koe dauh taix mai ot rawbrim hawt vungviang simiang, jah khaing praok plak dawm nyiex buan tom hoek ka praok plak goix nyiex buan hawt dex khu dee tan mai nyiex buan heue. ¹² Cao giex kaing li hoik viex kawn simex simiang lih plak praix mai ceep mhok khri ka piang nawh mai ap phuk lai pingnyap ka piang nawh, kix yaog nawh mawh simiang mai groi rawm bee ka piang nawh mai kix dieh taix tix ah nin, "Kieh simiang langju heue."

Grawng Yum Athaliyax

¹³ Yam mhong Athaliyax ka lox sinum cao pa pau mai cub pui hun khankix, nawh hoek ka pui khankix pa ot ka dauh nyiex buan Siyiex heue. ¹⁴ Yam yaox nawh ka ankix, simiang cung ti ot hawt rong awm pa koe been simiang haktiex Yudax khankix mai cao thong cao bung cub cao phlu teettawng khankix ot hawt simiang, pui haktiex khawmuik hoik koe krax gauxrhawm mai phlu teettawng, Athaliyax riah kraung ceep tix mai riagy ah nin, krax pa tiehfeen! Krax pa tiehfeen! ¹⁵ Khaix an, cao giex kaing li Yehoyadax tawx lox ka cub cao kaing naing piang pui tixyieh khankix mai ka cao kaing krunaing khankix mai ah nin ka kix, "Teei kiex lih plak praix sinax cao pa pau khankix mai pah kiexyum tau mai can pui pa hawt khaix kiex khankix ka lawm vaid heue." Mawh kheu cao giex kaing li ah nin, "Paw pah kiex ka dauh nyiex buan Siyiex." ¹⁶ Kix giex kiex lih hu ka krax

laig brung ka daux nyiex haw simiang mai pahkiexyum heue. ¹⁷ Khaix an, Yehoyadax yuh sijax mukheu sinax Siyiex mai simiang mai pui hun khankix sonsang mawh kix pui Siyiex mai baox yuh sijax mukheu sinax simiang mai pui khankix heue. ¹⁸ Pui haktiex khawmuik hu ka nyiex siyiex Balax mai kix yieh ti tik ankiex mai kix raig ti tik khu dee tan mai rieanggrang khawmuik mai pah Mattan cao giex kaing li Balax ka plak sivoe khu dee tan mai cao giex kaing li Yehoyadax deuh cao pa pau ti jhak nyiex buan Siyiex heue. ¹⁹ Khaix an, nawh viex cao kaing naing pa kuang ka piang pui tixyieh mai cao giex kaing naing nawh khankix, cub lien pa pau khankix mai khawm pui haktiex khawmuik mai kix viex simiang lih khaing daux nyiex buan Siyiex mai viex nawh hu ka plak krax diang siviex dee ot lien cub pa pau veng khankix ka nyiex haw simiang mai nawh ngawm ka piang danggeung simiang heue. ²⁰ Mawh kheu nan, pui haktiex khawmuik koe krax gauxrhawm mai veng hoik yiien mai kix hoik pah Athaliyax yum ka vaid daux nyiex haw simiang heue. ²¹ Yehosha koe ju aliah num, yam yaog nawh tix mawh simiang heue.

12 *Yehosha Kuang Yudax* (2*Been* 24:1-27)
 Ka daux yam kuang Yehu ka haktiex aliah num tix num, Yehosha yaog ti mawh simiang mai nawh kuang ka daux veng Yerusaliem tixpon num, ceukaux miex nawh mawh Zibiyax pui veng Berashebax heue. ² Yehosha yuh pa khawcaw sivoe ngai Siyiex, glang singaix kawm im ju nawh tau mai krax pa sidix gau cao giex kaing li Yehoyadax ka nawh khawmuik heue. ³ Viang mawh nan, can dee pa lhaong khankix ang nyang bax teei ti tik dee singai, pui khankix kawm tan krax pa appong mai gleeing nyawng bhawng ka piang dee pa lhaong khankix heue. ⁴ Yehosha ah nin ka cub cao giex kaing li khankix pa hoik viex kix nawh hoek ka daux nyiex buan Siyiex mai mau pa hoik tat pui kukaux ngawh jum tix khankix, khawm mau pa tang viex pui ti tan khawm rhawm tix khawmuik, son pa viex hoek ka daux nyiex buan Siyiex. ⁵ Kieh cao giex kaing li khankix rieb ti priex ankiex

khaing paox meed paox tawng tix mai kieh kix deeh cox nyiex buan, can dee pa hoik yaox kix dee laux heue. ⁶ Viang mawh nan, yam hoik kuang simiang Yehosha ka haktiex tixnga loe num, cao giex kaing li khankix ang nyang bax cox ka dee pa laux nyiex buan khankix heue. ⁷ Mawh kheu nan, simiang Yehosha kok ka cao giex kaing li Yehoyadax mai cao giex kaing li tang kaux mai ah nin ka kix, “Pex ang nyang bax cox dee pa laux nyiex buan khankix yuh ka mawx lie? Mawh kheu nan, yam in paw lai baox koh mau khaing paox meed paox tawng pex, viang mawh nan, deeh tawx ankiex sonsang deeh cox dee laux nyiex buan khankix heue.” ⁸ Cao giex kaing li khankix hoik khawrhawm ka ang tix lai rieb mau khaing pui khankix mai kix ang lai cox dee pa laux nyiex buan khankix heue. ⁹ Khaix an cao giex kaing li Yehoyadax teei teug tix mu mai toh daux ka piang dawb teug mai deuh hawt praok khu dee tan ka praok plak dawm dee laig pui kukaux ka daux nyiex buan Siyiex heue. Cao giex kaing li pa pau hawt diang siviex khankix tak sau mau pa viex pui khankix laig ka daux nyiex buan Siyiex khawmuik ka daux teug an heue. ¹⁰ Mawh kheu nan, yam yaox kix nie mau ka daux teug, cao pa tiem lai simiang mai cao giex kaing li pa ting hoek ti simin mau pa hoik yaox kix ka daux nyiex buan Siyiex mai sau ti priex ka daux bau heue. ¹¹ Khaix an, kix ap mau pa hoik ciang tix khankix ka daux tawm taix cao pa yuh kaing pa pau ti jhak ka daux nyiex buan Siyiex heue. Kix tawx ngawh riang cao pa yuh kaing khaox mai cao pa yuh kaing khankix ka nyiex buan Siyiex ¹² mai khawm ngawh riang cao pa yuh kaing tiex mai cao saik lon simaox mai son pa sang liag kix khaox mai lon simaox pa saik khankix, sonsang deeh cox dee pa laux nyiex buan Siyiex mai son ngawh riang pa sangcaw kix ti tawx khawmuik ka kaing dee cox nyiex buan Siyiex heue. ¹³ Viang mawh nan, mau tan pa viex hoek ka daux nyiex buan Siyiex, pa ang nyang yuh mawh kawm mau, sigiiep, pan khoek, klong mai teettawng mai kraung mau, kraung khri khankix son nyiex buan Siyiex heue. ¹⁴ Kix tawx mau ankiex ka cao yuh kaing mai kix cox nyiex buan Siyiex

kah heue. ¹⁵Lheu khaing an, kix ang lai lo krax pa cied carang khaing pui pa ap ti tawx mau ka daux tawm taix pui pa yuh kaing khankix, kheu hoik yuh kix kaing ka daux pa kaux sijax tix heue. ¹⁶Mau pon khaing pa taoh ka pa lud khankix mai pa pon khaing pa taoh ka phimap khankix pa ang viex laig ka daux nyiex buan Siyiex, an mawh son cao giex kaing li khankix heue.

Hazelax Ghlut Ka Veng Yerusalim

¹⁷Yam an Hazelax simiang haktiex Surix haok ti puing ka veng Gat mai hoik pon rhim kah, mawh kheu nan, Hazelax veeh ti haok ka veng Yerusalim heue. ¹⁸Yehosha simiang haktiex Yudax teei ti viex kraung tan pa singax singeh pa hoik appong taxdu nawh khankix pa mawh Yehoshaphat mai Yehoram mai Ahaziyax ti deuh mai khawm kraung tan ceu pa singax cie nawh mai khri khankix pa mawh kraung pa hoik yaox nawh khaing daux sinngao kraung khrai pa koe daux nyiex buan Siyiex khankix mai canceu pa koe ka daux nyiex haw simiang hu khawmuik heue. Nawh tawx ceu ankix ka Hazelax simiang haktiex Surix khawmuik heue. Khaix an, Hazelax lih hu dee singai khaing veng Yerusalim heue.

Grawng Yum Yehosha

¹⁹Grawng kaing pa deuk Yehosha khankix mai canceu pa hoik yuh nawh khawmuik, ang mawh pa hoik tiem ti deuh ka daux phuk lai grawng been cub simiang pui Yudax lie? ²⁰Kawncau nawh yaog ti tiehfeen mai pah Yehosha yum ka daux nyiex Milaw hawt krax hu ka yaong Silax heue. ²¹Mawh kheu Yozakha kawn simex Shimat, Yehozadat kawn simex Shawma mai kawncau kiex khankix pah Yehosha yum. Mawh kheu nan, kix sipaung nawh tau mai taxdu nawh ka daux veng Davit. Khaix an kawn simex nawh Amazix deeh plud ti kuang ka dahdee ot nawh heue.

13 *Yehohaza Kuang Isarelatex*

Ka daux num kuang Yehosha kawn simex Ahaziyax simiang haktiex Yudax tixnga loe num tix num, Yehohaza kawn simex Yehu, yaog ti mawh simiang ka piang pui Isarelatex daux veng Samarix mai kuang ka piang kix kao

aliah num heue. ²Nawh yuh pa caoxcaig sivoe ngai Siyiex mai hawt phimap pa yuh Yerobom kawn simex Nebat pa kieh pui Isarelatex khankix koe phimap, nawh ang goih tix khaing ceu an heue. ³Khaix an, krax songrhawm Siyiex lih ka piang pui Isarelatex khankix mai Nawh Cao ap kix ka daux tawm taix Hazelax simiang Surix mai ka daux tawm taix Benhadat kawn simex Hazelax, baux singaix im ju kix heue. ⁴Mawh kheu nan, Yehohaza khioxkhaw ka Siyiex mai Siyiex nghieth lox nawh, kheu yaox Nawh Cao krax pa kharhawm pui Isarelatex khankix, grawh grawng nawh, simiang haktiex Surix hoik yuh krax gut kheem ka kix heue. ⁵Khaix an, Siyiex tawx pui pa taoh tix kaux ka pui Isarelatex sonsang pon lawdluan kix khaing greem tawm taix pui Surix mai pui Isarelatex khankix deeh yaox ti ot ka daux nyiex gox tix awm glang ka an heue. ⁶Viang yuh ka mawx kawx, kix ang lai gah tix khaing phimap pa hoik yuh doeh nyiexma Yerobom khankix pa hoik kieh pui Isarelatex khankix koe pa lud mai lawng ka daux ankix mai khaox rong rieanggrang siyiex Asherax khankix kawn koe ka daux veng Samarix heue. ⁷Mawh kheu nan, simiang Surix prah ngie krunaing ka son Yehohadat, cub krunaing brung tixphuan kaux mai linglawx naing brung kao lhang, khawm cub lien caong khankix tix mheen kaux kheu hoik yuh simiang Surix kix lauxleeing mai hoik dugdig kix awm phawng tiex pa koe ka glah pah nghox heue. ⁸Yam in, grawng kaing pa deuk Yehohaza mai canceu pa hoik yuh nawh khankix mai khawm krax pa jhi nawh riang rao tix, ang mawh pa tiem ti deuh ka daux phuk lai grawng been cub simiang pui Isarelatex lie? ⁹Mawh kheu nan, Yehohaza lauxlee tix tau mai cub taxdu nawh khankix mai kix sipaung nawh ka daux veng Samarix, khaix an, kawn simex nawh Yehosha deeh plud ti kuang ka dahdee ot nawh heue.

Yehosha Kuang Meung Isarelatex

¹⁰Ka daux num pa kuang Yehosha simiang Yudax ka haktiex tixngoe aliah num tix num, Yehosha kawn simex Yehohaza deeh yaog ti mawh simiang ka piang pui Isarelatex ka daux

veng Samarix mai nawh kuang haktiex kao liah num heue. ¹¹Nawh yuh pa caoxcaigsivoe ngai Siyix mai ang gah tix khaing phimap pa hoik yuh Yerobom kawn simex Nebat mai pa kieh pui Isarelaux khankix koe phimap mai hoik lawng ka daux ceu ankix heue. ¹²Yam in, grawng kaing pa deuk Yehosha mai canceu pa yuh nawh khankix, khawm pa koe riang rao nawh yam puing nawh ka Amazix simiang Yudax, ang mawh pa tiem ti deuh ka daux phuk lai grawng been simiang pui Isarelaux khankix lie? ¹³Mawh kheu nan, Yehosha lauxlee tix tau mai taxdu nawh khankix, khaix an Yerobom yaog ti ngawm ka piang dangngeung nawh mai sipaung Yehosha ka daux veng Samarix tau mai cub simiang pui Isarelaux heue.

Grawng Yum Elishie

¹⁴Elishie pon jhawm saux pa tak sang kieh nawh yum, khaix an, Yehosha simiang pui Isarelaux lih hoek ka nawh mai yiem ka sivoe ngai nawh ah nin, "Keeing aux eue, keeing aux eue, linglawx naing brung pui Isarelaux mai cub krunaing brung cie kix khankix eue," ¹⁵mai Elishie ah nin ka nawh, "Teei ak mai te heue." Mawh kheu nan nawh teei ak mai te hoek heue. ¹⁶Ah nin ka simiang pui Isarelaux, "Deuh taix maix ka piang ak heue." Mawh kheu nan, nawh deuh taix tix ka piang ak mai Elishie deuh taix tix ka piang simiang heue. ¹⁷Elishie ah nin, "Paoh siviex vawng pa koe plak toh," Mai nawh paoh ka heue. Khaix an, Elishie ah nin, "Puing heue." Nawh puing ka heue. Elishie deeh ah nin, "In mawh te pa pex Siyix mai pa pex maix ka haktiex Surix, mawh kheu maix tak puing ka pui Surix ka veng Aphet tom sidah ka hoik yuh maix kix lauxleeing heue." ¹⁸Khaix an, Elishie deeh ah nin, "Teei tekhanxix," Kheu nan, nawh teei ankix heue. Nawh ah nin ka simiang pui Isarelaux, "Lah ka piang tiex heue." Mawh kheu nan, nawh lah loe bawg mai kaog khaix heue. ¹⁹Pui Siyix songrhawm ka nawh ah nin, "Maix khaw ti lah phuan liah bawg, khaix an maix tak pon pah pui Surix tom sidah uik lauxleeing kix, viang mawh nan, yam in maix tak pon pah pui Surix loe bawg

13:14 2Sim 2:12.

ngie heue." ²⁰Khaix an, Elishie yum mai kix sipaung nawh. Cub pui naing khaing haktiex Mawbax hoik laig puing ka haktiex daux yam raux num an heue. ²¹Mawh kheu nan, yam kawn sipaung kix pui tix kaux, kix yaox ka cub pui pa jiang tix cub, mai kix ploik tokaux yum an ka daux simeeig Elishie, yam tokaux yum an krox teeh ka si-ang Elishie, nawh deeh im mai kaoh cung heue.

Pui Isarelaux Pon Rhim Veng Khaing Pui Surix

²²Hazelax simiang Surix yuh krax gut kheem ka pui Isarelaux khankix ka daux glang baux kuang Yehohaza ka kix khawmuik heue. ²³Viang mawh nan, Siyix dohkeud ka kix mai koe krax cauxrhawm ka piang kix mai kiangiien ka kix, kheu sijax mukheu pa hoik yuh Nawh Cao tau mai Abraham, Icak mai Yakop mai ang lai yuh kix lauxleeing mai ang lai tikvud kix khaing plak sivoe ngai Nawh Cao heue. ²⁴Yam in, Hazelax simiang Surix hoik yum, khaix an kawn simex nawh Benhadat deeh plud ti kuang ka dahdee ot nawh heue. ²⁵Yehosha kawn simex Yehohaza rhim veng ankix khaing daux taix Benhadat kawn simex Hazelax, ka veng pa hoik rhim nawh khaing daux taix keeing tix Yehohaza ka daux naing, Yehosha hoik pex ka nawh loe bawg mai pon rhim veng pui Isarelaux heue.

14 ***Amazix Kuang Yudax*** (*2Been 25:1-28*)
 Ka daux num pa kuang Yehosha kawn simex Yehohaza simiang pui Isarelaux ra num tix num, Amazix kawn simex Yosha simiang Yudax deeh yaog ti mawh simiang heue. ²Nawh koe ju tixnga phuan num yam yaog nawh ti mawh simiang mai nawh kuang daux veng Yerusaliem tixnga dim num, ceukaux miex nawh mawh Yehodadan pui veng Yerusaliem heue. ³Nawh yuh pa khawcaw sivoe ngai Siyix, viang mawh nan, ang nyang awm keeing nawh simiang Davit, nawh yuh kuceu awm pa yuh keeing tix Yosha heue. ⁴Viang mawh nan, nawh ang nyang bax tik dee pa lhaong khankix luan dee singai mai pui khankix kawn ca tan krax tan pa appong mai gleeing nyawng bhawng ka piang dee pa lhaong heue. ⁵Yam hoik pang nawh meung kauxcong ka daux tawm taix tix, nawh hoik

pah ka siliex pa hoik pah ka keeing nawh simiang heue. ⁶ Viang mawh nan, nawh ang pah kawn praix cao pa pah pui khankix hawt awm pa hoik tiem ka dauh phuk lai been Mose, gumlox pa hoik tawm Siyiex pa ah nin, "Keeing tak ang pon ti yum son kawn mai kawn tak ang pon tix yum son keeing, viang mawh nan, pui mawx pui an tak mawh pa yum son phimap tokaux tix heue." ⁷ Nawh pah pui Edom yum ka dauh ngawd tix mheen kauh mai nawh pon rhim veng Selax ka dauh naing mai kok ceukaux veng an mawh Yokathilax tom hoek dauh in singaix heue. ⁸ Khaix an, Amazix ploi pui cau khankix hu ka Yehosha kawn simex Yehohaza kawn simex Yehu, simiang pui Isarelay ah nin, "Hoek heue, kieh ex yaox ngai baoh paox tix ka dauh biang naing heue." ⁹ Yehosha simiang pui Isarelay ploi pui hu ka Amazix simiang haktiex Yudax ah nin, "Pang kat pa hoik koe ka dauh Lebanon ploi hukakhaox Arit pa koe ka dauh Lebanon ah nin, tawx kawn sibun maix mawh moeng kawn simex aux mai tobrie bliex pa koe ka dauh nong Lebanon an tix mu, hoik tiang mai dugdig ka pang kat an heue. ¹⁰ Maix hoik pex haktiex Edom tete mai rhawm maix hoik koe krax pa lhaong kah, teei min ka grawng pa pex maix khankix mai ot ka dauh nyiex, mawh kheu patix maix lai sawg ti yaox kraxkharhawm pa somnai tix tau mai haktiex Yudax lie?" ¹¹ Viang mawh nan, Amazix ang lai cu ti nghieng ka lox ankix, mawh kheu nan, Yehosha simiang Isarelay haok ti puing naing, kheu jao an nawh mai Amazix simiang haktiex Yudax hoik sipub paox tix ka dauh veng Bietshemiet pa mawh cie pui Yudax heue. ¹² Pui Yudax hoik som ka pui Isarelay mai pui kukaux hoik tang to ti ing ka nyiex gox tix heue. ¹³ Khaix an, Yehosha simiang pui Isarelay pon giex ka Amazix simiang haktiex Yudax pa mawh kawn simex Yosha kawn simex Ahaziyaux ka dauh veng Bietshemiet mai nawh hu ka veng Yerusaliem mai yuh guh veng Yerusaliem, jah khaing siviex veng Epharim tom hoek ka daog siviex veng an khawmuik ponyieh sawk heue. ¹⁴ Nawh teei khri mai mau khawmuik

mai can kraung shiao pa koe khawmuik ka dauh nyiex buan Siyiex mai can pa koe ka dauh nyiex haw simiang khawmuik mai khawm pui pa kham khankix mai deeh ing ka veng Samarix heue. ¹⁵ Grawng kaing pa deuk Yehosha mai ceu pa hoik yuh nawh khankix mai grawng pa koe riang rao nawh mai grawng pa hoik yuh nawh naing tau mai Amazix simiang haktiex Yudax, ceu ankix ang mawh pa tiem ti deuh ka dauh phuk lai grawng been simiang pui Isarelay khankix lie? ¹⁶ Mawh kheu nan, Yehosha hoik lauxlee tix tau mai keeing nawh khankix mai sipaung ka dauh veng Samarix tau mai cub simiang pui Isarelay, khaix an kawn simex nawh Yerobom plud ti kuang ka dahdee ot nawh heue. ¹⁷ Amazix kawn simex Yosha simiang haktiex Yudax im ju kao phuan num, khaix hoik yum Yehosha kawn simex Yehohaza simiang pui Isarelay heue. ¹⁸ Yam in grawng kaing pa deuk Amazix ang mawh pa tiem tix ka dauh phuk lai grawng been cub simiang haktiex Yudax khankix lie? ¹⁹ Kix rom paox tix tiehfeen Amazix ka dauh veng Yerusaliem mai nawh to ka veng Lakhisha, viang mawh nan, kix ploi pui hawt khaix nawh dauh veng Lakhisha mai pah nawh heue. ²⁰ Khaix an, kix viex nawh ing ka piang brung mai sipaung nawh ka dauh veng Yerusaliem tau mai taxdu nawh khankix ka dauh veng Davit heue. ²¹ Pui Yudax khankix yaog Azarix pa koe ju kao liah num mawh simiang tang keeing nawh Amazix heue. ²² Nawh hoik sum veng Elat mai priex nawh ka dauh haktiex Yudax, khaix hoik lauxlee simiang tix tau mai taxdu nawh heue.

Yerobom Kuang Meung Isarelay

²³ Dauh num yam kuang Amazix kawn simex Yosha simiang haktiex Yudax kao phuan num tix num, Yerobom kawn simex Yosha simiang pui Isarelay yaog ti mawh simiang ka dauh veng Samarix mai nawh kuang ka piang kix tixpon tix num heue. ²⁴ Nawh yuh pa caoxcaig sivoeng ngai Siyiex, nawh ang gah tix khaing phimap pa yuh Yerobom kawn simex Nebat mai pa hoik kieh pui Isarelay koe phimap heue. ²⁵ Nawh deeh teei mee praix

dee kuang pui Isarela, jah khaingdiang laig ka veng Hamat tom hoek ka rawm sigrit sigra Arabax awm gumlox Siyiex pui Isarela pa hoik sika Nawh Cao ka siliex tix Yonax kawn simex Amitie cao jhai pa kaoh khaing veng Gathepha heue. ²⁶ Mawh kheu Siyiex hoik yaox ka pa kied langteung kharhawm pui Isarela mai pui pa giexlaung angah, pui pa lawduan angah, pui pa teem ka pui Isarela ang koe pie tix kaux kaw heue. ²⁷ Siyiex ang bax ah ti sang preet ceukaux pui Isarela khankix khaing greem raoma mai Nawh Cao teei tawm taix Yerobom kawn simex Yosha taoh ka kix heue. ²⁸ Yam in grawng kaing pa deuk Yerobom khankix mai grawng ceu pa hoik yuh nawh khankix mai grawng pa koe riang rao nawh mai grawng pa hoik yuh nawh naing mai pa hoik pon rhim nawh ti deeh teei veng Damase mai veng Hamat son pui Isarela pa hoik dawg mawh cie haktiex Yudax, ang mawh pa hoik tiem ka dau phuk lai grawng been simiang pui Isarela khankix lie? ²⁹ Mawh kheu nan, Yerobom hoik lauxlee tix tau mai taxdu nawh cub simiang pui Isarela heue. Khaix an kawn simex nawh Zakharix deeh kuang haktiex ka dahdee ot nawh heue.

Azarix Kuang Ka Yudax (2Been 26:3-5, 16-23)

15 Ka dau num pa kuang Yerobom simiang pui Isarela ka haktiex tixnga aliah num tix num, Azarix kawn simex Amazix, simiang Yudax deeh yaog ti mawh simiang heue. ² Nawh koe ju kao liah num yam mawh nawh simiang mai nawh kuang ka dau veng Yerusalim tixphan ra num heue. Ceukaux miex nawh mawh Yekhoriyax pui veng Yerusalim heue. ³ Nawh hoik yuh pa rahsee sivoie ngai Siyiex awm pa hoik yuh keeing nawh Amazix khawmuik, ⁴ lheu khaing an nawh ang nyang gah ti tik dee pa lhaong khankix, pui khankix kawn tan krax tan pa appong mai krax tan pa gleeing nyawng bhawng ka piang dee pa lhaong khankix heue. ⁵ Khaix an, Siyiex taxw krax kharhawm ka simiang, kieh nawh pon jhawm

saux sipawg tom sidah hoek singaix yum nawh, mawh kheu nan, nawh ot dau nyiex haw nongnong heue. Yotham pa mawh kawn simex simiang kuang ka piang nyiexma simiang mai hoik prawngsee ka pui haktiex khankix heue. ⁶ Yam in grawng kaing pa deuk Azarix mai canceu pa hoik yuh nawh khankix ang mawh pa tiem ti deuh ka dau phuk lai grawng been simiang haktiex Yudax khankix lie? ⁷ Mawh kheu Azarix hoik lauxlee tix tau mai taxdu nawh mai kix sipaung tau mai taxdu nawh ka dau veng Davit heue. Khaix an, kawn simex nawh Yotham deeh plud tix kuang ka dahdee ot nawh heue.

Zakharix Kuang Ka Isarela

⁸ Ka dau num pa kuang Azarix, simiang Yudax haktiex tixngoe daix num tix num, Zakharix kawn simex Yerobom kuang ka piang pui Isarela ka dau veng Samarix liah khix heue. ⁹ Nawh yuh pa caoxcaig sivoie ngai Siyiex, awm pa yuh taxdu nawh khankix, nawh ang gah tix khaing phimap yuh Yerobom kawn simex Nebat pa hoik kieh pui Isarela yuh phimap heue. ¹⁰ Khaix an, Shalum kawn simex Yabiet khawm rom paox tix, tiehfeen ka nawh mai pah nawh yum ka plak sivoie pui mai deeh plud ti kuang ka dahdee ot nawh heue. ¹¹ Yam in grawng kaing pa deuk Zakharix hoik mawh pa tiem ti deuh ka dau phuk lai grawng been cub simiang haktiex Isarela khankix heue. ¹² In mawh gumlox Siyiex pa hoik krai Nawh Cao ka Yehu ah nin, "Kawn simex maix khankix tak yaox ti ngawm ka piang dang ngeung pui Isarela tom hoek pon juheue."

Shalum Kuang Ka Isarela

¹³ Shalum kawn simex Yabiet yaog ti mawh simiang ka dau num hoik kuang Azarix, simiang Yudax ka haktiex tixngoe dim num tix num mai nawh kuang ka haktiex Samarix tix khix mhawm mhawm heue. ¹⁴ Menahim kawn simex Gadix lih hu khaing veng Tiraza, hoek ka veng Samarix mai pah ka Shalum kawn simex Yabiet yum ka dau veng Samarix mai nawh cax ti kuang haktiex ka dahdee ot nawh heue. ¹⁵ Yam in grawng kaing pa deuk Shalum khankix mai grawng pa hoik rom nawh ti yuh krax pa tiehfeen khankix, kix

hoik tiem ti deuh grawng ceu ankix ka daux phuk lai grawng been cub simiang pui Isarelux heue. ¹⁶ Yam in jah khaing veng Tiraza, Menahim hoik puing ka veng Tiphasa mai can pui pa ot hawt baoh an khawmuik mai mee haktiex veng an khawmuik, kheu ang kix cu ti paoh veng ka son nawh, mawh kheu nan, nawh tom puing ka veng an heue. Nawh pih vaig sibun pa koe kaux khankix pa ot tan khawmuik heue.

Menahim Kuang Ka Isarelux

¹⁷ Daux num yam kuang Azarix simiang Yudax ka haktiex tixngoe dim num tix num, Menahim kawn simex Gadix yaog ti mawh simiang ka piang pui Isarelux mai kuang ka veng Samarix kao num heue. ¹⁸ Nawh hoik yuh pa caoxcaig sivoeng ngai Siyiex, nawh ang cu ti gah khaing phimap pa yuh Yerobom kawn simex Nebat pa hoik kieh pui Isarelux khankix koe phimap heue. ¹⁹ Pulax simiang haktiex Asurix hoek ti puing ka haktiex Isarelux mai Menahim tawx mau ka Pulax tixrheng talantan sonsang teem Pulax nawh pang meung kauxcong heue. ²⁰ Menahim koh mau khaing pui magmi khankix kukaux ka daux pui Isarelux khawmuik mai kieh kix tang tawx mau tix kaux tixphan shekhe mai tawx ka simiang haktiex Asurix heue. Mawh kheu nan, simiang Asurix deeh veeh ti ing mai ang lai ot daux haktiex tan heue. ²¹ Yam in grawng kaing Menahim khankix mai can grawng kaing pa hoik yuh nawh khawmuik, ang mawh pa hoik tiem ka daux phuk lai grawng been cub simiang pui Isarelux lie? ²² Mawh kheu nan, Menahim hoik lauxlee tix tau mai taxdu nawh heue. Khaix an, kawn simex nawh Pekahiyax deeh plud ti kuangkadahdee ot nawh heue.

Pekahiyax Kuang Isarelux

²³ Daux num yam kuang Azarix simiang Yudax ka haktiex tixphan num tix num, Pekahiyax kawn simex Menahim yaog ti mawh simiang ka piang pui Isarelux ka daux veng Samarix mai kuang haktiex ra num heue. ²⁴ Nawh yuh pa caoxcaig sivoeng ngai Siyiex, nawh ang cu ti gah khaing phimap pa hoik yuh Yerobom kawn simex Nebat mai pa hoik kieh pui Isarelux khankix koe phimap heue.

²⁵ Khaix an, Peka kawn simex Remariyax cao kaing naing nawh tix kaux hoik yuh cub tix tiehfeen mai pah nawh yum ka daux veng Samarix dahdee pa pau kix nyiex haw simiang tau mai Agawbax mai Areha mai khawm pui nawh khankix tixphan kaux pa mawh pui haktiex Gilat heue. Nawh pah ka Pekahiyax yum mai cax ti kuang ka dahdee ot nawh heue. ²⁶ Yam in grawng kaing pa deuk Pekahiyax khankix mai canceu pa hoik yuh nawh khawmuik, hoik mawh pa tiem ti deuh ka daux phuk lai grawng been cub simiang pui Isarelux heue.

Peka Kuang Ka Isarelux

²⁷ Daux num yam kuang Azarix simiang Yudax ka haktiex tixphan ra num tix num, Peka kawn simex Remariyax yaog ti mawh simiang ka piang pui Isarelux mai kuang ka veng Samarix tixnga num heue. ²⁸ Nawh yuh pa caoxcaig sivoeng ngai Siyiex; nawh ang cu ti gah khaing phimap pa hoik yuh Yerobom kawn simex Nebat, pa hoik kieh pui Isarelux koe phimap heue. ²⁹ Daux singaix bauxju Peka, simiang pui Isarelux, Tigalatpileasa mai simiang haktiex Asurix, hoek rhim ka veng Iyong, veng Abelax Bietmakha, veng Yanaw, veng Kedesha, veng Hazaw haktiex Gilat mai haktiex Gallie, khawm baoh haktiex Naphatalix mai nawh viex pui ot daux haktiex ankix awm pui pa giexlaung ka daux haktiex Asurix heue. ³⁰ Khaix an yam kuang Yotham kawn simex Awziyax ka haktiex tixnga num tix num, Hoshe kawn simex Elax yuh cub tix tiehfeen ka Peka kawn simex Remariyax mai pah nawh yum mai nawh cax ti kuangka dahdee ot nawh heue. ³¹ Yam in grawng kaing pa deuk Peka khankix mai can grawng kaing pa hoik yuh nawh khankix, mawh pa tiem ti deuh ka daux phuk lai grawng been cub simiang Isarelux heue.

Yotham Kuang Ka Yudax (2Been 27:1-9)

³² Daux num yam kuang Peka kawn simex Remariyax simiang pui Isarelux ka haktiex ra num tix num, Yotham kawn simex Awziyax simiang Yudax jah ti kuang ka haktiex heue. ³³ Nawh koe ju tixnga phuan num yam yaog nawh tix mawh simiang mai nawh kuang ka

veng Yerusaliem kao liah num heue. Ceukaux miex nawh mawh Yerusha kawn sibun Zadok heue. ³⁴ Nawh yuh pa khawcaw sivoe ngai Siyix; nawh hawt yuh awm krax pa yuh keeing nawh Awziyax khawmuik heue. ³⁵ Viang mawh nan, nawh ang gah ti tik can dee pa lhaong khankix, pui khankix ca kawn tan krax tan pa appong mai gleeing nyawng bhawng khankix ka dee pa lhaong mai nawh sum siviex plak piang ka dau nyiex buan Siyix heue. ³⁶ Yam in grawng kaing pa deuk Yotham khankix mai canceu pa hoik yuh nawh khankix ang mawh pa tiem ti deuh ka dau phuk lai grawng been cub simiang haktiex Yudax khankix lie? ³⁷ Dau singaix ankix, Siyix jah tix ploi Rezin simiang haktiex Surix mai Peka kawn simex Remariyax hu puing ka haktiex Yudax heue. ³⁸ Mawh kheu nan, Yotham hoik lauxlee tix tau mai taxdu nawh mai sipaung tau mai cub keeing nawh khankix ka dau veng keeing nawh Davit heue. Khaix an, kawn simex nawh Ahaza deeh plud ti kuang ka dahdee ot nawh heue.

16 *Ahaza Kuang Ka Yudax* (2*Been* 28:1-27)
 Dau num yam kuang Peka kawn simex Remariyax ka haktiex kao aliah num tix num, Ahaza kawn simex Yotham, simiang Yudax jah ti kuang ka haktiex heue. ² Ahaza koe ju tixnga num yam yaog nawh ti mawh simiang mai nawh kuang ka dau veng Yerusaliem kao liah num, nawh ang yuh pa khawcaw sivoe ngai Siyix awm pa hoik yuh keeing nawh Davit heue. ³ Nawh lawng ka dau krax pa yuh cub simiang pui Isarelix, nawh kieh kawn simex tix mawh pa tan ti gleeing ka ngu awm pa seeing brai ceu pui khankix, pa hoik tikvud Siyix khaing ka plak sivoe pui Isarelix heue. ⁴ Nawh tan krax pa appong mai gleeing nyawng bhawng ka piang can dee pa lhaong khankix pa koe piang gawng mai ka greem khaox pa kawn klai khankix heue. ⁵ Khaix an, Rezin simiang haktiex Surix mai Peka simiang pui Isarelix, hoek ka veng Yerusaliem son yuh naing mai kix hoik lailawm ka Ahaza, viang mawh nan,

kix ang pex nawh heue. ⁶ Ka dau bawgyam an, Rezin simiang haktiex Surix, hoik pon rhim veng Elat son haktiex Surix mai grheu ti tik pui Yudax khankix khaing veng Elat mai kix ot tan tom hoek dau in singaix heue. ⁷ Mawh kheu nan, Ahaza ploi pui cau khankix hu ka Tikalat-pilesa simiang haktiex Asurix ah nin "Aux mawh siliex maix mai kawn simex maix heue. Hoek heue, deeh taoh aux lih khaing dau tawm taix simiang Surix mai khaing dau tawm taix simiang pui Isarelix pa yaog ti tiehfeen ka aux heue." ⁸ Ahaza teei khri mai mau khankix pa koe ka dau nyiex buan Siyix mai khaing ka dau nyiex sinngao nyiex simiang khankix mai tawx ceu ankix mawh totaix ka simiang haktiex Asurix heue. ⁹ Mawh kheu nan, simiang haktiex Asurix cu nghiet ka nawh, mawh kheu simiang haktiex Asurix haok puing ka veng Damase mai rhim ka veng an mai nawh giex ti viex pui veng an khankix hu ka veng Kirax mai pah simiang Rezim yum heue. ¹⁰ Yam in Ahaza hu ka veng Damase sonsang hu yaox ka simiang Tikalat-pilesa simiang haktiex Asurix mai yaox ka khu dee tan tix mu ka dau veng Damase mai simiang Ahaza jhi rieang pakpeung khu dee tan an awm khaix taix pa yuh pui khankix mai tawx hu ka cao giex kaing li Uriyax heue. ¹¹ Khaix an, cao giex kaing li Uriyax sum khu dee tan tix lhang awm pakpeung rieang pa tawx simiang Ahaza khaing veng Damase, mawh kheu nan, cao giex kaing li yuh hoik sivoe ang simiang Ahaza nyang hoek khaing dau veng Damase heue. ¹² Yam hoek simiang khaing veng Damase, simiang yaox khu dee tan mai simiang greedtix dex hawt khu dee tan mai tan ka piang an heue. ¹³ Mawh kheu nan, nawh gleeing krax tan pa gleeing mai krax tan ceu pa ih mai groi krax tan pa nyaux mai phruah nham krax tan pa nhim ka piang khu dee tan heue. ¹⁴ Nawh deeh teei khu tawng dee tan pa koe ka plak sivoe Siyix khaing plak sivoe nyiex buan mai khaing dau sinax khu dee tan pa khraox an mai nyiex buan Siyix mai deuh ka praok plak laong khu dee tan pa khraox an heue. ¹⁵ Khaix an, simiang Ahaza tawx lox ka

cao giex kaing li Uriyax ah nin, "Gleeing krax tan pa gleeing ponggawb mai krax tan ceu pa ih ponbo mai krax tan pa gleeing cie simiang mai krax tan ceu pa ih mai krax tan pa gleeing cie pui haktiex khankix mai khawm krax tan ceu pa ih mai krax tan pa nyaux khankix ka piang khu dee tan khraox pa kied ting an heue. Phruah nham to tan pa gleeing mai nham to tan pa appong khawmuik ka piang an mai khu tawng dee tan an tak mawh dee pa chawkcheng ka Siyiex heue." ¹⁶ Cao giex kaing li Uriyax hoik yuh awm pa tawm simiang Ahaza ka nawh khawmuik heue. ¹⁷ Simiang Ahaza yieh ti tik ngot tawng lheung mai gah ka pan khoek khankix khaing ka piang an heue. Nawh teei dung tawng lheung lih khaing rieang mawie tawng khankix pa koe ka greem mai deuh ka piang simaox pa hoik tawm tix heue. ¹⁸ Nawh hoik deeh gah nyiex buan son singaix tuah pa sum kix ti deuh ka dau nyiex buan mai nawh deeh hoik gah pa koe dau krax laig simiang pa koe plak praix nyiex buan Siyiex kheu jao simiang haktiex Asurix heue. ¹⁹ Yam in grawng kaing pa deuk Ahaza khankix, ang hoik mawh pa tiem ti deuh ka dau phuk lai grawng been cub simiang haktiex Yudax khankix lie? ²⁰ Khaix an, Ahaza lauxlee tix tau mai taxdu nawh mai sipaung tau mai keeing nawh ka dau veng Davit heue. Khaix an, kawn simex nawh Hezakiyax hoik plud ti kuang haktiex ka dahdee ot nawh heue.

17 *Hoshe Kuang Ka Isarelix*

Ka dau num yam kuang Ahaza simiang Yudax ka haktiex kao ra num tix num, Hoshe kawn simex Elat deeh yaog ti mawh simiang ceu pui Isarelix ka dau veng Samarix mai kuang haktiex dim num heue. ² Nawh yuh pa caoxcaig sivoe ngai Siyiex, viang mawh nan, nawh ang awm cub simiang ceu pui Isarelix khankix pa hoik koe phaoka nawh heue. ³ Shalamaneza simiang haktiex Asurix hoek ti puing ka nawh mai Hoshe kham ti mawh siliex nawh mai tawx keen ka nawh heue. ⁴ Simiang haktiex Asurix hoik pon tawng

grawng pa tiehfeen Hoshe, mawh kheu Hoshe ploï cao cau tix hu ka Sua simiang haktiex Ejiptux mai nawh ang lai tawx keen ka simiang Asurix awm pa yuh nawh ku num heue. Mawh kheu nan, simiang haktiex Asurix hoik giex nawh mai laung nawh ka dau kawg heue.

Isarelix Ing Ka Haktiex Asurix

⁵ Yam in simiang haktiex Asurix hu puing ka haktiex Isarelix kudah mai haok lailawm ka veng Samarix loe num heue. ⁶ Ka dau num yam kuang Hoshe ka haktiex dim num, simiang haktiex Asurix hoik rhim ka veng Samarix mai teei ceu pui Isarelix khankix hu ka haktiex Asurix mai deuh kix ot ka dau veng Halax mai hawt baoh veng Habo hawt rawm klawng Gozan mai ka dau veng pa koe ka dau haktiex Midix heue. ⁷ Mawh kheu kawn praix ceu pui Isarelix hoik lud ka Siyiex kix pa hoik viex kix lih khaing haktiex Ejiptux, luan khaing greem tawmtaix Pharaw simiang haktiex Ejiptux mai kix lhatgraung ka siyiex tang kaux tang hak khankix ⁸ mai hoik hawt ka dau been ceu pui an khankix pa hoik grheu Siyiex plak sivoe ngai pui Isarelix khankix mai khaing been pa deuh cub simiang Isarelix khankix heue. ⁹ Pui Isarelix khankix hoik moh ti yuh kaing ceu pa ang khaw mai tiehfeen ka cie Siyiex kix mai kix hoik sum dee pa lhaong khankix ka dau veng khawmuik, jah khaing dau nyiex pau dau veng pa kauxcong heue. ¹⁰ Kix sum rieang rong simaox mai rieang khaox siyiex Asherax khankix ka piang gawng lhaong ku gawng mai ka greem khaox klai ku pang son tix heue. ¹¹ Gleeing nyawng bhawng ka piang dee pa lhaong khawmuik awm pa hoik yuh ceu pui pa hoik grheu Siyiex lih khaing sivoe ngai kix mai kix hoik yuh ceu pa caoxcaig sonsang so ka pa songrhawm Siyiex heue. ¹² Mawh kheu kix hoik yuh kaing jhaw son rieanggrang pa hoik tawm Siyiex ka kix yuh nin, "Maix tak ang pon ti yuh ceu in heue." ¹³ Viang Siyiex hoik kieh cao jhai Maix pui grux yaox khankix tawx satix ka ceu pui Isarelix mai ka ceu Yudax ah nin, "Deeh veeh tix khaing pa caoxcaig yuh pex khankix mai priex rien ti hawt lox tawm pingnyap Aux khankix pa

16:17 1Sim 7:23-39, 2Been 4:2-6. **16:20** Isa 14:28.

17:10 1Sim 14:23.

hoik tawm Aux ka taxdu pex khawmuik mai pa hoik ploi Aux hoek ka keeing pex khaing kawncau mau soi cao jhai Aux khankix heue.”

¹⁴Viang yuh ka mawh kawx kix ang cu nghiet kah, kix hoik kieh ngawg tix kiien awm taxdu kix mai ang yumrhawm ka Siyiex kix heue. ¹⁵Kix tikvud lox tat jhawm prawng Nawh Cao khankix mai sijax mukheu pa hoik yuh Nawh Cao ka taxdu kix khankix pa hoik kham Nawh Cao mhairug ka piang kix heue. Kix hawt grawng lawng khaix rienggrang khankix mai hoik lih ti mawh pa ang koe ceu mai kix hoik hawt khaix cub ceu pui khankix pa ot hawt vungviang kix, pui pa hoik ah Siyiex ti deuh ka kix mai son ang kix sang yuh ceu an awm kix heue. ¹⁶Mawh kheu kix hoik tikvud lox pingnyap Siyiex khankix mai kix hoik rawg tix cie rieng kawm mawie iak ra mu mai kix baox yuh rieng khaox siyiex Asherax tix mu mai krub ka canceu pa koe piang raoma mai yuh kaing jhaw siyiex Balax heue. ¹⁷Kix hoik gleeing ti tan kawm simex kawm sibun tix khankix mai yuh sibawk chawk jhai mai yuh simeed mai coh tokaux tix, yuh ceu pa caoxcaig sivoengai Siyiex mai so krax pa songrhawm Nawh Cao heue. ¹⁸Mawh kheu nan, Siyiex kied songrhawm ka ceu pui Isarelaix khankix mai grheu kix lih khaing plak sivoengai Nawh Cao, lheu khaing doehru pui Yudax khankix, Nawh Cao ang lai deuh kix pie tix kaux kawx heue. ¹⁹Pui Yudax baox ang cu ti priexrien ka lox pingnyap Siyiex kix mai kix hoik hawt hu ka daux krax been yungyi ceu pui Isarelaix khankix ka pa hoik yuh kix ti deuh heue. ²⁰Siyiex hoik tikvud ka doehru Isarelaix khawmuik mai kieh kix kharhawm tix mai ap kix ka daux tawm taix pui tudrhim tom sidah grheu Nawh cao kix lih khaing ka plak sivoengai Nawh Cao heue. ²¹Mawh kheu nan, Nawh Cao riah ti tik ceu pui Isarelaix khankix khaing doeh nyiexma Davit mai kix yaog Yerobom kawm simex Nebat mawh simiang heue. Khaix an, Yerobom nyawglaw ceu pui Isarelaix khankix khaing pa hawt kix khaix Siyiex mai kieh kix lud ka daux phimap pa kied ting heue. ²²Mawh kheu hoik hawt pui

Isarelaix ti yuh phimap pa hoik yuh Yerobom khankix, kix ang lai gah tix khaing ceu an ²³tom hoek bawg yam gah Siyiex ti tik ceu pui Isarelaix khaing plak sivoengai Nawh Cao awm pa hoik ah Nawh Cao ka kawncau cao jhai Nawh khankix heue. Mawh kheu nan, ceu pui Isarelaix hoik pon giex hu dee singai, khaing daux haktiex kix ka haktiex Asurix tom hoek daux in singaix heue.

Asurix Deeh Cox Pang Ka Samarix

²⁴Khaix an, simiang haktiex Asurix viex pui khankix hoek khaing veng Babulon, veng Kutax, veng Avax, veng Hamat mai veng Sepharavim mai deuh kix ot ka daux nyiex yaong veng Samarix khankix son tang pui Isarelaix mai kix hoik rhim ti cie kraungkhrui sinngao veng Samarix mai ot ka daux nyiex yaongan khankix heue. ²⁵Yam jah kix ti pang krax ot tix baoh tan, kix ang koe krax lhatgraung ka Siyiex, mawh kheu nan, Siyiex ploi sivai sangsi hoek ka sinax kix mai kiied kix yum tixblah heue. ²⁶Mawh kheu nan, koe pui kraik lox ka simiang Asurix ah nin, “Ce u pui pa hoik gah maix ot ka daux nyiex yaong Samarix khankix ang tawng ka lox jhai Siyiex haktiex an, mawh kheu nan, Nawh Cao hoik ploi sivai sangsi hoek ka daux sinax kix mai kiied kix yum kheu jao ang kix tawng ka lox jhai Siyiex haktiex an heue.” ²⁷Khaix an, simiang Asurix tawm lox ah nin, “Ploi cao giex kaing li tix kaux pa hoik viex pex hoek khaing tan, kieh nawh hu ot tan mai kieh nawh gau kix ka lox jhai Siyiex haktiex an heue.” ²⁸Khaix an, cao giex kaing li tix kaux pa hoik viex kix hoek khaing daux veng Samarix hoik deeh ing ot ka daux veng Betelax mai gau kix sonsang koe krax lhatgraung ka Siyiex heue. ²⁹Viang yuh ka mawh kawx, ceu pui ankix ku cub hoik tang yuh rienggrang siyiex tix mai hoik deuh kix nyiex dee pa lhaong khankix, pa sum ceu pui Samarix ti deuh, ceu pui ku cub hoik tang deuh rienggrang siyiex tix, ka daux nyiex yaong veng dee ot tix heue. ³⁰Pui veng Babulon yuh ti cie rieng pakpeung siyiex Suhok-banot mai pui veng Kutax, yuh ti cie rieng pakpeung siyiex Nerahalax mai pui veng Hamat hoik

yuh ti cie rieang pakpeung siyiex Ashimax khankix heue. ³¹ Pui Avax khankix yuh rieang siyiex Nebahaza mai rieang siyiex Tatak khankix mai pui veng Sephanaviem khankix gleeing ti tan kawn praix kix daux ngu ka siyiex Adarameliet mai ka siyiex Anameliet khankix pa mawh siyiex Sepharavim heue. ³² Mawh kheu nan, kix lhatgraung ka Siyiex mai kix yaog ti deuh cao giex kiang li dee pa lhaong khankix son pa sang appong ti tawx krax tan son kix ka daux nyiex moeg pa koe dee pa lhaong khankix heue. ³³ Kix lhatgraung ka Siyiex viang mawh nan, kix kawn yuh kaing jhaw Siyiex tang kaux tang hak awm hoik koe been cub ceu pui khankix khaing daux sinax pui pa hoik viex kix hu khankix heue. ³⁴ Tom hoek ka daux singaix in, kix ca kawn yuh awm been pa dawg koe phaoka, kix ang lai koe krax lhatgraung ka Siyiex mai kix ang lai tah hawt khaix been yungyi kix mai khawm lox tat jhawm prawng kix mai ang lai hawt lox pingnyap khankix pa hoik tawm Siyiex ka kawn praix Yakop khankix pa hoik sum Nawh Cao ceukaux mawh Isarelax. ³⁵ Awm pa hoik yuh Siyiex sijax mukheu tau mai kix ah nin, "Pex ang pon ti lhatgraung ka siyiex tang kaux tang hak khankix mai ang pon ti ngeuh kaing tix ka kix mai ang pon ti yuh kaing jhaw kix mai ang pon ti appong krax tan ka kix heue. ³⁶ Viang mawh nan, Siyiex pa hoik viex pex lih khaing daux haktiex Ejiptux tau mai pa kied ting sibrawm mai plawng taix pa hoik nyeu Nawh Cao, pex tak koe krax lhatgraung ka Nawh Cao, pex tak krub ka Nawh Cao mai pex tak appong ti tan ka Nawh Cao heue. ³⁷ Been yungyi, been lox tat jhawm prawng khankix, gumlox pingnyap pa hoik tiem Nawh Cao ti tawx ka pex khankix pex tak prixi ti hawt yuh leeingju, pex tak ang pon ti lhatgraung ka siyiex tang kaux tang hak heue. ³⁸ Sijax mukheu pa hoik yuh Aux tau mai pex, pex tak ang pon ti piawm mai pex tak ang pon ti lhatgraung ka siyiex tang kaux tang hak heue. ³⁹ Viang mawh nan, pex tak lhatgraung

ka Siyiex, Nawh Cao tak taoh pex khaing daux tawm taix pui koeng pex khankix heue." ⁴⁰ Viang ah yuh nin kawx, kix ang cu nghiet kah mai kix hoik hawt khaix been cie kix phaoka heue. ⁴¹ Mawh kheu nan, ceu pui inkix lhatgraung ka Siyiex, viang mawh nan, kix hoik yuh kaing jhaw rieanggrang pa hoik saik kix, kawn praix kawn saux kawn sex kix hoik toe ti yuh kaing jhaw ankix awm pa hoik yuh taxdu kix tom hoek ka daux in singaix heue.

Hezakiyax Kuang Ka Yudax (2Been 29:1-2)

18 Yam in khaix hoik luan ka daux num yam kuang Hoshe kawn simex Elax, simiang ceu pui Isarelax ka haktiex loe num tix num, Hezakiyax kawn simex Ahaza simiang Yudax, jah ti kuang ka haktiex heue. ² Nawh koe ju tixnga phuan num, yam yaog nawh ti mawh simiang mai kuang ka haktiex tixnga daix num ka daux veng Yerusaliem heue. Ceu kaux miex nawh mawh Abix kawn sibun Zakharix heue. ³ Nawh yuh pa khawcaw sivoe ngai Siyiex awm pa hoik yuh keeing nawh Davit heue. ⁴ Nawh teei ti tik dee pa lhaong khankix mai raig ka rieang rong simaox mai rieanggrang khaox siyiex Asherax khankix mai lah phawng ka rieang siuing tawng pa yuh Mose, mawh kheu kawn praix ceu pui Isarelax khankix, kawn gleeing nyawng bhawng ka plak sivoe rieang siuing an mai kokrieang siuing tawng an mawh Nehushatan heue. ⁵ Nawh een rhawm tix ka Siyiex ceu pui Isarelax, mawh kheu nan, pui pa awm nawh ka daux sinax cub simiang haktiex Yudax khankix, ang koe pie tix kaux kawx khaix nawh mai sivoe nawh heue. ⁶ Mawh kheu hoik kauxcong nawh ka daux Siyiex, nawh ang lai gah khaing pa hawt ti khaix Nawh Cao mai nawh hoik prixi lox pingnyap Nawh Cao pa hoik tawm Siyiex ka Mose heue. ⁷ Siyiex ot tau mai nawh, nawh haokhuan ka can dee pa hu nawh kudah heue. Nawh tiehfeen ka simiang Asurix mai ang cuti yuh kaing jhaw nawh heue. ⁸ Nawh pex ceu pui Philitiex khankix tom hoek ka veng Gaza mai khawm dee pa kuang nawh khankix, jah

khaing nyiex lhaong pau tab khankix tom hoek ka veng pa kauxcong heue.

Grawng Pon Rhim Ka Haktiex Samarix

⁹ Ka daux yam kuang simiang Hezakiyax haktiex pon num tix num, mawh yam hoik kuang Hoshe kawn simex Elax simiang haktiex Isarelay aliah num tix num, Shalamaneza simiang haktiex Asurix hoek puing veng Samarix mai lailawm kah heue. ¹⁰ Yam hoik sidah loe num, kix hoik pon rhim ka veng an heue. Ka daux num yam hoik kuang Hezakiyax ka haktiex Hoshe simiang ceu pui Isarelay ka haktiex dim num tix num, veng Samarix hoik mawh pa pon rhim tix heue. ¹¹ Khaix an, simiang haktiex Asurix viex ceu pui Isarelay khankix hu ka haktiex Asurix mai deuh kix ot daux veng Halax mai veng Habaw pa koe hawt rawm klawng Gozan mai daux nyiex yaong veng pa koe ka daux haktiex Medix khankix heue. ¹² Kheu jao ang kix cu nghiet mai ang hawt ka lox Siyiex kix, kix hoik lud ka sijax mukheu Nawh Cao mai pa hoik tawm kawncau mau soi Siyiex Mose ka kix khawmuik heue.

Senakherix Rhim Haktiex

(2Bee 32:1-19, Isa 36:1-22)

¹³ Ka daux num yam kuang simiang Hezakiyax ka haktiex kao pon num tix num, Senakherix, simiang haktiex Asurix hoek puing ka veng pa kauxcong khawmuik ka daux haktiex Yudax mai rhim ka veng an khankix heue. ¹⁴ Khaix an, Hezakiyax simiang haktiex Yudax ploi pui hu ka simiang haktiex Asurix ka daux veng Lakhisha ah nin, "Aux hoik lud, deeh veeh pex ing khaing aux liak! Can pa sang sux maix aux khankix aux tak sang tawx khawmuik," Mai simiang haktiex Asurix sux ka Hezakiyax simiang haktiex Yudax ka mau loe yieh talatan mai khri tixngoe talatan heue. ¹⁵ Mawh kheu nan, Hezakiyax hoik tawx mau pa koe ka daux nyiex buan Siyiex mai cansinngaopa koe daux nyiexhaw simiang khawmuik ka nawh heue. ¹⁶ Ka daux yam an, Hezakiyax hoik kheet khri khaing piang siviex nyiex buan Siyiex khankix mai khaing piang rong pa hoik om Hezakiyax simiang haktiex Yudax lih mai tawx ankix ka simiang haktiex Asurix heue.

Senakherix Ah Ka Siyiex

¹⁷ Khaix an, simiang haktiex Asurix ploi cao kaing naing ting pa mawh Taratan mai cao kaing ting pa yuh kaing son nawh pa mawh Rabasarix mai khawm cao kaing ting pa kuang haktiex nawh pa mawh Rabashakhie lih hu khaing veng Lakhisha tau mai cub krunaing ting tix cub mai hu ka veng Yerusaliem sonsang puing ka simiang Hezakiyax heue. Kix hoik hu hoek ka veng Yerusaliem, yam hoik hoek bleeh kix tan, kix cung hawt rawm dung plak blaong pa koe daux krax hu daux kaung pui pa sidaux kraung heue. ¹⁸ Yam kokyo kix ka simiang, Eliakim kawn simex Hilakhix pa mawh cao kaing pa kuang ka daux cub nyiexma simiang Shebanax pa mawh cao tiem lai mai Yoax kawn simex Asaphax pa mawh cao mhai lox kum khankix hoik lih hoek ka kix heue. ¹⁹ Khaix an Rabashakhie ah nin ka kix, "Pex ah nin ka Hezakiyax simiang pa ting lhaong simiang haktiex Asurix hoik ah nin, grawng krax pa een maix rhawm tixyuh nin koe dee bleeh yuh ka mawh?" ²⁰ Maix krai lox grawng krax keud tix mai grawng koe riang rao tix son naing, viang mawh nan, ankix mawh lox pa giexgoing heue. Mawh een maix rhawm tix ka pui mawx sonsang tiehfeen tix ka aux lie?" ²¹ Jhak heue! maix lai kawn eenrhawm tix ka khaox grix priem pa hoik pot in pa mawh haktiex Ejiptux ka pui pa eenrhawm tix ka gawng priem an mai phlat ti laig daux taix nawh, mawh kheu nan, Pharaw haktiex Ejiptux tak mawh pa sang yuh nan ka kix khawmuik ka pui pa eenrhawm tix ka nawh heue. ²² Viang mawh nan, phan pex ah nin ka aux, yix eenrhawm ka daux Siyiex yix, ang hoik mawh Hezakiyax pa teei ti tik dee pa lhaong Nawh Cao mai khu dee tan an khankix hu mai pa ah nawh nin ka haktiex Yudax mai ka veng Yerusaliem, maix tak krub ka sivoie khu dee tan ka daux veng Yerusaliem lie?" ²³ Mawh kheu nan yam in tawx ceu pa kham maix mhairug ka cao simiang aux simiang haktiex Asurix mai phan maix pon sawg ka pui pa brug brung, aux sang tawx brung ka maix ra rheng mu heue. ²⁴ Phan ang mawh nan, maix sang pon

deeh tieh cao kaing naing pa kied iak cao simiang aux yuh ka mawx? Maix kawn een rhawm tix ka linglawx naing brung mai pui naing brung haktiex Ejiptux yuh ka mawx? ²⁵Yam in mawh hoek aux ti yuh haktiex dee in lauxleeing ka daux pa ang Siyiex tawx akhuang lie? Siyiex ah nin ka aux, hu puing ka haktiex in mai yuh lauxleeing.” ²⁶Khaix an, Eliakim kawn simex Hilakhix mai Shabanax mai Yoax khankix, ah nin ka Rabashakhie, “Yuh buanson krai ka kawncau maix khankix ka plak lox Surix liak, mawh kheu tawng yix ka lox an mai paw doh sikah lox Yudax ka yix, mawh kheu koe yhaok pui khankix ka piang guh veng heue. ²⁷Viang mawh nan, Rabashakhie ah nin ka kix, cao simiang aux ploi aux hoek ka cao simiang maix sonsang krai ka lox inkix mai ang hoik mawh khawm pui anix pa ngawm tix ot ka piang guh veng ka pui pa tak sang ih mai nyaux ka aing neem cao tix tau mai maix lie?” ²⁸Khaix an, Rabashakhie yaog ti cung mai riagyo lox pa kied ting ka plak lox Yudax ah nin, “Nghiet ka lox simiang pa ting Haktiex Asurix heue. ²⁹Mawh kheu nan, simiang ah nin, paw doh kieh Hezakiyax pielhen ka pex mawh kheu nawh ang pon taoh pex khaing daux tawm taix aux heue. ³⁰Paw kieh Hezakiyax yuh pex koe krax eenrhawm ka Siyiex, ka pa ah nin, Siyiex tak sang taoh ex tete, veng in tak mawh pa ang lai pon hoek ka daux tawm taix simiang haktiex Asurix heue. ³¹Paw nghiet ka lox Hezakiyax mawh kheu simiang haktiex Asurix hoik ah nin, yuh pa nhim tau mai aux mai hoek ka aux mai pui kukaux tak deeh tang ih khaing nhu plix siiet tix mai pui kukaux tang deeh nyaux rawm khaing daux dung cao tix, ³²tom hoek bawgyam teei aux pex hu ka haktiex tix dah pa awm haktiex pex, haktiex pa koe simie nghox, rawm plix siiet pa khraox, ceu pa ih, sipeem plix siiet, khaox sanlun mai rawm hia khankix sonsang ang pex yum mai sonsang im pex heue. Paw nghiet ka lox Hezakiyax, yam nawh jeehnyaw ah nin, Siyiex tak sang taoh ka ex heue. ³³Mawh hoik deeh pon taoh siyiex haktiex ceu pui mawx tix kaux kaux haktiex tix khaing daux

tawm taix simiang haktiex Asurix lie? ³⁴Mawh koe siyiex haktiex Hamat mai haktiex Apat dee mawx lie? Mawh koe siyiex haktiex Sepharavim haktiex Henax mai haktiex Iva khankix dee mawx lie? Mawh hoik deeh pon taoh kix veng Samarix khaing daux tawm taix aux lie? ³⁵Mawh siyiex khaing daux haktiex ceu pui mawx pa pon taoh haktiex tix khaing daux tawm taix aux, sang deeh taoh Siyiex ti teei veng Yerusalim khaing daux tawm taix aux lie?” ³⁶Viang mawh nan, pui khankix hoik yiienyawg tix mai ang lai pawk lox tix gum kawx, mawh kheu simiang hoik tawm lox ah nin, paw lai pawk lox nawh heue. ³⁷Khaix an, Eliakim kawn simex Hilakhix cao pa kuang ka daux nyiex simiang, Shabanax pa mawh cao tiem lai mai Yoax kawn simex Asaphax pa mawh cao mhai lox kum khankix, hoik riah kraung ceep tix mai hoek ka Hezakiyax mai krai lox pa ah Rabashakhie ka nawh heue.

Yudax Lawdluan Khaing Senakherix

19 (2Been 32:20-23, Isa 37:1-38)

Yam hoik mhong Hezakiyax ka lox ah kix, nawh riah kraung ceep tix mai fua tokaux tix ka chee rhix mai hu laig ka daux nyiex buan Siyiex heue. ²Khaix an, nawh ploi Eliakim cao kuang daux nyiexma simiang mai Shebanax cao tiem lai mai khrawm cub kuad cao giex kaing li khankix pa fua tokaux tix ka chee rhix hu ka cao jhai Isayax kawn simex Amok heue. ³Kix ah nin ka nawh, “Hezakiyax ah yuh nin, singaix in mawh singaix pa kharhawm mai pa koe lox ah lox ne mai lox sibriem awm hoik hoek bawgyam keh kawn ngie, viang mawh nan, ang lai koe riang rao ti keh heue. ⁴Ha Siyiex maix mhong ka lox krai Rabashakhie pa hoik ploi cao simiang nawh pa mawh simiang haktiex Asurix hoek ti bleeh ka Siyiex pa im ju mai Siyiex maix takdeeh nekagumlox pa mhong Nawh Cao khawmuik heue. Mawh kheu nan maix rawgbuan son pui pa kawn deuk khankix heue” ⁵Mawh kheu nan, kawncau simiang Hezakiyax khankix hoik bleeh ka Isayax heue. ⁶Isayax ah nin ka kix, “Pex krai yuh nin ka cao simiang pex, Siyiex ah nin, paw lhatgraung ka lox pa hoik mhong maix

khankix khaing cub kawncau simiang haktiex Asurix pa hoik sibriem ka Aux awx.”⁷ Aux tak kieh rhawm nawh sunsang mai nawh tak mhong lox satang mai deeh ing ka haktiex tix heue. Aux tak sang kieh nawh yum ka lawm vaid ka dauh haktiex nawh heue.

Lox Rawgbuan Hezakiyax

⁸Mawh kheu nan, Rabashakhie deeh ing mai yaox puing simiang haktiex Asurix ka veng Libanax, kheu hoik mhong nawh grawng lih hu simiang khaing veng Lakhisha heue. ⁹ Simiang mhong grawng hoek Tirakax, simiang haktiex Ethiopia haktiex Kusax mai nawh ah nin, “Jhak heue, nawh hoek ti sang yuh naing ka maix heue.” Mawh kheu nan, nawh deeh baiox ploi pui cau tix khankix hu ka Hezakiyax ah nin,¹⁰ “Pex krai ah nin ka Hezakiyax simiang haktiex Yudax paw doh kieh Siyiex een maix rhawm tix pielhen ka maix ah nin, veng Yerusaliem tak ang pon ap tix ka dauh tawm taix simiang Asurix heue. ¹¹ Jhak heue, mawh hoik mhong maix pa yuh cub simiang Asurix ka haktiex an khankix khawmuik mai pa ah nawh ti yuh kix lauxlak pakleeing khawmuik mai maix khex sang pon ti glawd khaing lie? ¹² Mawh hoik sax taoh lawd siyiex ceu pui meung haktiex khankix ka haktiex pa hoik yuh taxdu aux lauxleeing khankix pa mawh haktiex Gozan, Haram, haktiex Rezat mai ceu pui Eden khankix pa ot dauh veng Telasa lie? ¹³ Mawh koe simiang haktiex Hamat mai simiang haktiex Arapat mai simiang veng Sepharavim, veng Hanax mai veng Iva khankix dee mawx lie?” ¹⁴ Hezakiyax pon rieb lai khaing dauh tawm taix pui cau khankix mai hoik phat ka lai an mai Hezakiyax haok ka dauh nyiex buan Siyiex mai nih lai an ka plak sivoe Siyiex heue. ¹⁵ Khaix an, Hezakiyax rawgbuan ka plak sivoe ngai Siyiex ah nin, “O Siyiex ceu pui Isarela pa ot ka dauh sinax Cherubim eue, mawh ngie Maix Cao pa mawh Siyiex ka piang meung haktiex khawmuik, Maix Cao hoik phan raoma mai haktiex heue. ¹⁶ Siyiex eue, daong yaok Maix Cao mai nghiet heue. Simiang Siyiex eue, blah ngai Maix Cao mai jhak heue mai nghiet ka lox

kawncau Senakherix pa hoik ploi nawh hoek sibriem ka Siyiex pa im ju heue. ¹⁷ Siyiex eue, mawh tete, cub simiang Asurix khankix hoik yuh ceu pui khankix mai khawm haktiex khankix lauxleeing, ¹⁸ hoik tik kix ka dauh ngu, mawh kheu siyiex ankix ang tie mawh siyiex mai an hoik mawh pa yuh pui ka taix tix khankix pa mawh khaox mai simaiox khankix, mawh kheu nan, kix hoik yuh lauxleeing heue. ¹⁹ Siyiex ex eue, yam in aux rawgbuan, Maix Cao deeh taoh yix khaing tawm taix nawh, sonsang tawng meung haktiex pa koe piang ca haktiex in khawmuik ka mawh Maix Cao Siyiex tix kaux khaing heue.”

Gumlox Siyiex Son Sanakherib

²⁰Khaix an, Isayax kawm simex Amok hoik ploi pui hu ka Hezakiyax ah nin, “Siyiex ceu pui Isarela ah nin, grawng pa hoik rawg maix buan ka Aux sonsang puing ka Senakharib simiang haktiex Asurix Aux hoik mhong kah heue.” ²¹ In mawh gumlox pa krai Siyiex son nawh, bunkrih loig kawm sibun Zion hoik nunai ka maix hoik nyiah ka maix, kawm sibun veng Yerusaliem, hoik vudvied kaingtix ka maix! ²² Mawh hoik deuh maix phimap ka pui mawx mai hoik sibriem ka pui mawx? Mawh hoik riagyo maix lox tix ka pui mawx? Mai hoik yaog ngai tix lhaong ka piang pui mawx lie? Maix hoik yuh ceu ankix ka Siyiex pa singax singeh ceu pui Isarela heue. ²³ Maix kieh cao cau tix khankix, sibriem ka Siyiex mai hoik ah nin “Aux viex linglawx naing brung pa kied haohhun cie aux khankix laig ka choek gawng pa lhaong tom bleeh ka Lebanon. Aux tak kid ti tik khaox lhaong Arit khankix mai khawm khaox gix pa kied mhawm khankix, Aux sang laig ka dauh nong pa kied singai ka dauh haktiex khankix, ka dee raog khaox plix nawh khankix ka dauh nong heue. ²⁴ Aux kaong rawm dauh mai hoik nyaux rawm pui tang praix mai tiag caong aux dig ka rawm klawng Ejiptux khankix hit, ²⁵ mawh ang maix sax mhong ka grawng pa hoik yuh Aux tom didix lie? Jah ka tom yam an, Aux hoik yuh ceu ankix mawh sonsang mawh maix pa sang yuh veng pa kauxcong an khankix laux mai awm pum simaiox pa nainawk heue.

²⁶ Mawh kheu nan, pui veng khankix kix hoik iak riang heue. Kix hoik sikua rhawm mai kaig tua, kix hoik awm ribriem daux tiag mai taux lhax pa klai khankix, hoik awm rib kuah ka piang braux nyiex mai awm kawn nghox hoik fit sivoe ang nyang ting heue. ²⁷ Aux tawng dee ot dee koe maix, khawm dee lih dee laig maix mai krax songrhawm maix ka Aux heue. ²⁸ Mawh kheu krax songrhawm maix ka Aux mai lox pa nunai maix khankix hoik hoek ka daux yhaok Aux, mawh kheu nan, Aux tak sau gok Aux feuk ka meeh maix mai jup jheeh maix ka jup jheeh Aux mai Aux tak deeh kieh maix ing plak krax haok maix heue. ²⁹ In tak mawh mhairug ka son maix, maix tak ih canceu pa tang kuah ka daux num in mai ka daux ra num tix num maix tak yaog ti ih pa kuah awm an heue. Ka daux loe num tix num kawx mawh bawgyam rhuat simie mai vawg, sum sipeem plix siiet mai ih plix an khankix heue. ³⁰ Can pui pa kawn deuk mai pa glawd khaing daux nyiexma Yudax khankix, tak baoux kaux riah tom hoek plak greem mai tak deeh plix ka piang heue. ³¹ Can pui pa kawn deuk khankix tak lih hu khaing veng Yerusalieem mai pui pa glawd khankix tak lih hoek khaing gawng Zion heue. Krax koe rhawmrhi cao krunaing raoma, Siyiex pa ting lhaong ka piang khawmuik tak yuh ankix heue. ³² Mawh kheu nan, Siyiex ah yuh nin ka grawng simiang haktiex Asurix, nawh tak ang pon ti laig daux veng in mai ang pon tix puing te tin mai ang pon ti hoek ka plaksivoe veng tau mai kraung pa tiebtie mai ang pon ti pum tiex sonsang puing ka veng an heue. ³³ Nawh kaoh khaing krax mawx, nawh tak deeh ing krax an mai nawh tak ang pon ti laig ka daux veng in, in mawh pa ah Siyiex heue. ³⁴ Grawh grawng nawh, Aux tak tiebtie mai taoh ka veng in son min plakngai Tokaux Aux mai son min plakngai siliex Aux Davit heue. ³⁵ Ka daux sawm an kawncau Siyiex lih hu mai pah cub pui Asurix khankix tix sien daix mheen phuan rheng kaux ka dahdee bang kix mai yam kaoh pui plak ponngawb caocao jhak heue, pui khankix hoik mawh tokaux yum

heue. ³⁶ Mawh kheu nan, Senakherix simiang haktiex Asurix lih hu dee singai mai hoik deeh ing ka nyiex tix mai dah ti ot ka daux veng Nineve heue. ³⁷ Tix ngaix yam kawn krub nawh ka siyiex tix Nisarot ka daux nyiex siyiex kix, kawn simex nawh khankix pa mawh Adarameliet mai Sharezap hoik pah nawh yum ka vaid mai kiex hoik to ka haktiex Aramanix heue. Khaix an, kawn simex nawh Esarahadon deeh plud ti kuang haktiex ka dahdee ot nawh heue.

Hezakiyax Deeh Langju

20

(2Been 32:24-26, Isa 38:1-22)

Ka daux singaix an khankix Hezakiyax saux mai dex yum heue. Cao jhai Isayax kawn simex Amok hu ka nawh mai ah nin ka nawh, "Siyiex ah nin, khrerien ti deuh kaing nyiex maix, mawh kheu maix tak sang yum mai ang lai im ju heue." ² Khaix an, Hezakiyax veeh pakngai tix ka plak ding nyiex mai rawgbuan ka Siyiex ah nin heue. ³ "Siyiex eue, aux rawgbuan dohkeud ka aux ka daux krax lawng aux ka plak sivoe ngai Maix Cao, ka daux pa khawcaw mai krax pa kaux sijax khawm rhawm tix mai aux hoik yuh canceu pa mhawm khankix sivoe ngai Maix Cao heue." Hezakiyax yiem sigrien sigre heue. ⁴ Khaix an, Isayax lih hu yam ang nawh nyang bleeh ka daux sigreung nyiex haw gumlox Siyiex lih bleeh ka nawh ah nin, ⁵ deeh ing mai krai ka Hezakiyax pa mawh cao kaing cub ceu pui Aux khankix, Siyiex pa mawh, Siyiex keeing maix Davit ah nin, "Aux hoik mhong ka pa rawg maix buan, Aux hoik yaox ka rawm ngai maix, jhak heue, Aux tak deeh pai maix moi tete heue. Yam hoek loe ngaix tix ngaix maix tak haok bleeh ka daux nyiex buan Siyiex heue. ⁶ Aux tak baoux naok singaix pa im ju maix kao phuan num, Aux tak taoh maix khawm veng in khaing daux tawm taix simiang haktiex Asurix, Aux taktieb mai taoh ka veng in son min plakngai Tokaux Aux mai son min pakngai siliex Aux Davit heue." ⁷ Khaix an, Isayax deeh ah nin, "Tei sigleem plix ruh hoek tix sigleem heue. Mawh kheu nan, kix tei ankix mai kraix ka dee saux muad mai nawh deeh moi khaing saux tix heue." ⁸ Hezakiyax deeh ah nin ka Isayax, "Mawh koe

mhairug ceu patix sonsang pai Siyiex aux deeh moi mai sonsang pon haok aux ka nyiex buan Siyiex ka daux loe ngaix tix ngaix lie?"⁹ Khaix an, Isayax ah nin, "In mawh mhairug son maix khaing Siyiex sonsang yuh Siyiex ceu inkix pa hoik ah Nawh Cao. Mawh tak sang hu pangpeue sivoie kao taix, phan ang mawh nan, sang deeh plak khaix tix kao taix lie?"¹⁰ Hezakiyax deeh pawk lox ah nin, "Lih hu pangpeue sivoie kao taix mawh pa yie, viang mawh nan, aux simie veei deeh plak khaix kao taix heue."¹¹ Mawh kheu nan, cao jhai Isayax rawgbuan ka Siyiex mai Nawh Cao deeh kieh pangpeue deeh plak khaix kao taix, ka pa hoik luan hu ka piang nari singaix cie Ahaza heue.

Hezakiyax Pon Lai Khaing Babulon

(2Been 32:27-31, Isa 39:1-8)

¹²Ka daux bawgyam an, Berodakbaladan, kawn simex Baladan simiang haktiex Babulon tawx lai mai totaix hoek ka Hezakiyax, mawh kheu mhong nawh saox Hezakiyax heue.¹³ Hezakiyax gauxrhawm mai rieb ka kix mai jhi kix yaox nyiex krao sinngao nawh khankix mai khri, mau mai sidah bhawng mai bee kraix pa kied koe jum mai khawm nyiex krao kraung naing nawh khankix, khawm canceu pa hoik mox nawh khankix pa koe daux sinax kraung sinngao nawh khawmuik heue. Can pa koe ka daux nyiex mai can pa koe ka daux meung haktiex nawh khankix pa ang Hezakiyax jhi kix yaox ang lai koe pie tix ceu kawx heue.¹⁴ Khaix an, cao jhai Isayax hoek ka simiang Hezakiyax mai ah nin ka nawh, "Mawh ah pui inkix patix? Mai hoek kix ti yaox ka maix khaing dee mawx lie?" Hezakiyax ah nin, "Kix hoek khaing haktiex dee pa kied singai khaing Babulon heue."¹⁵ Isayax ah nin, "Mawh hoik yaox kix patix ka daux nyiex maix lie?" Mawh kheu nan, Hezakiyax deeh pawk lox ah nin, kix hoik yaox ka canceu pa koe ka daux nyiex aux khawmuik pa ang aux jhi kix yaox khaing daux sinngao pa koe aux khankix ang lai koe pie tix ceu kawx heue.¹⁶ Khaix an, Isayax deeh ah nin ka Hezakiyax, "Nghiet ka lox Siyiex heue.

20:17 Lih 2Sim 24:13, 2Been 36:10. **20:18** 2Sim 24:14-15, Dan 1:1-7. **21:2** Ye 15:4. **21:4** 2Sa 7:13.

¹⁷Jhak heue, singaix bawgyam tak sang hoek, can pa koe daux nyiex maix khankix khawmuik mai canceu pa hoik khrawm taxdu maix ti deuh tom hoek daux in singaix, tak teei hu ka veng Babulon, ang lai deuk pie tix ceu kawx, in mawh pa ah Siyiex heue.¹⁸ Kix tak sang teei kawn simex maix khankix hu dee singai tixblah, pa mawh kawn pa kaoh khaing maix mai kix tak mawh pui sieh ka daux nyiex haw simiang haktiex Babulon heue."¹⁹ Khaix an, Hezakiyax ah nin ka Isayax, "Gumlox Siyiex pa hoik krao maix mawh pa mhawm!" Nawh keud yuh nin, "Mawh krax pa nhim mai pa mawhmeh peung ang lai koe ceeix kawx ka daux singaix im ju aux lie?"

Grawng Yum Hezakiyax (2Been 32:32-33)

²⁰Yam in grawng kaing pa deuk Hezakiyax ti yuh khankix mai riang rao pa koe nawh mai grawng pa yuh nawh dung rawm mai rawm rawng pa viex rawm laig ka daux veng khankix, ang hoik mawh pa tiem ti deuh ka daux phuk lai grawng been cub simiang haktiex Yudax khankix lie?²¹ Mawh kheu nan, Hezakiyax hoik lauxlee tixtau maix taxdu nawh, khaix an, kawn simex nawh Manashe hoik deeh plud ti kuang ka dahdee ot nawh heue.

Manashe Kuang Ka Yudax (2Been 33:1-20)

21 Manashe koe ju kao ra num yam yaog nawh ti mawh simiang mai nawh kuang ka veng Yerusaliem tixphuan phuan num heue. Ceukaux miex nawh mawh Hephazibax heue.² Nawh yuh pa caoxcaig sivoie ngai Siyiex awm pa seeing brai ceu pui an khankix pa hoik grheu Siyiex lih khaing plak sivoie ngai pui Isarelix khankix heue.³ Nawh deeh sum dee pa lhaong khankix pa hoik yuh keeing nawh Hezakiyax lauxleeing, nawh deeh sum khu dee tan khankix son Balax mai yuh khaox rieanggrang siyiex Asherax khankix awm pa yuh Ahap simiang haktiex Isarelix mai nawh krub ka pa koe piang raoma khankix mai yuh kaing jhaw kix heue.⁴ Nawh baux sum khu dee tan ka dauxnyyex buan Siyiex pa hoik sax krao Siyiex yuh nin, "Aux tak deuh min ceukaux Tix ka daux veng Yerusaliem heue."⁵ Nawh sum khu dee tan son pa koe piang raoma khankix ka

daux sigreung biang nyiex buan Siyiex khawm ra plak heue. ⁶ Nawh gleeing ti tan kawm simex tix ka ngu mai gau tix ka lox sibawk mai shiao ka pa chix simeed mai yuh paoxpie tau mai krax keud krax sawn khaing phicaox mai khawm pa yuh singie khankix heue. Nawh hoik nie yuh pa caoxcaig ka plak sivoe ngai Siyiex sonsang so pa songrhawm Nawh Cao heue. ⁷ Nawh kawm deuh rieanggrang Asherax pa yuh nawh ka khaox tix mu ka daux nyiex buan awm pa hoik sax krai Siyiex ka Davit mai ka kawm simex nawh Sawlamon yuh nin, “Ka daux nyiex buan in mai ka daux veng Yerusaliem pa hoik laug Aux ti deuh khaing doehru pui Isarelix khankix, Aux tak deuh min ceukaux Tix tan leeingju heue. ⁸ Phan kix priex rhawm ti hawt yuh awm gumlox pa hoik tawm Aux ti deuh ka kix mai awm gumlox been pa hoik tawm kawncau Aux Mose ti deuh ka kix mai aux tak ang lai kieh caong ceu pui Isarelix khankix vungviang khaing haktiex pa hoik tawx Aux ka keeing kix heue.” ⁹ Viang mawh nan, kix ang cu ti nghiet mai Manashe hoik nyawglaw kix yuh pa caoxcaig nielheu khaing ceu pui khankix pa hoik yuh Siyiex kix lauxleeing ka plak sivoe pui Isarelix heue. ¹⁰ Siyiex krai khaing cao jhai pa mawh kawncau mau soi Nawh khankix ah nin, ¹¹ “Mawh kheu hoik yuh Manashe simiang haktiex Yudax ka ceu pa seeing brai inkix, nawh hoik yuh pa nielheu caox khaing pui Amawrix khankix pa koe phaoka nawh mai nawh baox yuh pui Yudax koe pa lud tau mai rieanggrang pa krub nawh khankix heue.” ¹² Mawh kheu nan Siyiex ceu pui Isarelix ah nin, “Jhak heue, Aux tak viex krax pa kharhawm hoek ka piang veng Yerusaliem mai haktiex Yudax, can pui pa mhong grawng an khankix tak laklheit yhaok ka khawm ra khawn heue. ¹³ Aux tak tok ka maox tiag Samarix mai maox ciang tiag ka nyiexma Ahap ka piang veng Yerusaliem, Aux tak awt ka veng Yerusaliem awm awt pui ka tawg klong mai gup kah heue. ¹⁴ Aux tak teei ti tik pui pa mawh sinngao Aux khankix mai ap ti tawx kix ka daux tawm

taix pui koeng kix mai kix tak mawh pui pa kham pa giexgang ka pui koeng kix khawmuik, ¹⁵ mawh kheu hoik yuh kix pa caoxcaig ka daux ngai Aux mai yuh Aux songrhawm, jah tom singaix lih hu kix khaing haktiex Ejiptux, tom hoek in singaix heue. ¹⁶ Lheu khaing an, Manashe hoik yuh nham pui pa ang koe phimap khankix jah tomnie, tom hoik kieh veng Yerusaliem naog ka nham jah khaing plak in tom hoek plak an, lheu khaing phimap pa yuh nawh mai kieh pui Yudax khankix lud ka daux pa yuh kix pa caoxcaig sivoe ngai Siyiex heue. ¹⁷ Yam in, grawng kaing pa deuk Manashe mai can pa hoik yuh nawh khankix mai phimap pa hoik lud nawh khankix, ang hoik mawh pa tiem ti deuh ka daux phuk lai grawng been cub simiang haktiex Yudax lie? ¹⁸ Mawh kheu nan, Manashe hoik lauxlee tix tau mai taxdu nawh khankix mai sipaung nawh ka daux sipeem nyiex haw nawh ka daux sipeem Awza heue. Khaix an, kawm simex nawh Amon deeh plud ti kuang ka dahdee ot nawh heue.

Krax Kuang Amon (2Been 33:21-25)

¹⁹ Amon hoik koe ju tixnga ra num yam mawh nawh simiang mai nawh kuang ka veng Yerusaliem ra num heue. Ceukaux miex nawh mawh Meshulemiet kawm sibun Haruza khaing veng Yotaba heue. ²⁰ Nawh yuh pa caoxcaig ka daux ngai Siyiex, awm pa yuh keeing nawh Manashe heue. ²¹ Mawh kheu nan, nawh hawt hu ka daux krax pa lawng keeing tix khawmuik mai nawh yuh kaing jhaw pa hoik yuh keeing tix mai krub ka ankix heue. ²² Nawh hoik tikvud ka Siyiex keeing tix khankix mai nawh ang lai hawt grawng lawng khaix Siyiex heue. ²³ Khaix an, kawncau Amon khankix hoik rom ti tiehfeen ka nawh mai pah simiang yum ka daux nyiex haw nawh heue. ²⁴ Pui haktiex khankix pah ka pui pa rom ti tiehfeen ka Amon khankix heue. Khaix an pui haktiex an khankix yaog kawm simex nawh Yosiyax mawh simiang ka dahdee ot nawh heue. ²⁵ Yam in, grawng kaing pa deuk Amon mai pa hoik yuh nawh khankix, ang hoik mawh pa tiem ti deuh ka daux phuk lai grawng been cub simiang haktiex Yudax khankix lie? ²⁶ Sipauung nawh ka daux simeeig

nawh pa koe ka daux sipeem Awza heue. Khaix an, kawm simex nawh Yosiyax deeh plud ti kuangka dahdee ot nawh heue.

22 *Krax Kuang Yosiyax* (2Been 34:1-2) Yosiyax hoik koe ju daix num yam yaog nawh ti mawh simiang mai nawh kuangka veng Yerusaliem tixngoe tix num heue. Ceukaux miex nawh mawh Yedidax kawm sibun Adeyax khaing veng Bozakat heue. ² Nawh hoik yuh pa khawcaw ka sivoie ngai Siyiex mai hawt grawng lawng khaix keeing nawh Davit, nawh ang lai veeh tix plak dawm mai plak goix heue.

Yaoux Phuk Lai Been Pingnyap (2Been 34:8-33)

³Yam hoik kuang simiang Yosiyax ka haktiex kao num tix num, simiang ploi cao tiem lai tix Shaphan pa mawh kawm simex Azaliyax kawm simex Meshulam hu ka nyiex buan Siyiex ah nin, ⁴“Hu ka cao giex kaing li ting Hilakhix kieh nawh simin ka mau pa hoik viex tix laig ka daux nyiex buan Siyiex pa hoik khrawm cao pau siviex khaing pui khankix heue.” ⁵Kieh kix ap ka daux tawm taix pui pa yuh kaing pa kiangiien ka nyiex buan Siyiex, kieh kix tawx ankix ka pui pa yuh kaing ka daux nyiex buan Siyiex sonsang deeh cox ka dee laux nyiex buan, ⁶son cao chix kaing khaox mai son pui sum nyiex khankix mai son cao chix sang simaox mai son pa liag kix khaox mai lon simaox pa hoik saik tix khankix sonsang deeh cox nyiex buan heue. ⁷“Viang yuh ka mawx kawx kix ang lai jhi carang mai ap ti tawx mau ka daux tawm taix kix kheu mawh kix pui pa yuh kaing mai pa kaux sijax heue.” ⁸Khaix an, cao giex kaing li ting Hilakhix ah nin ka Shaphan pa mawh cao pa tiem lai, “Aux hoik yaoux phuk lai been pingnyap ka daux nyiex buan Siyiex heue.” Hilakhix tawx phuk lai an ka Shaphan mai nawh phat kah heue. ⁹Mawh kheu nan, Shaphan cao pa tiem lai hu ka simiang mai viex grawng an hoek ka simiang ah nin, “Kawncaw mau soi maix khankix hoik khrawm ti simin mau pa koe ka daux nyiex buan mai hoik ap ka daux tawm taix pui pa yuh kaing mai pui pa kiangiien ka nyiex buan khankix heue.” ¹⁰Khaix an, Shaphan cao tiem lai jhi simiang yaoux ah nin, “Cao giex kaing li

Hilakhix tawx phuk lai ka aux tix pheem heue.” Shaphan phat lai an plak sivoie simiang heue. ¹¹Yam hoik mhong simiang ka gumlox phuk lai been pingnyap an mai nawh riah ka kraung ceep tix heue. ¹²Khaix an, simiangtawmlox ka caogiexkaingli Hilakhix mai ka Ahikam kawm simex Shaphan mai ka Akhabaw kawm simex Mikhayax mai ka Shaphan cao pa tiem lai mai ka Asiyax kawncaw simiang ah nin, ¹³“Hu chawk ka Siyiex ka son aux mai son pui khankix son ceu pui Yudax khawmuik, son grawng gumlox phuk lai in pa hoik yaoux ti mawh kheu jao hoik kied songrhawm Siyiex ka piang ex, grawh grawng nawh taxdu ex khankix hoik ang cu nghiet ka gumlox pa koe ka daux phuk lai in, ang hawt yuh awm pa hoik tiem tix khawmuik ka grawng pa dexdawd mai ex heue.” ¹⁴Mawh kheu nan, cao giex kaing li Hilakhix, Ahikam, Akhabaw, Shaphan mai Asiyax khankix hu ka Hulata cao jhai sibun pa mawh moeng Shalum kawm simex Tikava, kawm simex Harahap pa mawh cao pa paunyiex deuh sibex heue. Sibun an ot ka plak praix veng Yerusaliem heue. Kix sikah tau mai sibun an heue. ¹⁵Sibun an ah nin ka kix, “Siyiex ceu pui Isarela ah nin, krai ka pui pa hoik ploi pex hoek ka aux heue. ¹⁶Siyiex ah yuh nin, jhak heue, Aux tak viex krax pa kharhawm ka dee in mai ka piang pui ot baoh in mhong ka gumlox pa koe ka daux phuk lai pa hoik phat simiang Yudax khawmuik heue. ¹⁷Mawh kheu kix hoik tikvud ka Aux mai kix gleeing nyawng bhawng ka siyiex tang kaux tang hak khankix, sonsang so kix Aux songrhawm ka kaing pa yuh kix ka taix tix khankix heue. Mawh kheu nan, krax songrhawm Aux tak lih ka dee in mai ang chix yeet heue. ¹⁸Viang mawh nan, son simiang haktiex Yudax pui pa hoik ploi pex hoek ti chawk ka Siyiex, ka grawng in pex tak deeh ing krai ka nawh yuh nin, Siyiex ceu pui Isarela ah nin, ka son grawng lox pa hoik mhong maix khankix, ¹⁹mawh kheu hoik mhong maix ka lox ghat Aux ka dee in mai ka pui pa ot baoh tin khankix tak sang lih mawh pa prah ti riem mai pa jhaxlawg mai tom koe pa awnrhawm awnrhi mai pa tiem rhawm mai

riah kraung ceep ti yiemyo ka plak sivoe Aux, mawh kheu nan, Aux tom nghiet ka lox maix, in mawh lox ah Siyix heue. ²⁰Mawh kheu nan, Aux tak khrawm maix hu ka taxdu maix khankix mai maix tak mawh pa khrawm ti ka simeeig mai ka daux pa nhim mai ngai maix tak ang yaox pa kharhawm an khankix ka pa sang viex Aux hoek ka piang dee in." Mawh kheu nan, gumlox an hoek ka simiang heue.

23 *Yosiyax Cox Pang Krax Krub*

Khaix an, simiang ploi kix kraikhrawm kuad riex ju haktiex Yudax mai veng Yerusaliem khawmuik hoek ka nawh heue. ² Simiang haok laig ka daux nyiex buan Siyix tau mai pui haktiex Yudax khankix mai can pui pa ot ka daux veng Yerusaliem khankix, khawm cao giex kaing li, cao jhai mai pui ting pui iak khawmuik mai nawh phat kix mhong gumlox phuk lai sijax mukheu pa hoik yaox ka daux nyiex buan Siyix heue. ³ Simiang cung hawt rong mai yuh sijax mukheu ka plak sivoe ngai Siyix sonsang hawt khaix Siyix mai priexrien ka lox tawm pingnyap Nawh Cao khankix, lox kham mhairug Nawh Cao khankix mai lox tat jhawm prawng Nawh Cao tau mai khawm rhawm mai khawm ju kix khawmuik, sonsang hawt yuh awm lox sijax mukheu pa hoik tiem ka daux phuk lai in mai pui khawmuik cung mai kham ka lox sijax mukheu in heue.

Krax Deeh Cox Yosiyax (2Been 34:3-7)

⁴ Simiang tawx lox ka Hilakhix cao giex kaing li ting mai cao giex kaing li ra kaux tix kaux khankix mai ka cao pau diang siviex, kieh kix gah kraung khrai pa hoik koe son Balax mai son siyix Asherax mai son pa koe ka piang raoma khankix lih khaing ka daux nyiex buan Siyix mai nawh gleeing ankix ka plak praix veng Yerusaliem daux lung Kidaron mai deeh viex nyaox an ing ka veng Betelax heue. ⁵ Nawh teei ti tik cao giex kaing li pa krub rieanggrang khankix, pa hoik yaog cub simiang haktiex Yudax ti deuh sonsang gleeing nyawng bhawng ka piang dee pa lhaong khankix pa koe ka daux veng haktiex

Yudax mai pa koe hawt vungviang haktiex Yerusaliem khankix mai pui pa hoik gleeing nyawng bhawng ka Balax, ka singaix, ka khix mai ka tokraung pa koe ka piang raoma khawmuik heue. ⁶ Nawh gah ti tik rieanggrang Asherax khaing nyiex buan Siyix mai viex hoek ka praok rawm klawng Kidaron plak praix veng Yerusaliem mai gleeing ankix ka praok rawm klawng Kidaron mai tawk tom phawng awm nyaox mai rhuat ka piang simeeig pui hun heue. ⁷ Nawh yieh ti tik nyiex ot simex kroh coh kaux pa koe ka daux nyiex buan Siyix ka dee taing sibun khankix man pa takteue tix son khaox rieanggrang Asherax heue. ⁸ Nawh viex cao giex kaing li khankix hoek khaing veng pa koe daux haktiex Yudax khankix mai yuh pa seeing brai ka dee pa lhaong an khankix dee pa gleeing cao giex kaing li nyawng bhawng, jah ka veng Gebax tom hoek ka veng Berashebax khankix, nawh baox yieh ti tik dee pa lhaong khankix pa koe hawt siviex veng dee laig ka siviex veng Yawsux pa mawh cao kuang veng, pa ot ka plak goix siviex veng heue. ⁹ Viang yuh ka mawx kawx, cao giex kaing li dee pa lhaong khankix ang lai hoek ka khu dee tan Siyix ka daux veng Yerusaliem, viang mawh nan, kix ih blah pa ang viex susaix ka daux sinax puxaik kix heue. ¹⁰ Nawh kiehbaoh haktiex Tawphiet pa koe ka daux ngawd kawn simex Hionon seeing brai son ang pui tix kaux kawx lai kieh kawn simex kawn sibun tix tan gleeing daux ngu ka siyix Moliet heue. ¹¹ Simiang teei ti tik brung khankix pa appong cub simiang haktiex Yudax ti tan ka singaix pa koe hawt diang siviex nyiex buan Siyix hawt lawg nyiex Natameliet pa mawh cao kaing pa ot rawb biang nyiex an mai nawh gleeing ti tik linglawx brung singaix khankix ka ngu heue. ¹² Khu dee tan pa koe piang braux thaix plak piang Ahaza pa yuh cub simiang haktiex Yudax khankix mai khu dee tan pa yuh Manashe ka biang nyiex buan Siyix khawm ra plak, simiang yieh ti tik ankix mai lah tom phawng mai tik phawng nyaox khankix ka daux rawm klawng Kidaron heue. ¹³ Simiang hoik kieh dee pa lhaong pa koe plak toh khaing veng Yerusaliem seeing brai pa koe

23:4-6 2Sim 21:3, 2Been 33:3. **23:10** Ye 7:31, 19:1-6, 32:35. **23:12** 2Sim 21:5, 2Been 33:5. **23:13** 1Sim 11:7.

plak jee gawng pa lauxleeing pa hoik sum Sawlamon simiang ceu pui Isarelax ti deuh son Ashatawriet pa mawh siyiex pa seeing brai cie ceu pui Sidon mai son Khemawsha pa mawh siyiex pa seeing brai cie ceu pui Mawbax mai son Milakom pa mawh siyiex pa seeing brai cie pui Amon khankix. ¹⁴Mai nawh tawk toing ka rieanggrang simaox khankix tom phawng mai kid ti tik khaox rieanggrang Asherax khankix mai hoik kieh dee an naog ka si-ang pui yum heue. ¹⁵Lheu khaing an khu dee tan pa koe daux veng Betelax mai dee pa lhaong pa yuh Yerobom kawn simex Nebat ceu pui Isarelax koe krax phit lud, khawm khu dee tan mai dee pa lhaong an khankix, nawh yieh ti tik mai gleeing ka dee pa lhaong mai lah an kix tom phawng mai gleeing ti tik khaox rieanggrang Asherax khankix heue. ¹⁶Yam deeh veeh Yosiyax ti jhak, nawh yaox ka simeeig pa koe ka piang gawng mai nawh ploi pui hu koih ti teei si-ang khankix khaing daux simeeig mai gleeing si-ang ankix ka piang khu dee tan mai yuh seeing brai awm gumlox pa grux krai Siyiex pa hoik krai pao pui Siyiex khankix heue. ¹⁷Khaix an, nawh ah nin, "Lon simaox simeeig pa yaox aux in mawh patix lie?" Mai pui veng khankix deeh krai ka nawh, "An mawh simeeig pui Siyiex pa hoek khaing haktiex Yudax mai pa hoik krai pao inkix pa hoik yuh maix ka piang khu dee tan veng Betelax heue." ¹⁸Nawh ah nin, "Grham nawh koe tan heue, paw kieh pui tix kaux kawx gah ka si-ang nawh heue." Mawh kheu nan, kix prah si-ang nawh ot tan tau mai si-ang cao jhai pui hoek khaing veng Samarix heue. ¹⁹Khaix an, Yosiyax teei ti tik nyiex moeg dee pa lhaong khawmuik pa koe ka daux nyiex yaong veng Samarix pa yuh cub simiang Isarelax ti kieh Siyiex songrhawm mai nawh yuh ka kix awm pa hoik yuh nawh ka veng Betelax heue. ²⁰Nawh pah ka cao giex kaing li dee pa lhaong pa ot hawt khu dee tan khankix mai gleeing si-ang pui khankix ka piang khu dee tan mai nawh deeh ing ka veng Yerusalieim heue.

23:15 1Sim 12:33. 23:16 1Sim 13:2.

Grawng Priex Ka Pawie Pasakha

(2Been 35:1-19)

²¹Khaix an, simiang tawx lox ka pui khankix ah nin, "Priex ka pawie Pasakha Siyiex pex awm pa hoik tiem ti deuh ka daux phuk lai sijax mukheu in heue." ²²Pawie Pasakha pa awm in ang lai sax yuh tete glang kuang cao prawnsee khankix ka ceu pui Isarelax mai ka glang kuang simiang Isarelax mai cub simiang Yudax khankix ka haktiex heue. ²³Viang mawh nan, ka daux num yam kuang simiang Yosiyax ka haktiex kao daix num tix num mai yuh pawie Pasakha in ka plak sivoe Siyiex ka daux veng Yerusalieim heue. ²⁴Lheu khaing an, Yosiyax teei ti tik pui pa chix simeed mai pa koe khuan singie khankix mai khawm rieanggrang pa krub pui khankix mai canceu pa seeing brai khawmuik pa hoik yaox ka daux Yudax mai ka daux veng Yerusalieim, nawh hoik hawt yuh awm gumlox been pingnyap pa tiem ka daux phuk lai an, pa yaox cao giex kaing li Hilakhix ka daux nyiex buan Siyiex heue. ²⁵Phao voe nawh ang lai koe simiang pa awm nawh tix kaux kawx, pa deeh veeh ti ing ka Siyiex mai khawm rhawm tix mai khawm ju tix mai riang rao tix khawmuik, awm lox tat jhawm prawng Mose khawmuik, khaix nawh pui pa awm nawh ang lai koe tix kaux kawx heue.

Krax Prawngca Haktiex Yudax

²⁶Viang yuh ka mawx kawx Siyiex ang nyang veeh tix khaing pa kied songrhawm Nawh Cao tau mai pa songrhawm ka pui Yudax khankix mawh kheu ceu pa lud yuh Manashe hoik so ti kieh Nawh Cao songrhawm heue. ²⁷Siyiex ah nin, "Aux tak tikvud ceu pui Yudax khaing plak sivoe ngai Aux awm hoik tikvud Aux ka ceu pui Isarelax khankix mai aux tak tikvud ka veng Yerusalieim in pa hoik laug Aux mai ka nyiex buan pa hoik ah Aux yuh nin, min ceukaux Aux tak koe tan heue."

Yosiyax Yum Ka Daux Naing (2Been 35:20-27)

²⁸Yam in, grawng kaing pa deuk Yosiyax mai canceu pa hoik yuh nawh khankix, ang mawh pa tiem ti deuh ka daux phuk lai grawng been cub simiang ceu pui Yudax khankix lie?

²⁹ Ka dauw bauxju mawh Yosiyax simiang, Pharawnekhaw simiang haktiex Ejiptux haok puing simiang haktiex Asurix tom hoek ka rawm klawng ting Upharat mai simiang Yosiyax hu rieb ti puing ka nawh mai Pharawnekhaw yaox ka Yosiyax mai pah nawh yum ka dauw veng Megidaw heue. ³⁰ Kawncau nawh khankix teei ti sau tokaux yum nawh ka piang linglawx naing brung lih hu khaing veng Megidaw mai viex hoek ka veng Yerusaliem mai sipaung nawh ka dauw simeeig nawh heue. Pui haktiex khankix deeh teei Yohohaza kawm simex Yosiyax mai groi rawm bee ka piang nawh mai yaog nawh mawh simiang ka dahdee ot keeing nawh heue.

Yehohaza Kuang Haktiex (2Been 36:1-4)

³¹ Yehohaza koe ju tixnga loe num yam mawh nawh simiang mai nawh kuang ka veng Yerusaliem loe khix heue. Ceukaux miex nawh mawh Hamotalax kawm sibun Yeramix pui veng Lebanax heue. ³² Nawh yuh pa caoxcaigsivoe ngai Siiyex awm pa hoik yuh taxdu nawh khankix heue. ³³ Pharawnekhaw giex ti sau nawh ka dauw thawng veng Rebalaxka dauw haktiex Hamat sonsang ang nawh pon kuang ka dauw veng Yerusaliem mai nawh mhaing keen ka dauw haktiex Yudax, ka mau tixyieh talantan mai khri tix talantan heue. ³⁴ Pharawnekhaw deeh yaog Eliakim kawm simex Yosiyax mawh simiang ka dahdee ot keeing nawh Yosiyax mai deeh loh ceukaux nawh mawh Yehoyakim mai Pharaw viex Yehohaza ing ka haktiex Ejiptux mai Yehohaza yum tan heue.

Yehoyakim Kuang Haktiex Yudax

(2Been 36:5-8)

³⁵ Mawh kheu nan, Yehoyakim tawx mau mai khri ka Pharaw, viang mawh nan, nawh deeh koh keen ka pui haktiex sonsang tawx mau awm gumlox pa tawm Pharaw, nawh khin ti koh mau mai khri khaing pui haktiex ka pui kukaux awm pa goih nawh ti mhaing sonsang pon tawx nawh ka Pharawnekhaw heue. ³⁶ Yehoyakim koe ju tixngaphuan num,

23:34 Ye 22:11-12. 23:36 Ye 22:18-19, 26:1-6, 35:1-19. 24:1 Ye 25:1-38, Dan 1:1-2.

yam mawh nawh simiang mai nawh kuang ka veng Yerusaliem kao tix num heue. Ceukaux miex nawh mawh Zebudax kawm sibun PetayaxkhaingvengRumaheue. ³⁷ Nawhyuh pa caoxcaig sivoe ngai Siiyex awm pa hoik yuh taxdu nawh khankix heue.

24 *Pui Koeng Pex Haktiex Yudax*

Ka dauw bauxyam kuang simiang Yehoyakim, Nebukhaneza simiang haktiex Babulon hoek ti yuh naing mai Yehoyakim hoik yaox ti mawh siliex nawh loe num, khaix an mai nawh deeh pon tiehfeen ka nawh heue. ² Siiyex ploie cub krunaig pui Khaladie, cub krunaig pui Surix, cub krunaig pui Mawbax mai cub krunaig pui Amon khankix, hoek ti puing ka nawh, Nawh Cao hoik ploie kix hu puing ka haktiex Yudax sonsang yuh haktiex an lauxleeing awm gumlox Siiyex pa hoik krai ka cao jhai kawncau Nawh Cao khankix heue. ³ Grawng pa lih ceu in ti hoek ka piang haktiex Yudax, mawh sonsang gah Siiyex ti tik kix khaing plak sivoe ngai Nawh Cao, kheu jao phimap pa hoik yuh Manashe khankix heue. ⁴ Mawh kheu jao pah nawh pui pa ang koe phimap mai nawh hoik kieh nham pa ang koe phimap naog ka dauw veng Yerusaliem, ankix hoik mawh pa ang Siiyex pon pluatploie kah heue. ⁵ Grawng kaing pa deuk Yehoyakim khankix mai can pa hoik yuh nawh khawmuik, ang mawh pa tiem ti deuh ka dauw phuk lai grawng been cub simiang haktiex Yudax khankix lie? ⁶ Mawh kheu nan, Yehoyakim hoik lauxlee tix tau mai taxdu nawh, khaix an, kawm simex nawh Yehonix hoik plud ti kuang ka dahdee ot nawh heue. ⁷ Simiang haktiex Ejiptux, ang lai lih khaing dauw haktiex tix khaix in tix bawg kawx, grawh grawng nawh, simiang haktiex Babulon hoik rhim ti teei haktiex cie simiang Ejiptux jah khaing mee rawm klawng Ejiptux tom hoek ka rawm klawng Yufrethix khankix heue.

Krax Khamgeu Yehonix (2Been 36:9-10)

⁸ Yehonix hoik koe ju kao daix num, yam mawh nawh simiang mai nawh kuang ka dauw veng Yerusaliem loe num heue. Ceukaux miex nawh mawh Nehushata kawm sibun Elanatan khaing veng Yerusaliem heue.

⁹Nawh yuh pa caoxcaig plak sivoe ngai Siyiex awm pa hoik yuh keeing nawh heue. ¹⁰Daux bawgyam an, siliex Nebukhaneza simiang haktiex Babulon hoek puing ka veng Yerusaliem mai lailawm ka veng an heue. ¹¹Nebukhaneza simiang haktiex Babulon hoek puing veng, daux bawgyam lailawm siliex nawh khankix ka veng heue. ¹²Khaix an, Yehonix simiang Yudax, miex nawh, kawncaw nawh, kawncaw simex nawh mai cao kaing lum nawh khankix lih hu ka simiang haktiex Babulon mai bauxyam kuang simian haktiex Babulon ka haktiex daix num tix num, simiang haktiex Babulon hoik viex nawh ing awm pa giexlaung heue.

Grawng Rhim Ti Teei Yerusaliem

¹³Nawh hoik teei ti viex sinngao ka daux nyiex buan Siyiex mai sinngao daux nyiex haw simiang khankix mai nawh gaing ti tik kraung khri pa hoik yuh Sawlamon simiang ceu pui Isarelaix ti deuh daux nyiex buan Siyiex khawmuik awm pa hoik kraix Siyiex heue. ¹⁴Nawh giex ti viex pui veng Yerusaliem khankix tau mai pui naing vao mai pa koe riang rao khawmuik tix mheen kaux mawh pui pa giexlaung mai pui pa yuh kaing taix kuceu mai pa yuh kaing mau kaing khri kuceu khankix heue. Lheu khaing pui hotsia ang lai prah tix kaux kawx daux haktiex an heue. ¹⁵Nawh giex ti viex Yehonix ing ka Babulon tau mai miex simiang, lauxsimiang khankix, cao kaing lum nawh mai khawm pui haktiex pa koe riang rao nawh, giex ti viex kix mawh pui pa giexlaung khaing veng Yerusaliem hoek ka Babulon heue. ¹⁶Can pui pa koe riang rao khankix aliah rheng kaux mai pui pa yuh kaing taix mai kaing mau kaing khri khankix tix rheng kaux mai can pui pa koe riang rao ti puing naing khawmuik, simiang Babulon rhim ti viex kix ing mawh pui pa giexlaung ka haktiex Babulon heue.

Zedekiyax Kuang Ka Haktiex Yudax

¹⁷Khaix an, simiang Babulon yaog Matania pa mawh keeing iak Yehonix mawh simiang ka dahdee ot nawh mai loh ceukaux nawh mawh Zedekiyax heue.

24:12 Ye 22:24-30, 24:1-10, 29:1-2. **24:15** Yez 17:12. **24:17** Ye 37:1, Yez 17:13. **24:18** Ye 27:1-22,

Krax Kuang Zedekiyax (2Been 3:6-11; Ye 52:1-3)

¹⁸Zedekiyax koe ju tixnga tix num, yam mawh nawh simiang mai nawh kuang ka daux veng Yerusaliem kao tix num heue. Ceukaux miex nawh mawh Hamutalax kawncaw sibun Yeramix khaing veng Libanax heue. ¹⁹Nawh yuh pa caoxcaig plak ngai Siyiex awm pa hoik yuh Yehoyakim khawmuik heue. ²⁰Mawh kheu jao pa songrhawm Siyiex, in hoik lih ti mawh ka daux veng Yerusaliem mai ka haktiex Yudax sonsang ghoikti tikvud kix lih khaing plak sivoe Nawh Cao heue. Khaix an, Zedekiyax yaog ti tiehfeen ka simiang Babulon heue.

Grawng Som Veng Yerusaliem

25 (Ye 39:1-7; 52:4-11)

Daux bawgyam kuang Zedekiyax ka haktiex dim num ka daux khix Kao, kao ngaix tix ngaix, ka daux khix an, Nebukhaneza simiang Babulon mai cub krungaing nawh khawmuik hoek puing ka veng Yerusaliem mai lailawm ka vungviang veng mai kaong ka guh veng heue. ²Mawh kheu nan, kix hoik lailawm ka veng an tom hoek baux num kuang simiang Zedekiyax ka haktiex kaotix num tix num heue. ³Yam hoek ka daux khix pon dim ngaix, sibhawm praix pa kied langteung lih koe ka daux veng mai pa ih khankix ang lai koe ka son pui haktiex heue. ⁴Khaix an, guh veng hoik bhieh mai pui naing khankix hoik to daux sawm an ka diang siviex sinax guh veng ra mu ka plak sipeem simiang, mawh kheu pui Khaladie khankix lailawm vungviang mai yuh veng laux heue. Simiang to lih ka plak daux lung heue. ⁵Viang mawh nan, cub krungaing Khaladie khankix hawt khaix simiang, kix krup nawh ka daux lung Yerikho heue. Cub krungaing nawh khawmuik hoik prungprang khaing nawh heue. ⁶Mawh kheu kix pon giex simiang mai viex nawh hoek ka simiang Babulon ka veng Ribalax mai kix prawngca ka nawh heue. ⁷Khaix an, kix pah ka kawncaw simex Zedekiyax ka plak sivoe ngai nawh mai kix koik sok ngai Zedekiyax lih mai phiawk nawh ka maox tawng mai viex nawh ing ka veng Babulon heue.

28:1-17. **24:20** Yez 17:15. **25:1** Ye 21:1-10, 34:1-5, Yez 24:2. **25:4** Yez 33:21. **25:7** Yez 12:13. **25:9** 1Sim 9:8.

Grawng Phiawk Ka Yudax

(2Been 36:17-21, Ye 39:8-10, 52:12-30)

⁸ Yam kuang simiang Nebukhaneza ka haktiex Babulon kao dim num, khix phuan, daux aliah ngaix tixngaix Nebuzaradan cao kaing pa pau simiang mai kawncau simiang haktiex Babulon hoek ka veng Yerusaliem heue. ⁹ Nawh hoik gleeing nyiex buan Siyiex mai nyiex haw simiang, can nyiex pa koe ka daux veng Yerusaliem mai can nyiex pui ting khankix hoik gleeing ka ngu heue. ¹⁰ Cub krungaing ceu pui Khaladie pa ot mai cao kaingnaing cao pa pau simiang yieh ti tik vung viang guh veng Yerusaliem khawmuik heue. ¹¹ Khaix an, Nebuzaradan cao kaing naing pa pau simiang giex ti viex pui pa kawn deuk pa ot daux veng khankix mai pui pa hoik tieh ti hu ka plak simiang Babulon tau mai can pui pa ghoik ti ot daux sinax pui hun khankix heue. ¹² Viang mawh nan, cao kaing naing pa pau simiang hoik prah pui hotsia tixblah sonsang priex ka sipeem plix siiet mai yuh kaung heue. ¹³ Rong tawng pa koe daux nyiex buan Siyiex khankix mai linglawx mai rawm dung tawng khankix pa koe ka daux nyiex buan Siyiex, pui Khaladie hoik tawk lih shiag mawh shiag an mai kix don tawng khankix ing ka veng Babulon heue. ¹⁴ Kix teei aw tawng, sipeed mai sigiiep ngu mai lawktuh mai kraung tawng pa shiao cao giex kaing li ka daux kaing jhaw pa yuh tix heue. ¹⁵ Pan ngu mai pan ting khankix pa hoik yuh ka khri nawnaw mai mau nawnaw cao kaing naing pa pau simiang hoik rhim ti teei hu heue. ¹⁶ Rong tawng ra mu mai rawm dung tix mu mai linglawx khankix pa hoik yuh simiang Sawlamon ti deuh son nyiex buan Siyiex kraung shiao pa hoik yuh ka tawng khawmuik, mawh pa ang lai pon ciang kah heue. ¹⁷ Krax lhaong rong an tix mu koe kao daix sawk mai pa chup ka toh rong an yuh tix ka tawng heue. Krax lhaong jup toh rong tawng an koe loe sawk mai plah tawng pa awm ngai rub vungviang jup toh rong an mai

25:13 1Sim 7:15-22, 2Been 3:15-17, 1Sim 7:23-26, 2Been 4:2-5. 25:14 1Sim 7:45, 2Been 4:16. 25:22-24 Ye 40:7-9. 25:25 Ye 41:1-3.

khawm rieang plix kla jang pa koe hawt vungviang jup toh rong khankix yuh tix ka tawng heue. Rong an tix mu kawx hoik yuh awm paox tix heue. ¹⁸ Cao kaing naing pa pau simiang hoik giex ti viex Serayax pa mawh cao kaing ting cub cao giex kaing li mai Zephaniyax pa mawh cao kaing cao giex kaing li ra kaux tix kaux mai cao pau siviex loe kaux tix kaux ing tau mai tix heue. ¹⁹ Nawh hoik giex ti viex cao kaing naing tix kaux pa mawh cao kuang ka piang pui naing khankix lih khaing daux veng mai khawm pui phuan kaux cao tawx krax keud ka simiang pa sipub nawh ka daux veng mai cao kaing pui tiem lai cub krungaing cao kraixkhrawm pui haktiex khankix mai pui hakiex tiglah kaux pa sipub nawh ka daux veng khankix heue. ²⁰ Mawh kheu Nebuzaradan cao kaing pa pau simiang rhim ti viex kix ing ka simiang Babulon ka veng Ribalax heue. ²¹ Khaix an, simiang Babulon ciyang ka kix mai pah kix ka veng Ribalax ka daux haktiex Hamat heue. Mawh kheu nan, pui Yudax, hoik teei ti hu awm pui pa giexlaung khaing daux haktiex kix heue.

Gedaliyax Kuang Ka Haktiex Yudax

²² Khaix an, simiang Nebukhaneza kieh Gedaliyax kawn simex Ahikam pa mawh kawn simex Shaphan mawh cao pa kuang ka piang pui pa kawn deuk ka daux haktiex Yudax khankix pa prah Nebukhaneza simiang Babulon heue. ²³ Yam hoik mhong cub cao kaing krungaing khankix mai pui kix khawmuik ka hoik yaog simiang Babulon ti kieh Gedaliyax mawh cao pa kuang haktiex, kix hoek ka Gedaliyax ka daux veng Mizapa, tau mai Ishamelax, kawn simex Netaniyax, Yohanan kawn simex Khareyax mai Serayax kawn simex Tanhumiet pa mawh ceu pui Netawphat mai Yazaniyax kawn simex ceu pui Makhatix tix kaux, kix mai pui kix khawmuik heue. ²⁴ Gedaliyax yuh pa tiextu ka plak sivoe kix mai ah nin ka kix, "Paw lhatgraung ka kawncau pui Khaladie khankix heue. Ot ka daux haktiex in mai yuh kaing jhaw simiang Babulon mai an tak mawh pa mhawm ka son pex heue." ²⁵ Ka

daux khix aliah Ishamelax kawn simex Netaniyax, pa mawh kawn simex Elishama khaing daux nyiexma doeh simiang hoek tau mai pui kao kaux nawh pah ka Gedaliyax yum khawm pui Yudax mai pui Khaladie khankix pa ot tau mai nawh ka daux veng Mizapa heue. ²⁶ Pui khawmuik khawm pui ting pui iak mai cub cao kaing krunaing khankix yaog ti kaoh hu ka plak haktiex Ejiptux, kheu jao lhat kix ka pui Khaladie khankix heue.

Ploi Yehonix Khaing Thawng

(Ye 52:31-34)

²⁷ Khaix hoik luan num pa giexlaung kix ka Yehonixsimiang Yudax tixngoe aliah num,

khix kao ra tixnga aliah ngaix, Ewixmerawdiet simiang Babulon ka daux num jah nawh ti kuang ka haktiex nawh deeh ploi Yehonix simiang Yudax lih khaing daux thawng heue. ²⁸ Nawh sikah lox nyawmrhawm ka nawh mai tawx dee ngawm pa blon mhawm ka nawh khaing cub simiang khankix pa ot tau mai nawh ka daux veng Babulon heue. ²⁹ Mawh kheu nan, Yehonix hoik loh kraung ceep ot tix daux thawng mai nawh yaox ti ih priex preem ka plak sivoe simiang sijheeng glang singaix im ju nawh heue. ³⁰ Simiang hoik tawx pa ih ka son nawh ku ngaix glang singaix yam im ju nawh heue.